



George Frederick Nott.

Charles F. Cox.
New York.



33679/A

J. Chelsum

187 B x 1 18/2

27
Lindungen

D. GVILIELMI CRICHTONI
DE
FIDE HVMANA
LIBRI QVATVOR.

Ἐι γὰρ ἐτι ἀνθρώποις ἤρεσκον,
Χριστοῦ ὄχλος ἐκ ἀν ἡμην. Gal. I. 10.



TRAIECTI AD VIADRVN,
IMPENSIS ANTONII GODOFREDI BRAVNII.
MDCCLXXI.

D. GUILIELMI CRICHTONI

DE

FIDEI VIVIANA

LIBRI QVATVOR.

IN VITA ET MORIBUS
S. GREGORII PAPAE
MAGNI



— * * * —

TRACTATUS AD VIADRYM.

IMPENSIS ANTONII GODFREDI BRAVIERI

MDCCXXI.

V I R O
SVMME VENERABILI AC
DOCTISSIMO
IOANNI THEOPHILO
TOELLNERO

SACRAR. SCRIPTVRAR. DOCTORI
PHILOSOPHIAE IN ACADEMIA VIADRINA
ORDINARIO, THEOLOGIAE EXTRA-
ORDINARIO PROFESSORI

S. D. P.

GVILIELMVS CRICHTON.



Solent quidem illustri-
bus Maecenatum no-
minibus libros suos
auctores nostri inscribere, quos, quam-
quam potentiorum gratia ego omnium

maxime indigeo, propterea non fe-
quor, quod me nihil scripsisse cogno-
sco, quod illustrium virorum nomini-
bus dignum sit. Quare TIBI vero,
CONIVNCTISSIME COLLE-
GA, munusculum hoc offerre malim,
ex animo meo cognosces credo, quem
TIBI dudum deditissimum habuisti.
Siue enim studiorum nostrorum ac
consiliorum consensum, siue qua me
deuinxisti, familiaritatem, ac plena
illa humanitatis officia ac studia, qui-
bus me Tuum fecisti, mecum reputo,
ne in ingrati hominis crimen incur-
ram, vereor, si obseruantem, TVI-
que studiosissimum animum declarare
nollem. Non equidem spero, fore
vt, quae in his libris disputata sunt,
TIBI omnia probentur, TE tamen
dissenfum, si quis fuerit, in meliorem
par-

partem accepturum esse, non spero
modo; verum etiam confido. Noui
enim humanitatem Tuam, et si dicere
fas est, Tuum in me animum, ac
quod priuati hominis amore longe est
liberalius, ardentissimum, quo flagrare
soles, propagandae veritatis pietatis-
que, idque et sapientissimum et reli-
giosissimum studium. In hoc enim et
dies Tuos, et partem noctium, quin
TE etiam consumis ipse, vt non mo-
do liberaliori veri honestique sensu
imbuantur dociles animi, atque ex
disciplina Tua egrediantur, qui res sa-
cras et doctrina sua, et virtute iu-
uent, verum etiam ex libris Tuis
quam diligentissime elaboratis tam phi-
losophicae, quam theologiae litterae,
Christiana etiam doctrina liberaliora
incrementa capiant, Tua adeo in

Christianam ciuitatem continuo auge-
antur merita. Quod si legendis no-
stris subseciui temporis aliquid tribue-
ris, nec ea ad augendum veri studium
inutilia omnino iudicaueris, nobis quam
maxime gratulabimur. TV vero, quo
diutius de rebus humanis bene mereri
possis, vt prosperiori vtaris valetu-
dine, vt pia consilia Tua, studiaque
omnia rata habeat, eaque in posterum
etiam reipublicae salutaria esse iubeat,
DEVM ex animo precamur. Vale.



P R A E F A T I O.

Quamquam eorum morem non approbamus, qui libros suos in praefationibus copiose commendare solent: nostrorum tamen librorum ea nobis ratio esse videtur, ut de consilio, quod in his scribendis secuti sumus, sententia breuiter saltem exponenda sit. Septimus circumagitur annus, quum Halae exsequendi, cui praeeramus, muneris officii causa *de proscribenda ex purioribus sacris humana fide* scriptionem ederemus. Placuerat causam persequi, quae et grauis, et saeculo nostro, rerumque nostrarum conditioni accommodata visa erat. Quam lucubratiunculam quum viris fidei atque auctoritatis plenissimis probatam quidem, sed, quod minoribus libris, qui in nundinis non prostant, accidere solet, quamquam eius penes nos exemplar nullum est, paucis notam,

a 4 tam,

tam, neque per septem illos annos popularium opinionum vim imminutam esse vidimus, iteratam editionem non alienam fore putauimus. Omnis vero disputatio in quaestione *de humana fidei auctoritate* versatur. Iniquissima quidem rei huius ratio in Romana ecclesia est, quae pontificem in DEI filii loco ponit, eiusque praeceptis ac decretis diuinam auctoritatem tribuit: quae vero impietas quum iam dudum notata sit, rem, quae apud homines purioribus sacris addictos dubitationem nullam habet, non repetere, sed humanae potius fidei, quae in repurgatis etiam sacris superesse videntur, reliquias persequi voluimus. Patres ecclesiastici, reformatores, factorum in conciliis decretorum symbolorumque auctores *homines* fuerunt, fidesque, quae eorum auctoritatem sequitur, *humana* est. Cuius auctoritas quo rectius aestimari possit, de vniuerso eius genere praemittenda nonnulla, et totius sententiae fundamenta quasi ponenda esse duximus. Hanc vero maxime legem nobis impositam voluimus, ne de eo disputaretur, quod potuisset, nunc aut olim fieri posset, sed ex factis rebusque indubiis conficerentur omnia. Quare et in diu-

diudicanda humanae fidei auctoritate, et in laudandis fructibus meritisque eius locupletissimis testibus, et quae nobis firmissimae visae sunt, rationibus vti sumus. Nec fuit, cur, cum editam olim scriptionem quam diligentissime recognosceremus, sententiae nostrae nos poeniteret. Quo factum est, ut nihil fere immutatum, nec adeo multa addita sint. Quae vero addimus, partim ad illustranda, partim ad ea, quae dicta sunt, confirmanda, aut confundenda, quae opponuntur, argumenta faciunt. Non enimvero dubito, fore, qui, quoniam humanae fidei in repurgatis sacris reliquias superesse negant, totam hanc disputationem superuacaneam esse, nosque cum larvis pugnare iudicent. Doleremus certe vicem nostram, si nobis cum commenticiis aduersariis res esset: sed salua res est, non fictam, sed veram hominum sententiam refellimus. Quod si res se aliter haberet, ne sensibus quidem nostris fides in posterum habenda esset. Ex pluribus vnum alterumue exemplum commemorare fas esto. Legimus oculis nostris, virum doctum ob propositam *de descensu ad inferos* sententiam suam a celebris diarii auctoribus

PRAEFATIO.

de symbolicis libris admonitum esse. His auribus nostris paucos abhinc annos audi-
uimus virum theologos nostros, qui plus
quam Lutherus, Melanchthon, Olearius,
aliique magni viri (quos illius laudibus
longe maiores esse dudum cognoueramus)
videre velint, in indoctae multitudinis con-
cione magno animi impetu vituperantem.
Summa quidem iniquitas esset, et apertus
papismus, si quis publice docere vellet, con-
ciliorum et symbolorum eam, quae sacro-
rum librorum est, auctoritatem esse: qui
vero factum est, vt Θεοπνευστιαν, *mediatam*
dicunt, humanis libris vindicarint? quid
causae est, cur ὁρθοδοξίαν non tam ex sacris,
quam ex humanis libris aestiment? negant,
hominem per errorem labi non posse, ita
vero se gerunt, ac si non negarent. Non
solum hominum decreta, ad quae sacras
litteras detorquent, vera esse, sed etiam
fieri non posse, quin veri sit amans, qui ab
illis decretis abhorreat, opinione sua anti-
cipant. Quoad ergo erunt, qui a refor-
matorum aut conciliorum decretis symbol-
isque recedere nefas esse existiment, nos
vero errori libros nostros opposuisse crede-
mus. Quos vero iis non scripsimus, qui
sen-

sententiis suis insenuerunt, easque mutare aut incommodum, aut turpe, vel impium etiam putant. Magni et diuturni morbi difficiliter curantur. Vt ii vero, qui in religionis et theologiae naturam diligenter inquirendum esse opinantur, qui in eo liberalem ponunt operam, ut olim res Christianorum consiliis suis ac studiis adiuuent, ii etiam, qui veritatis cognoscendae studiosi sunt, quamquam nullo publici muneris officio tenentur, de humanae fidei auctoritate recte iudicare discant, nos equidem malle. Quod ad nouitatem attinet, non huius, sed veritatis commendationem secuti sumus. Fuerunt, qui argumenta nostra omnia facili negotio refutari posse adfirmarent, quod quamquam facile adeo fore non speramus, si quis tamen erroris nos conuicerit, hunc, si rem suam liberali animo egerit, bene de nobis meritum, nos vero per errorem lapsos esse, publice confitebimur. Accidet credo, ut in libris nostris candidis etiam rerum aestimatoribus displiceant nonnulla, quae excusanda esse videntur. Ea fere est saeculi nostri ratio, ut libri Latino sermone scripti paucos habeant lectores, quam ob rem libros nostros

me-

melius forte commendassemus, si vernacula lingua vſi eſſemus. Sed ſi quid videmus, res ipſa hoc recuſauit. Nos equidem dubitauimus, an diſputationes noſtrae cum homine litterarum omnino experte comunicandae ſint. Neque docendi via id patiebatur, propterea quod antiquorum auctorum, quae interponenda erant, teſtimonia non grata admodum Germanicae ſcriptionis ornamenta fuiſſent. Potuiſſemus equidem aliam omnino rationem ſequi, et philoſophos imitari, qui auctoritate omni neglecta ſolas rerum rationes, easque ab affectionibus earum et natura repetitas perſequuntur, aut eos adeo, qui alienae, interdum etiam ſuae modo delectationis cauſa ſcribunt, tum vero aut hiſtoricis argumentis vti, aut rem certam efficere non potuiſſemus. Verum non fuit committendum, vt, qui humanae fidei auctoritatem impugnamus, nobismet nimiam tribuere auctoritatem videremur ipſi. Facile ergo patiemur eorum vituperationem, qui nos a ſenſu venuſtatis alienos, nec elegantiffimum antiquorum, ſed ruſticiorem noſtrorum hominum morem ſecutos eſſe dixerint, quos acutae naris homines et rerum, et

con-

consilii, et litterarum discrimina cogitent
 rogamus. Neque probabunt credo, nos
 multis in locis alienis verbis vfos esse: su-
 mus vero vfi, quod vim eorum, quum vel-
 lemus, vt sententiae nostrae veritatem per-
 spicere quisque possit, qui velit, nos ex-
 primere posse dubitauimus. Fore vt mi-
 nus moleste ferant speramus, nos libris de
 fide humana alium singularem, eumque ad
 rem, de qua disputamus, accommodatum
 adiunxisse. Quoniam enim *fundamenta-
 lium articulorum* facta aliquoties mentio
 erat, vt de iis, quae ad hos pertinent sen-
 tentia nostra recte percipiatur, librum de
praecipuis Christianae religionis capitibus
 adiiciendum esse putauimus. Tria demum
 sunt, quae lectorem admonitum volumus.
 Primum est, ne ea, quae de *systematica*
 methodo diximus, male intelligat. Non
 de ratione theologiam, sed religionem
 tradendi, neque de methodo naturali et
 rerum rationi accommodata, sed de ea,
 quam vulgo *scientificam* dicunt, locuti su-
 mus. Alterum ad Sandii de patribus An-
 tiochenis iudicium pertinet. Postquam li-
 bri iam Halensi typographo missi erant, na-
 ti

cti sumus bibliothecam patrum, in qua *) extat epistola missa Paulo Samosatensi ab orthodoxis episcopis synodi Antiochenae. In hac se Arianismi vestigia deprehendisse putat Sandius. Episcopi vero se exponere adfirmant *acceptam a principio, traditam ac seruata in catholica ecclesia fidem.* — — *Filium genitum esse dicunt, unigenitum, imaginem DEI inuisibilis, primogenitum omnis creaturae. sapientiam et verbum, ac virtutem DEI ante saecula, non praecognitione, sed substantia et hypostasi DEVM* — — *Verbum simul, inquit, et DEVS, per quem omnia fecit Pater, non tamquam per instrumentum, neque tamquam per scientiam non per se existentem* — — — *qui implens voluntatem paternam patriarchis apparet* — — — *aliquando quidem tamquam angelus, quandoque vero tamquam dominus, quandoque autem DEVS esse adfirmatur. DEVM enim vniuersi impium est existimare vocari angelum: Filius vero angelus Patris est, qui est ipse dominus et DEVS.* — — — *Si autem Christus DEI virtus, et DEI sapientia ante saecula est, sic et quatenus Christus vnum et idem est substantia,*
quam-

*) Col. Agr. 618. T. III. p. 77.

PRAEFATIO.

quamvis multis notionibus cogitetur. — — —

E quibus (praeter loca enim, quae adferunt ex sacris libris, nihil fere omisimus) facile quisque colliget, quae de Sandii opinione ferenda sententia sit — — —

Postremo vere confitemur, nos graui dolore tangi, quod viris doctissimis, iisque non venerandis modo, sed amabilibus etiam contradicendum fuerit. Fuit autem et maior veritatis amor, et honestior. Neque dubitamus, quin dissenium nostrum aequo animo laturo sint, quos, quamvis scriptionem nostram inutilem iudicarint, suspicere non desinemus. Id vero cruciat animum, saepeque anxium dubiumque tenet, quod comprehendere non potest, quo tandem fato accidat, ut viri doctissimi, et Christianae pietatis adeo studiosi, ut hominem fabulam libenter spectantem quam grauissime peccare iudicent, opinionum dissidii intolerantiores sint, ac homines, qui theologos bono animo errantes e communione sua eiiciunt, laudent, eorum durtiem approbent, doctores humanorum librorum auctoritatem non secutos perfidiae publice accusent, si quis *Fosterum αἰγίου πνεύματος* plenum fuisse dicat, aut Verneti libros

libros commendet, hoc moleste ferant, nec
 que hanc suam invidiam ab humanitate alienam
 esse videant. Ni omnia nos fallunt,
 ex hoc quidem exemplo intelligitur, inter
 ecclesiasticam et Christianam *ὁρθοδοξίαν* mag-
 num discrimen esse, virosque pietati dedis-
 tissimos in ethicorum, eorumque grauissi-
 morum errorum periculum incurrere, si
 fidei humanae emanciparint. Agite fidei
 speique focii! excutite illiberale iugum, ne
 restitutae libertatis immemores, eaque in-
 digni esse videamini. Si hominum enim
 voluntati inseruimus, serui IESV esse non
 possumus. Nolite mirari, nos ea conten-
 tione, quam in re adeo graui illaudabilem
 esse non facile quisquam adfirmauerit, in
 commendanda et defendenda libertate vi-
 cum non magnae modo grauesque causas
 sint, quae ad studium libertatis ita quemque
 maxime excitant, ut quisque optime praeparatum
 pectus habet, quasque in libris
 nostris exposuimus, sed domestica etiam
 exempla habeamus virorum, qui humanam
 fidem forti eoque Christiano animo abiecto-
 runt. Veritatis nempe pacisque amor pro-
 fectis Academiae nostrae luminibus proprius
 quasi et natiuus splendor fuit, ut nobis,
 velle

PRAEFATIO.

vellemus ab eorum vestigiis aberrare, negligere veritatem, humanam auctoritatem sequi, et in invidiam atque altercandi libidinem delabi, turpitudinis tristissimam maculam inurere videremur ipsi. Quae dixit olim publice IOANNES BERGIVS in oratione sacra Regiomonti Porussorum habita, digna sunt, quae omni posteritati commendentur, et theologorum in Viadrina nostra, cuius summum quondam ornamentum BERGIVS fuit, vndique circumsonent aures. „Libere fateor, inquit, nostram fidem pendere minime ex hominum scriptis, neque Lutheri, neque mortalium cuiusquam, ne synodis quidem, confessionibus et formulis, multo minus constitutionibus ciuilibus, aut principum priuilegiis. Qui vero istis confidit, illi respondere liceret illud Ieremiae: propheta, penes quem somnium est, enarret somnium, et penes quem est verbum meum, eloquatur verbum meum, quid vero isti paleae cum tritico? sic et nos dicemus: vates, qui priuilegiis et ciuilibus legibus addit doctrinae suae auctoritatem, is doceat et praedicet priuilegia sua,

b

„ sua, qui vero verbo diuino credit, is do-
 „ ceat verbum diuinum, quod quidem ab
 „ humanis priuilegiis alienum est, et id vr-
 „ get, quod Dominus omnibus huius ter-
 „ rae regibus longe superior constituit.
 „ Quam rem in dubium vocanti recte pote-
 „ runt opponi, quae responderunt olim Iu-
 „ daeorum antistitibus PETRVS et IOAN-
 „ NES: vtrum apud DEVM aequum sit,
 „ vobis obtemperare potius, quam DEO,
 „ diiudicate. Suspecta religio est, cuius
 „ auctoritas in priuilegiis humanis ponitur,
 „ et his vult aduersariorum sententiam fran-
 „ gere. Quam IESVS docuit, fuit ab
 „ istis priuilegiis aliena religio. An Apo-
 „ stoli illis ornati erant, quum ad gentes
 „ abirent, sanctam doctrinam praedicaturi?
 „ longe alio muniti erant priuilegio: quum
 „ vos insectabuntur in aliqua vrbe, fugite
 „ in aliam. Quo cum priuarentur iniuria
 „ saeculi, alio donati sunt, eoque longe
 „ praeclarissimo: quisquis me agnouerit
 „ apud homines, eum ego quoque digno-
 „ scam apud patrem meum, qui est in cac-
 „ lis. Animam suam qui inuenerit, per-
 „ det, et qui mei caussa perdiderit, inue-
 „ ,niet.

„niet.,, Haec quidem immortalis ille Bergius, quae quoties lego, pietatem optimi viri, et fortem animum vehementer admirari soleo. Habuit virtutis suae liberales aemulatores. Non dubito, quin assentiat mihi candidus lector, ac mecum in reuerentiae sensum traducatur, vbi in memoriam Strimesiorum atque Iablonskiorum amabilia nomina reuocauero. Quum sexto huius saeculi anno inter iubila non nostrae modo ciuitatis, sed omnium etiam bonorum, quin doctissimorum virorum, qui peregre, et ex regionibus longo locorum interuallo a se disiunctis huc conuenerant, et quod maximum est, coram Serenissimo Rege, summo dignitatis Porussicae auctore, reparatore Academiae nostrae, et in summa frequentia ac celebritate ad summos in theologia honores euehendi essent viri digni istis habitis, vir ille integer et priscae fidei; SAMUEL STRIMESIVS in oratione in illa solemnitate habita, in verba erupit magnum veritatis amorem quam apertissime declarantia. „Vt in omnibus, inquit, „assertis vestris istum (sacrum codicem) „maxime consulendum audiendumque scia-

b 2

„tis,

PRAEFATIO.

„tis, et ad hunc humana scripta quaecum-
 „que, ipsa quoque *oecumenica*, nedum par-
 „ticulariora ceu fallibilia, et non nisi vel
 „per immane sacrilegium, vel per in-
 „signem aequiuocationem Θεοπνευστα appel-
 „landa, arbitremini examinanda, maxime
 „inter disputandum, vbi valeat apud vos
 „Augustini illud: nec ego Nicaenum con-
 „cilium, nec tu Ariminense tamquam prae-
 „iudicaturus proferre debes — — —

— — Eodem animo fuit is, quem
 nunquam satis commode pro dignitate lau-
 dare queo, cuius memoria, quod non te-
 mere credo, omnium, qui eum norunt,
 animis infixata est, cuius vmbra, cum ego
 equidem professiones meas publice adirem,
 ad latus, et in conspectu meo adstare, et
 nescio quam circumspectionem mihi vel in
 ipso muneris primordio praecipere, quam
 religionem incutere visa est, immortalis

IABLONSKI. Quantus vir fuerit,
 quam eruditus, quam pius in DEVM et
 rempublicam, quam studiosus veritatis
 aequae ac pacis, et quam ornatus cunctis istis
 virtutibus, quae dignum nomine suo theo-
 logum reddunt, norunt, qui per vniuer-
 sam

sam Christianorum, qui emendatis sacris utuntur, rempublicam longe lateque dispersi sacris muneribus praesunt, et, quod ex multorum exemplis cognoui, quam creberrime felicitatem ad animum referunt, quam sibi contigisse recte arbitrantur, cum IABLONSKIO praeceptore uti, eiusque in scholis assidere liceret. Ille vero et in acroasibus suis, et in libris hoc inprimis commendavit, inhaerendum oraculis diuinis, ex iisque doctrinam sacram esse addiscendam, nec Christianorum esse, quemquam sequi praeter illum, quem generis nostri magistrum DEVS constituit. Quum vero videret, res inter homines purioribus etiam sacris addictos plerumque longe aliter fieri, non potuit a se impetrare, quin exclamaret publice: peccatur Illicos intra muros, et extra — — —

Quoties illacrimantem vidimus grauissimum senem, quando in narrationem tristium in sacra ciuitate turbarum, diffidiorum, vexationumque inciderat? quoties omnes, qui eum audiebamus, vix potuimus nobis temperare a lacrumis, quum vultu graui ac decoro, et nescio quam sanctitatem spirante,

te,

te, ore suauitatis pleno, verborumque rem
tradendam quam grauissime et maxima vi
exprimentium, quae animum viri pietate
et religione penitus imbutum quam lucu-
lenter demonstrarent, consilio et precibus
vere paternis pacis et moderationis studium
nobis commendaret, et hoc esse, quod
velit imitatio Christi, quam copiosissime
doceret? Eheu! Eheu! abiit hinc pius
IABLONSKI, sed quod sequamur,
exemplum reliquit.

Scr. In Academia Viadrina. Prid. Calend. Ianuarii.
MDCCLXXI.





DE
FIDE HVMANA.

LIBER PRIMVS.

CAP. I.



KELIGIO ab impietate vitio-
rumque seruitute ad recti
amorem homines reuocatur
neque ratione quam dili-
gentissime contemplanti omnia et perpon-
deranti, neque, quae rationis inopiam ac
imbecillitatem subleuet, fide carere potest.
De *ratione* quidem sine insania dubitari ne-
quit, neque dubitauit quisquam. nisi mise-
rabiles illi, qui scintillam rationis in animis
tamquam sub fauilla delitentem, quid ipsi age-
rent nescii. penitus extinguere conati sunt.
Hoc enim coelesti munere, luce et magistra
vitae, naturae nostrae summo ornamento
A fe-

femoto et reiecto fordent omnia, in tenebras altamque noctem irruunt, rebusque humanis cunctis omnis ordo, splendorque, decusque exuitur. Quid tandem erit fides in hominum animis, nisi caeca quaeuis, prout occurrerint, sequendi, defendendi, praeci-
piendi cupido? Omne euertetur religionis fundamentum, et quae nos ad altius fastigium euectura esse putauimus, ad infimum beluarum consortium detrudent. Neque tamen rationem *solum* sequi religio potest: multa enim, magnaque, scituque maxime necessaria sunt, quae summi doctissimique viri, licet eximio ingenii acumine polleant, veroque inuestigando dies dederint noctesque, ex tenebris eruere, grauibz saltem argumentis confirmare non possunt. Vitam delicta, et quae haec sequuntur, mala sublaturam, improbis dignas sceleribus poenas, probis hominibus praemia allaturam, eamque sine fine ac sine interuallo beatam optarunt saniores philosophi: firmas spei rationes docere, dubia omnia remouere non potuerunt, neque ad hunc portum totius vitae cursum dirigere ausi sunt. Quod si rationem tollis, tollis fundamentum, totamque fidei arcem destruis: fide vero ex religionis finibus pros-
cripta, ratio optimo socio ac comite orbatur, atque illius adeo iudicia secutus in rebus maximi momenti dubius anxiusque haeres, quo olim migratura sit misera anima, quo fato vsura scis cum ignarissimis. Qui itaque
neque

neque omnem abiecerunt rationem, neque ea elato supercilio confisi, propriaeque immemores naturae sunt, in eo conueniunt, in religionis causa *rationi fidem* arctissimo iungendam vinculo esse: quorum aliqui tamen ab alio sibi errore cauere non potuerunt, dum de principatu alterutrius cogitantes nunc fidei imperium commiserint, iusserintque rationem ancillari, nunc rationem in solium euexerint sanctae fidei leges daturam. Illiberalem illam quidem de ratione sententiam, a qua Theologos ne Pontifex LEO DECIMVS quidem dimouere potuit, ex eo tempore sequi amarunt, ex quo propter AVERROIS de animae mortalitate opinionem, quae ab ARISTOTELE repetita esse credebatur, Romae in Concilio Lateranensi *Philosophiam pro Theologiae ancilla habendam esse* decretum erat. At vana sunt, et inutilia haec conamina. Quae enim sororio vinculo copulantur, separare, alterique alterum tamquam seruum subiicere velle, turpe atque improbum est. Quod si hac in re de imperio regnoque cogitare villo pacto licet, tam rationem quam fidem reginas esse malumus, quarum vtrique sua sint regna iustis descripta limitibus, quae sacro sibi amicitiae iure pactisque mutuis iunctae nunquam inferant pedem in alterius fines, verum in suis sese religiose ac pie contineant. Fides rationi praescribere nequit, quoniam ipsa alias vacillaret fides: neque ratio fidei magistra

A 2

erit,

erit, inops enim alienam inopiam non facile leuabit. Neque nobis repugnant, quae Theologi sacrorum scriptorum auctoritate *de captiuanda ratione sub fidem* docere solent. Locutio ista enim indicat modo, sancta decreta, cum nullam in se contineant repugnantiam, assumenda esse, licet modum, quo, aut rationes, ob quas aliquid factum sit, ignoremus. Quod sanctum vtique officium est, et non in fide solum, sed in Philosophorum etiam conclusionibus, vel sensibilibus adeo rebus locum habet. Cum illis ergo, qui hoc fidei et rationis vinculum, quod ipsi docent, rationi conforme, *improprie* imperium vocare, ex huius uero nomine nullum velint sumere argumentum, lis nobis nulla erit. At rectius fuisset, si inutiles illas de fidei rationisue imperio quaestiunculas omisissent, et legitimos potius vtriusque fines rite et secundum saniores leges constituissent. Nondum vero tam bene cum rebus humanis agitur, vt inueteratae opiniones radicitus extirpentur, nullosque habeant defensores. Vt enim quotidie fere arma agitantur telaque, quibus fidei iura violare volunt sacrae ciuitatis hostes; ita noridum desunt, qui fidem superstitiose collarit, rectaeque rationis vsum, non quidem publice proscribant, quod impune fieri non posset, sed improbis insidiis petant, et quae nescio ex rationis vfu exoriantur mala, lamentabili uoce querantur. His merito accensemus FIDEI HVMANAE cultores, in quo-

quorum causam his in libris, prout per ingenium nostrum, temporisque, quo excludimur, angustiam fieri poterit, diligenter inquirere constituimus.

LIBRI PRIMI

CAP. II.

QUOD si assensum, qui datur testimonio alterius de re, quam neque nostro sensu, neque rationis ope percipere possumus, FIDEM vocare solent: FIDES HUMANA erit, quam testimonio *meri* hominis rem eiusmodi narrantis adhibent. Ex quo intelligitur, fidem humanam naturalem, et in hominum animis insitam cognoscendi vim solum, verborumque mentem significantium integritatem sequi. Desinit igitur humana esse, quando testem a DEO doctum actumque esse certum est, propterea quod sapientia sanctitateque DEI nititur. Neque praetermittere possumus, licet non omnibus arrisurum sit, meliora enim non pluribus placent, *fidem rationis ope carere non posse*. Siue enim per rationem naturalem quamcumque cognoscendi vim intelligas, vides, fidem in animo sedem habere non posse, nisi notiones rerum ac rationes, quaecumque demum fuerint, sint praegressae: siue rationem voces rerum conclusionumque nexum lucide perspiciendi facultatem, fides nullam firmitatem habebit, et agitata ab aquilone arundine mobilior erit,

nisi fuerit a ratione explorata. Si per rationem, inquit H V E T I V S, a) homines sumus, an nobis velut abiicienda humanitas est, cum fide utimur? Res DEI ratio est, inquit Tertullianus — — — non potest intellectus iis assentiri, quae proponuntur sibi ad credendum, nisi ipsi uideantur credibilia. Atqui videri ipsi credibilia non possunt, nisi exploret argumenta, cur credibilia sint, eaque approbet, quae suadeant, ea refellat, quae deterreant. Cuius auctoritatem, quae nobis eo memorabilior visa est, quo impudentius solet haeresis, in qua fuit vir ille eruditissimus, humanam fidem supra rationem euehere, ponat, quocumque loco quisque velit; qui sine partium studio, rem paullo diligentius contemplatur, hoc inter maxima rationis privilegia referendum esse fatebitur, ut indiuulsa sit veraque certioris fidei socia. Hac enim destituta fides in temerariam persuasionem caecamque degenerat credulitatem, opinionesque procreat ceteris erroribus omnibus, teterrimisque humani ingenii monstris longe foediores. Cuius rei rationem saecula omnia comprobant. Vnde enim tam absurdae in rebus sacris apud omnes profanos populos opiniones et caerimoniae, nisi ex illa fide? Qui fieri alioquin potuisset, ut homines ratione praediti Iouem Cretensium regem, fratresque Neptunum et Plutonium, Apollinem ex liberalium artium inuentione

a) In Quaest. Alnet. L. I. c. I. §. I. et L. III c. 3 §. 1.

tione clarum, quin Mercurium etiam obfur-
 ta atro carbone notatum, aliosque mortales
 ad deos retulerint, boues tandem, canes,
 felesque adorarint, porrumque et cepe ne-
 fas violare et frangere morsu putarint? *O*
sanctas gentes, quibus haec nascuntur in hortis
numina! Tantum vero abest, ut rationi,
 quod improbauimus ipsi, tyrannicum in fi-
 dem imperium committamus, ut multa esse
 statuamus, quae ratio ignoret, fide autem
 recipienda ac seruanda sint. Fidestemeraria
 est, et natura hominum indigna, ubi a ra-
 tione se auulserit: at ratio iniusta etiam fo-
 ret, sui que immemor ipsa, si in fidei iura
 inuolare, et incomitata, nullisque praesidiis
 adiuta ad diuina penetralia pedem promo-
 uere vellet. Sufficit, in fide nihil esse, quod
 rectae rationi repugnet, verum multa sint,
 necesse est, quae ratio inuenire, probare,
 immo quomodo sint, perspicere nequeat.
 Quis est, qui erroris arguat COTTAM apud
 CICERONEM: *b) Omnibus fere, inquentem,*
in rebus, et maxime in physicis, quid non sit
citius, quam quid sit, dixerim: aut TVLLIUM
ipsum, qui, quarum quidem rerum, inquit euenta
magis arbitror, quam causas quaeri oportere
— — — obseruata sunt haec tempore immenso
et significatione euentus animaduersa et notata
— — hoc sum contentus, quod, etiamsi quo-
modo quidque fiat, ignorem, quid fiat, intel-
ligo.

ligo. c) Quum vero omnis disputatio de fide humana eiusque auctoritate futura est, necesse est, ut fines terminique eius describantur, quo facilius intelligi possit, vtrum ei cum religione coniunctio intercedat.

LIBRI PRIMI

C A P. III.

VT sensuum et rationis, sic fidei quoque certi sunt termini, ultra quos verum consistere nequit. Qui termini in ipsa fidei natura et definitione conspicui sunt: a quibus illi, quibus humana continetur, non differunt, nisi ab hominum natura angustioribus cancellis circumscribantur. Nulla vero fides locum in rebus habere potest, quas sensibus nostris percipere aut rationis opè possumus; quis testes scire pro tempore, aetate, loco, sua aut rerum natura, vel omnino non possunt; de quibus sensus aut ratio contrarium docent; vbi dubium est, an testes sint decepti, an fraudes struant ipsi. Quibus positis conditionibus virum prudentem dedecet fides humana. Absolum igitur est, sensibus suis diffidere, rationem abiicere, patrumque placita et praecepta caeco impetu sequi. Frustra data hominibus istis sensa et ingenii lumina sunt, quibus uti volunt, verum ut arma, quorum nullus usus est, aerugine, situ
et

et puluere obduci patiuntur. Temeraria erit fides, quando homines de rebus iudicium ferunt, quas ex leuissima modo parte, aut omnino non cognoscunt, aut studiis adhibitis omnibus cognoscere nequeunt. Neque locum habebit in sententii, quae ex rerum natura effici possunt, neque in rebus insensilibus. Habenda non erit testibus, quorum dexteritas inexplorata est, neque lucri cupidinis avaritiae, nimiae sui aestimationis, superstitionis nomine suspectis; deneganda denique omnis, si recto sensuum usu, vel indubiis argumentis contraria testium auctoritati sententia confirmetur. Quamquam igitur ii non sumus, qui humanam fidem omnem ex Theologorum confessoribus proscriptam velimus, quum in ceteris etiam disciplinis, quae summam habent conclusionum atque argumentationum grauitatem, ad illustrandas commendandasque sententias multum nonnunquam taciatur: *dogmatum tamen veritatem ex fide humana recte unquam diiudicari posse negamus.* Praecepta enim aut possunt ex rationis fonte deriuari, aut non possunt: si possunt, nostro standum iudicio, res suo momento ponderanda, et cum iustis veri rectique legibus conferenda est. Quod si nos enim vano auctoritatis splendore decipi patimur, non nostris videmus oculis, sed aliorum ingenio confisi, his ducibus nos committimus, incerti, qua via incedamus, an longius recedamus a regio veritatis tramite,

an rectam ad hanc deam viam ingrediamur. Haec puerorum et anicularum consuetudo est sancte tuentium magistrorum placita, ut non digitum ab illis discedere vnquam velint, et qui ad hominum illorum partes abire dubitant, hos ut profanos nimis aspere tractent. — *Turpes vero hae nugae sunt, maximeque sapientis est, veritatem ab opinione seiungere. Nihil magis praestandum, quam ne pecorum ritu sequamur antecedentium gregem, pergentes, non qua eundum est, sed qua itur. Atqui nullares nos maioribus malis implicat, quam quod ad rumorem componimur, optima rati ea, quae magno assensu recepta sunt, nec ad rationem, sed ad similitudinem viuimus.* — —

Sanctae etiam, quas sequi nostrum est, vitae morumque leges fidem istam vetant. Quum enim nos nostrumque animum perficere debemus, ingeniique lumini tantam, quantam possimus, conciliare claritatem, indignum est viro litterato ex fide tenere; quae clarius certiusque scire potest. Non possumus etiam, quin fidem istam ceu monstrum saeuum et pestiferum, quod vinculis hominum animos alliget, et in densissima detineat caligine, peioris sobolis infaustam matrem e medio tollendam, atque posteritati etiam consulendum esse censeamus; propterea quod ex hac fide, quotquot gentes vexarunt, contentionibus, bellis, miseriarumque genere omni lacerarunt, ortae haereses sunt. Quod sectarum studium a ratione eo magis abhorret,

ret, quo certius inter omnes constat, tam philosophicarum, quam theologicarum disciplinarum auctores omnes suo esse iudicio usos. Improbi est, placita seu tamquam oracula aliis praecipere, et non doctorum lenitate, sed tyrannica auctoritate, quae sibi placent, obtrudere: seruilis et abiecti animi, aliorum somnia sine diligenti inuestigatione assumere: defendere vero, tueri, legibus munire, privilegiis et comminationibus auctoritatem iis conciliare, hominis est omni humanitate exuti. Quod si vero restradantur, quae ad philosophiam non pertinent, tum tandem fidei causa vincet? Diuinae utique diuina erit auctoritas humanae ne minima quidem. Quod si enim neque de rebus gestis neque de euentibus, neque de legibus civilibus, sed de dogmatibus disputatio suscipitur, varia miseraque fides illa est. Quis testi tuo rem illam mirabilem patefecit? aliquo forte feliciori genio utitur, aut inter ceteros mortales diuina ingenii alacritate eminet? Video id vnum superesse, ut se id a DEO habere praedicet, quod ab aliis credi iubet: quod si demonstratum fuerit, esse e Dei filiis vnum, quibus fidem haberi, licet etiam sine veri similibus et necessariis demonstrationibus loquantur, vel PLATO iussit in *Timaeo*, crede, at fides tua humana non est. CICERO quidem: *d) Ego vero, inquit, eas* (reli-

(religiones a patribus acceptas) defendam, semperque defendi, nec me ex ea opinione, quam a maioribus accepi, de cultu deorum immortalium, ullius unquam oratio aut docti aut indocti mouebit, sed cum de religione agitur, T. Coruncanum, P. Scipionem, P. Scaeuolam, pontifices maximos, non Zenonem, aut Cleanthem, aut Chrysippum sequor, habeoque C. Laelium augurem eundem sapientem, quem potius audiam de religione dicentem in illa oratione nobili, quam quemquam principem Stoicorum — — — — — a te, philosophe, rationem accipere debeo religionis; maioribus autem nostris, etiam nulla ratione reddita, credere. Mirarer philosophum verbaque tanto viro indignissima, nisi sole clarius esset, hoc acutum caput sub alieno nomine, ut alia vitia populi saeculi-que sui, quae publice notare nefas erat, sic caecam etiam fidem castigasse. Non dedecet vero solum liberalis ingenii hominem in rebus sacris humanam fidem sequi, sed improbum etiam est et perniciosum, quo quippe diuina violatur religionis auctoritas. Sacri equidem scriptores quam apertissime docent, praeter traditam a DEO doctrinam nullam esse fidei nostrae normam. Vnum est caput, a quo omnia sacri corporis membra succum et halitum ducunt; vnicus est dominus, qui animis imperat. Qui igitur fidem humanam commendant, nouum ciuitati sacrae caput, nouum dominum addunt, immo legitimi domini auctoritatem imminuunt, dum

dum ei alium ceu adiutorem adiungunt, eo-
que efficiunt, vt multi non ob veri, sed com-
menticii domini auctoritatem religionem de-
fendant. *Quo factum est, vt lasciuire ingenia
coeperint, negotiosis ineptiis se dare, inanibus
rixis indulgere, eas mouere quaestiones, quas
nullius legis necessitas praescribebat, sed inutilis
otii altercatio proponebat, de quibus nec inter-
rogare initio decebat, nec interrogatos respon-
dere.* Fides diuina in simplici DEI verbo
acquiescit, nec argutias, nec verborum am-
bages, nec alte repetitas disputationes ha-
rumque laudem adfectat. *In simplicitate, in-
quit AMBROSIVS, fides est, in fide iustitia est,
in confessione pietas est; non per difficiles nos
Deus ad beatam vitam quaestiones vocat, non
multiplici eloquentis facundiae genere sollicitat;
in absoluto nobis ac facili est aeternitas, Iesum
suscitatum a mortuis per DEVM credere, et
ipsum esse Dominum confiteri.* Fidei humanae
auctores vero inutilium studiorum sparserunt
semina, vnde lolium sterilesque illae aue-
nae. Horum hominum cura saepius in ver-
bis versatur, formulamque a patribus acce-
ptam aliter ac communiter fit interpretan-
tem, aut paullulum ab opinionum tramite
recedentem seueri iudices sempiternis poe-
nis addicere pro humanitate sua non dubi-
tant. Omnibus viribus enituntur, vt prae-
ter sacras litteras leges cudantur, neque sa-
crorum scriptorum verbis, sed asperioribus
vocibus, iisque ex profanorum consuetudine
non-

nonnunquam petitis exornentur, quicumque vero ha- improbauerit, aut decantatum illud *Schiboleth* pronuntiare nequeat, profani hominis loco habendus sit. O horrendum monstrum atque ingens.

LIBRI PRIMI

C A P. IV.

VANVS fidei humanae cultus, qui aut perit falsos commenticiosque deos, aut horum nomina prop- g uit, ab antiquissimis inde saeculis ad populos tam rei militaris gloria, quam fama eruditionis, quin religionis etiam sacrorumque integritate celeberrimos transit. Sanctorum equidem patrum, quibuscum sermones olim contulit DEVS, morbo isto laborasse religio haud videtur: verum pestem potius in gentibus a veritate auersis enatam esse, si quid in hac causa adfirmare fas esset, adfirmaremus. Extant vero in antiquissimis profanorum scriptorum libris illustria fidei huius humanae genti onera Aetna grauiora imponentis exempla. Quis est, qui nesciat, quibus fraudibus artibusque ad commendanda praecepta sua, hisque diuinam auctoritatem conciliandam vsi sint sacerdotes? Num caeci illi *idolorum* cultores scirent, qui dii, quibusque colendi supplicationibus sint, quaeque perpetranda sacrificia, nisi sacrorum antistitum instituta tamquam diuina oracula accepissent? tolle fidem
huma-

humanam, veteres auias de pulmone reuel-
le, falsi cultus, quamuis vehementer ament,
simul tolles studium. Neque veri DEI cul-
tores ab hac labe omnino immunes fuerunt.
Apud Hebraeos olim, Phariseos praefer-
tim, hominum instituta viguisse, horumque
adhuc in Iudaeorum sacris multum valere
auctoritatem, inter omnes constat. Saeculo
equidem Apostolico fidem humanam Chri-
stiani secuti non sunt: diuini illi viri monstro
huic, vbi vel eminus se ostentasset, fortiter
restiterunt. Quum vero consequentibus
saeculis, postquam se in sacram societatem
contulerant etiam Romanorum Imperatores,
facies Christianismi mutaretur, cum ceteris
impuri cultus sordibus ex profanorum delu-
bris in Christianorum templa translatum fidei
humanae studium est, rebusque sacris magis
magisque in peius ruentibus maxime saeuit
torrentis instar montano flumine rapidi, cui
arcendo aggerum vastissimae moles impares
sunt. Quae enim maior cogitari potest ty-
rannis, quam Romana, quae hominem er-
randi periculo eximit, eiusque decretis vim
ac potestatem vere diuinam tribuit? Dete-
stantur nostri hanc impietatem, verum vi-
deant, ne foueant anguem in sinu. Mutata
rei facies est: in vincula interdum triste illud
monstrum coniectum viderunt, qui altero
abhinc saeculo viuebant, interfectum, e me-
dio auectum, quamquam tollere voluerunt
restituendae puritatis auctores, et sustulif-
sent

sent, nisi consiliis studiisque vere piis obstisset aliorum iniquitas, prorsus sublatum nos equidem non vidimus. Quot sunt, qui in controuersis in quaseruditi nonnunquam incidunt, *patrum antiquorum placita, reformatorum praecepta, conciliorum decreta, symbolorum sacram auctoritatem* crepent? Non is sum, qui omnia, quae patres ac reformatores docuerunt, concilia decreuerunt, constituunt symbola improbem, aut nullius usus esse adfirmem: quanta autem optimus quisque veri cultor afficiatur necesse est tristitia, quando religionis doctores qui vnum DEVM et vnum redemptorem profitentur, et in concione Euangelium ceu vnicam fidei normam commendant, nisi patribus, horum enim vitia aperta nimis sunt. reformatoribus certe, interdum etiam conciliis, maxime vero symbolis tantam vindicant auctoritatem, quanta soli verbo DEI tribui potest? quamquam enim de theologiae principio secundo Lipsienses Helmstadienses Vittebergenses alique theologi acriter disputarunt, illi etiam, qui secundarium principium reiecerent, se *γνησιως* Lutheranos, suos vero aduersarios *nouatores* vocarent; e) sunt tamen nostris etiam diebus, qui hominum decreta
nor-

e) Conf. IO. HENR. MAII diss. *De unico theologiae principio, quod est S. Scriptura Canonica*, habita Gissae. 1706.

normas secundi ordinis constituunt, et quidem quia concordent cum sacris litteris. At nescimus, qui fiat, ut libentius ex secundariis normis quam ex primaria, vel verius, vnica controuersias suas aestimare immo homines ab his normis secundariis recedentes, licet normam primariam sancte venerentur, et in sola interpretatione diffideant, mutare, muneribus vel sedibus etiam mouere, ignominia prosequi, iniuriis laceessere, vinculis fatigare, ad supplicia eaque durissima rapere, et ad seruandam humanorum scriptorum auctoritatem quaeuis diuinis litteris contraria committere ament. Quid ergo mirum, si indocta etiam multitudo religionem humana fide amplectitur eam optimam esse rata, quam a parentibus ac magistris acceperunt, aut quae publicis legibus sancita et munita est. In rebus minoribus itaque rationem sequi volunt mortales: in re omnium maxima caecutire, aliorumque fidei se temere committere malunt. Cum his res nobis non est, quibus mederi nemo potest, quamdiu fuerint. qui morbum istum animorum ac pestem alant, commendent et laudent: ad fidei autem humanae patronos caussa agenda est.

LIBRI PRIMI

CAPVT V.

QUOD PATRES ECCLESIASTICOS attinet, breuis esse potero. Hi enim nostro aeuo apud addictos purioribus sacris homines haud magnam habent auctoritatem: quamquam non ita pridem fuerunt, qui sacros sermones flosculis, qui ex his hortis decerperentur, optime exornari posse, sibi persuaderent oratores. Nos ad patrum scripta fidem non exigimus, quia ex prima ecclesiae aetate pauca supersunt scripta, vix eorum etiam nomina ad nos peruenerunt. Quis nostrum PAPIAE EPISCOPI, HEGESIPPI, DIONYSII CORINTHII, APOLLINARIS HIERAPOLITANI, IULII AFRICANI, MILTIADIS, SERAPIONIS, POLYCRATIS EPHESINI, multorumque aliorum libros integros legit? quis inquam vidit? ingens est, quos antiquis doctoribus falso attribuerunt, librorum numerus. Ut erroribus auctoritatem conciliarent, sub clarissimorum virorum nomine libros ediderunt. Quibus artibus vsi etiam sunt librarii illiberalis quaestus studiosi, quamquam hi id interdum ex veri auctoris ignorance fecisse videntur. DIONYSII AREOPAGITAE, quae circumferuntur, opera *ὑποβολιμαία* esse, iamdudum iudicarunt viri docti, quorum iudicium confirmat vir antiquarum litterarum peritissimus PETAVIVS, propterea quod scri-

scriptor ille de Trinitatis et Incarnationis mysteriis disertius expressiusque loquatur. Nec minus obscurum est, librum NOVATIANI de Trinitate TERTULLIANO, RVFFINI opus in Symbolum Apostolorum CYPRIANO, aliorum libros aliis adscriptos esse, quorum magnum numerum recenset ROBERTVS COCVS *in censura quorundam scriptorum, quae sub nominibus sanctorum, et veterum auctorum citari solent, cum vel supposititia sint, vel dubiae saltem fidei.* Genuina patrum scripta mutata etiam et mutilata sunt. Iamdudum questi sunt viri eruditi, aut temporis iniuria, aut iniquorum hominum fraudibus factum esse, ne generalium conciliorum acta integra habeamus, neque, quae supersint, pura atque sincera sint. LVCAS HOLSTENIVS in praef. Oper. ATHANASII: *neque solius Athanasii, inquit, ea fortuna, ut ineptissimorum interpolatorum manus subiret, cum Chrysostomi, Procli, aliorumque hominibus sequiorum saeculorum ineptiis foedatas in codicibus regis inuenerim.* Eandem fortunae iniquitatem subierunt ATHENAGORAE, CLEMENTIS ALEXANDRINI, TERTULLIANI, ORIGENIS scripta. CHRYSOSTOMI opus in Matthaeum etiam mutilatum, et primum quidem a Mahusio, deinde a pluribus a faecibus Arianis repurgatum esse dicitur. Patres ipsi ab opinionibus saepe discesserunt, noluerunt tamen, ut verba sua caeca fide recipiantur. AVGVSTINVS ep. XIX. ad HIE-

RONYMYM: ego fateor tuae caritati, inquit, solis eis scripturarum libris, qui iam Canonici appellantur, didici hunc honorem timoremque deferre, ut nullum eorum auctorem scribendo aliquid errasse, firmissime credam. Alios autem ita lego, ut, quantalibet sanctitate doctrinaque praepolleant, non ideo verum putem, quia ita ipsi censuerunt, sed quia mihi vel per illos canonicos auctores, vel probabili ratione, quod a vero non abhorreat, persuadere potuerunt. HIERONYMVS ep. ad Tranq ego Origenem propter eruditionem sic interdum legendum arbitror, quomodo Tertullianum. Nouatum, Arnobium, Apollinarem, nonnullos ecclesiasticos scriptores, Graecos pariter et Latinos, ut bona eorum eligamus, vitemusque contraria iuxta Apostolum dicentem: omnia probate, quod bonum est, tenete. CYRILLVS Hieros. Catech. IV.

μηδε ἐμοι τῶ ταῦτα σοι λεγοντι ἀπλως πισευσης, εἰαν τὴν ἀποδείξιν τῶν καταγγελλομένων ἀπο τῶν θείων μὴ λαβῆς γραφῶν. Ἡ σωτηρία γὰρ τῆς πίστεως ἡμῶν οὐκ ἐξ εὐρεσιλογίας, ἀλλὰ ἐξ ἀποδείξεως ἐστὶ τῶν θείων γραφῶν. Quod tandem caput rei est, patres multifariam erraverunt. Neque id de indoctioribus modo sumendum est, sed de omnium etiam doctissimis aequae, ac orthodoxias studiosissimis, tam ORIGENE et HIERONYMO, quam AVGVSTINO, ATHANASIO et CHRYSOSTOMO, qui in fundamentalibus adeo articulis ex CHEMNITII aliorumque theologorum iudicio errarunt. AVGVSTINVS se errasse fatetur

fatetur ipse in praef. ad libr. retract. et confess. Caeterum de erroribus patrum praeclara extant doctissimorum virorum testimonia. Patres sibi etiam contradixerunt ipsi, eorumque scripta non facile intelliguntur, cum propter linguas et dicendi genus, quibus vtuntur, tum propter res ipsas explicandas, quas variis Rhetoricae et Dialecticae artificiis obscurant et impediunt, quia denique multas voces alio, quam qui nunc in vsu est sensu, vsurpant. Quamquam vero hi patres in rebus sacris nullam merentur fidem; magna eos tamen, quae multorum malorum, quibus adhuc premitur Christiana respublica, causa fuit, prosecuti reuerentia sunt. Cum enim non multo post primam Christianorum coniunctionem viguerit illaudabile illud diuina humanis miscendi studium, quo PLATONIS, vt deinde ARISTOTELIS, immo profanorum philosophorum tantum non omnium placita et somnia cum sanctiori doctrina conciliare, et arctissimis vinculis coniungere voluerunt, ortae sunt inutiles, tristes et impiae lites de rebus ad religionis firmitatem et puritatem omnino non pertinentibus, et infinita illa turpissimaque, quibus Christiana ciuitas in tot sectas abiit, dissidia. Quae enim erat magna episcoporum auctoritas tantum valuit, vt hausta ex impuris riuiulis dogmata diuinorum oraculorum instar recepta fortiter, tamquam res DEI ageretur, defenderentur. Fuisse tamen vel obscurissi-


mis saeculis. qui, quamuis haereseos suae arcem deferere non auderent, aperte satis declararent, quam sequantur de humana fide sententiam, quidque publice tradituri essent, nisi se atrocissimis vinculis constrictos sentirent, vel vno exemplo comprobabimus, et quidem DURANDI A SANCTO PORCIANO, qui *Doctor Resolutissimus* vt appelletur aeuo suo meruit, cuius verba ex NATALIS ALEXANDRI historia ecclesiastica f) ex parte transcribemus. In praefatione in IV. libros sententiarum: oportet, inquit, loqui de mysterio Christi et vniuersaliter de his, quae mere tangunt fidem, conformiter ad ea, quae tradit S. Scriptura. — — — Quae quidem mensura (fidei, de qua loquitur Paulus in epist. ad Rom. XII. 3.) in duobus consistit, videlicet, vt non subtrahatur fidei, quod sub fide est: nec attribuatur fidei illud, quod sub fide non est. Vtroque enim modo mensura fidei exceditur, et a continentia S. Scripturae, quae fidei mensuram exprimit, deuiatur. Et hunc modum, DEO adiuuante, tenere volumus, vt nihil scribamur, vel doceamus Sacrae Scripturae dissonum. Quod si per ignorantiam vel inaduertentiam aliquid dissonum scriberemus, ipso facto pro non scripto habeatur — — — — — omnis homo dimittens rationem propter auctoritatem humanam incidit in insipientiam bestialem, vt comparatus sit iumentis insipientibus,

f) T. VII. c. V. Art. III.

bus, et similis factus sit illis — — — *Augustinus inter doctores celeberrimus dicit de ipso III. de Trinitate circa principium: noli meis litteris quasi scripturis canonicis inseruire: sed in illis et quod non credebas, cum inueneris, incunctanter crede: in istis autem, quod certum non tenebas, nisi certum intellexeris, noli firmum retinere — — — ex quibus patet, quod compellere seu inducere aliquem, ne doceat vel scribat dissona ab iis, quae determinatus doctor scripsit, est talem doctorem praeferre sacris doctoribus, praecludere viam inquisitioni veritatis, et praestare impedimentum sciendi, et lumen rationis non solum occultare sub modio, sed comprimere violenter. Nos igitur plus rationi, quam cuicumque auctoritati humanae consentientes, nullius puri hominis auctoritatem rationi praeferimus, attendentes quod omnibus existentibus amicis sanctum est prae honorare veritatem. Haec quidem ille: nos vero ad propositum reuertamur. Quanta sit reformatorum auctoritas vel ex eo patet, quod extra ecclesiasticam societatem ab hoc aut illo viro vere magno conciliatam (haud inaudita, nec antiqua loquor) salutis spem nullam esse temere aequae ac impudenter docuerint. Quam impium hoc sit, vel ex eo intelligitur, quod ab hoc honoris genere maxime abhorruerunt, longeque alia praeceperunt reformatores ipsi. LUTHERVS equidem se Catechismos suos, Confessionem Augustanam et*

Articulos Smalcaldenses nequaquam tamquam seueræ præcepta, ne pontifices imitari videatur, verum ut historiam, testimonium et fidei confessionem edidisse confiteor. Neque concilia, neque patres, neque se (se scilicet non excludit vir sapiens) quod si res etiam successerit quam felicissime, aequè bene rem acturos esse, ac egit S. Scriptura, id est DEVS ipse, grauitè non minus quam verè adfirmat. Qui restituendis pristinae integritati rebus sacris piam felicemque operam nauarunt, ceteri summi viri nunquam auctoritatem suam argumentorum loco posuerunt, nec aliis voluerunt persuadere, non esse a sententiis suis recedendum, sed in eo enisi maxime sunt, ut sublata omni humana fide soli DEO obsequerentur, et ad huius nuntium et voluntatem se totos conuerterent mortales. Restat, ut de conciliorum et symbolorum auctoritate, quæ mire quidem imminuta est, lex tamen et norma esse nondum desit, sententiam nostram proferamus. Sequemur autem consilium CALVINI: quoties concilii alicuius decretum profertur, inquirentis, expendi primum diligenter velim. quo tempore habitum sit, qua de causa habitum, et quo concilio quales homines interfuerint: deinde illud ipsum, de quo agitur, ad scripturae amussim examinari. Quum etiam sint, qui conciliorum auctoritatem magnam ac venerabilem esse existiment, sitam vero in doctrina, eruditione, veritate, potestate de-

decernendi aliisque virtutibus, quibus eminent illi viri, qui iisdem interfunt, et concilium constituunt; hi equidem non habebunt, cur diligentiam nostram, liberumque de patribus in conciliis leges ferentibus iudicium acculent.



LIBER SECVNDVS.

CAP. I.

DE NOMINE CONCILIORVM disquirere nil attinet, nec facile iis repugnabimus, qui dici putant a conciendo S. P. Q. R. vt comitia a coeundo: verum miror lites de *conciliis oecumenicis*, quae enim hoc nomine decorandi sint, conuenire inter se non potuerunt. Concilium, *ad quod sacrorum ministri omnes, vel episcopi saltem conuenissent*, nullum adhuc fuit. In Concilio quidem Nicaeno omnium ecclesiarum per cunctam Europam, Lybiam et Asiam, ministrorumque DEI capita in vnum coacta fuisse adfirmat EVSEBIVS, *g)* non tamen diffitetur, aliquos abfuisse, *h)* quibus Imperator Synodi mentionem scripto suo fecerit. Ex Hispania solus erat HOSIVS, episcopus Cordubensis, *i)* et ex

B 5

Gallia

g) L. III. de V. C. c. 7. et 8.

h) c. 6, 1. Conf. etiam theodoret. L. I. c. 9. 11.

i) quod testatur Eusebius de V. O. L. III. c. VII. ex quo

Gallia praeter NICASIVM nemo. Constantinopoli ex occidentali imperio nullus aderat praeter ASCHOLIVM Thessalonicensem. Quare mirus est scriptorum de Oecumenicis Conciliis dissensus. Alii ea esse dicunt, *quorum decreta primaria ad salutem totius ecclesiae spectant, eamque obligant.* Fas igitur erit quaerere, quaenam decreta sint *primaria*, qui *possint* spectare, et qui *spectent* ad totius ecclesiae salutem? ceterum vides, hanc definitionem disquisitioni de oecumenicorum conciliorum auctoritate non posse subiici sine aperto vitio, quod *circulum* vocant Logici, cum *obligatio*, de qua controuersia est, in definitione adeo doceatur. Alii id pro Oecumenico habent, *quod ex maiori parte orbis Christiani coactum, aut quod saltem ex toto Romano imperio, quod $\pi\alpha\sigma\alpha$ $\epsilon\iota\kappa\omicron\upsilon\mu\epsilon\eta$ vocabatur, conuocatum est, et ad quod episcopi tam orientales quam occidentales conuenerunt.* Non tamen ex solo numero Oecumenicum aestimatum esse, ex eo colligo, quod ad Constantinopolitanum contra Macedonium CL, ad Carthaginense VI. vero conuenerunt CCXVII. episcopi, quod tamen pro Oecumenico habitum non est. Quae sententia Concilii Nicaeni cum aliis particularibus

quo loco simul intelligitur, ne episcopum quidem Romanum concilio interfuisse. Etenim $\tau\eta\varsigma$ $\beta\alpha\sigma\iota\lambda\epsilon\upsilon\sigma\eta\varsigma$ $\pi\omega\lambda\epsilon\omega\varsigma$ nomen de vrbe Roma, non vero CPLitana sumendum esse, docet VALESIVS.

bus facta comparatione confirmatur. ATHANASIVS quidem in libro de synodi Nicaenae contra haeresin Arianam decretis, *l)* et in epistola ad solitariam vitam agentes, *m)* vtrum episcoporum in concilio Nicaeno numerus CCC superauerit, incertus est. EVSEBIVS *n)* CCL modo fuisse narrat: SOCRATES vero *o)* Eusebii verba repetens trecentos et amplius fuisse commemorat. Ex quo intelligis, alterum locum mendosum esse. Quod si vero etiam sequi lubet vulgarem sententiam, qua CCCXVIII. episcopos Nicaenae fuisse statuunt, sunt tamen Concilia, in quibus plures fuerunt, et quae maiori adeo iure Oecumenica vocari potuissent, si nomen scilicet ex episcoporum numero penderet, neque tamen vocata sunt. In Concilio Tyrio Anno CCCXXXV. habito, quod oecumenicum fuisse volunt Ariani, non Constantius modo a totius terrarum orbis episcopis condemnatum esse Athanasium adfirmat: verum ad illud ex vniuersa Aegypto et Lybia, Asia item et Europa episcopos conuenisse, docet quoque EVSEBIVS. *p)* Sardicensi, in quo ius appellationum ad sedem Romanam aut institutum, aut quod placet aliis, Pontificis in-

l) Opp. T. I. p. 402. edit. 1600. ex off. Comm.

m) ibidem. p. 660.

n) de V. C. L. 3. c. 9.

o) H. E. L. 1. c. 5.

p) de V. C. L. IV. c. 41.

inprimis affeclis, confirmatum est, si SOCRATI, *q)* qui *generale* fuisse adfirmat, et ATHANASIO, *r)* qui *synodum magnam* vocat, fidem habere velis, ex occidentis partibus CCC circiter episcopi, ex oriente vero LXXVI interfuerunt. Ad Ariminense Anno CCCLIX. habitum teste SOZOMENO, *s)* et SYLPICIO SEVERO *t)* conuenerunt CCCC et aliquot amplius episcopi. Atque Hunnericus Vandalorum rex apud VICTOREM VTICENSEM *u)* in suo adversus Catholicos edicto *ὁμολογίων* Nicaeae statutum a mille, et qui excurrunt, pontificibus de toto orbe in Ariminensi concilio vel apud Seleuciam amputatum esse: HIERONYMVS adeo (adv. Luciferianos) totum mundum ad hoc concilium confluisse ait. SANDIVS equidem *x)* hoc concilium quod *generale* vocant BELLARMINVS et BARONIVS, Arianum fuisse putat, quod ex eo, quod eius auctoritatem magnopere timuit Augustinus, non omnino efficitur. Ille vero: *nec ego Nieaenum, nec tu debes, ad Maximinum Arianum* inquit, *y)* *Ariminense tamquam praeiudicaturus proferre concilium: nec ego huius, nec tu illius*

q) H. E. L. II. c. 20.

r) Apol. 2.

s) H. E. L. IV. c. 16.

t) L. II. c. XLI.

u) L. 3.

x) Nucl. H. E. edit. alt. p. 171. 236. 238.

y) L. III. c. 14.

illius auctoritate detineris. Scripturarum auctoritatibus, non quorumcumque propriis, sed vtrisque communibus testibus, *res cum re, causa cum causa, ratio cum ratione certet.* Alii demum voluerunt oecumenicum esse, quod postquam promulgatum est, ab vniuersa ecclesia recipitur. Verum nec hoc verum est. Vt enim de illa, quae tam late pateat, consensione nihil dicam, sunt concilia particularia, Gangrense contra Eustathianos, 2) Carthaginense CALIXTO iudice a) anno a Christo nato CDXXV habitum, et Arausicanum secundum sub LEONE M. quibus vniuersa ecclesia (vox sensu vulgari sumitur) assensum dedit. Concilium Antiochiae A. CCCXLI. habitum, cuius orthodoxian, magno cum eruditorum plausu defendit SCHELESTRATENVUS, b) quod SANDIVS vero c) Arianum esse autumat, ab vniuersa etiam ecclesia suo quidem saeculo receptum esse fertur. Quibus omnibus vel illud addendum est, neque omnes conciliorum oecumenicorum canones esse ab vniuersa ecclesia receptos. d) Ex quo elucet, quod si de toto con-

2) quod approbavit etiam Lutherus teste WEISMANNO in H. E. p. 328.

a) in tr. de coniugio clericorum. Francofurti 1653. recuso p. 283. De Gangrensi. ibid- p. 203-206.

b) WEISMANNVUS. l. c. p. 325.

c) l. c. p. 123.

d) quod vir ille stabiliendae conciliorum auctoritatis studiosissimus FRANCISCVS SALMON docet

conciliorum oecumenicorum genere quaeris, non facile potuisse adfirmari quid sit concilium oecumenicum. e) Ex quo nos vero colligimus, conciliorum decreta quam diligentissime esse inuestiganda, neque vllam habere posse obligandi vim, quum supponant rationem et fidem ipsam, multa etiam adhibenda circumspectio sit. vtrum concilium sit oecumenicum, de quo tamen, quale sit, adhuc sub iudice lis est.

LIBER SECVNDVS.

C A P. II.

QVVM Protestantes inter se conuenerunt, QUATVOR esse concilia Oecumenica, NICAENVM contra Arium, CONSTANTINOPOLITANVM contra Macedonium, EPHE-SINVM contra Nestorium, CHALCEDONENSE contra Eutychetem, neque nos de conciliorum istorum numero disceptabimus. Quam vero aut his, aut ceteris omnibus auctoritatem tribuerint, non facile diuinaret homo, quid somnient doctorum capita, incuriosus. E larga exemplorum messe pauca decerpamus. Non EVSEBIVS modo f) maioris momenti controuersias non posse com-
poni

in libro: *Traité de l'étude des Conciles* 1726. sec. edit. Paris. recuso. P. I. c. II. Art. III, p. 105.

e) Salmon, ibid. p. 838.

f) de V. C. L. I. c. 51.

poni putat, nisi in synodis: verum CONSTANTINVS etiam eodem Eusebio teste g) ad ecclesias de habito Nicaeae Concilio scripsit, quidquid in sanctis episcoporum conciliis decernatur, id vniuersum *diuinae voluntati* esse attribuendum. GREGORIUS NAZIANZENSIS h) quatuor concilia vt quatuor evangelia veneratus est. AVGVSTINVS i) conciliorum saluberrimam esse ait in ecclesia auctoritatem. IVSTINIANVS l) sanxit: *vicem legum obtinere sanctos eccl. canones, qui a S. quatuor conciliis constituti sunt, et confirmati. Praedictorum enim, inquit, conciliorum dogmata sicut diuinas scripturas accipimus, et canones sicut leges obseruamus.* Fuerunt etiam post restitutas litteras doctores, iique purioribus sacris addicti, qui de conciliis illis magnifice sentirent. Doctissimus FABRICIUS in Bibliotheca Graeca m) iniquissimum ducit contra conciliorum auctoritatem assurgere. HEBENSTREITVS in systemate Theologiae oecumenicum concilium nihil potuisse decernere ait, quod fuerit a pietate alienum, recte eam ob rem a SCHVBERTO notatus. Quatuor professores Leidenses in censura Confessionis Remonstrantium: *Synodi seu nationales,*

g) Ibidem. L. III. c. 20.

h) L. I. ep. 24.

i) Ep. CXVIII. ad Ianuar.

l) Nouell. 131. c. 1. et Iur. Canon, Dec. 17. c. 2. seq.

m) Vol. XI. p. 99.

n) Sect. XII.

tionales, seu provinciales suas confessiones non eo tantum sine publicant, ut indicent, quid ipsi sentiant, pro vero et falso habeant, credant aut non credant, et sensa mentis suae exprimant, sed etiam ut iudicent, quomodo de iisdem doctrinis sentire et loqui omnes orthodoxi ex scripturis debeant. Quam sententiam secuti multi alii sunt. Quae an firma sint conciliorum sanctitatis praesidia, paullo post videbimus, si ante pauca de ANTIQVITATE eorum disputa-uerimus, ab hac enim conciliorum auctoritatem repetere etiam solent fidei humanae alumni. At mere libini et repugnant ipsi, parumque constare videntur dum antiquitatis commendatione vtuntur, ante laeculum tamen quartum, vel antequam ad Christi norum societatem se adiunxerat Imperator Romanus quia ecclesia valde premebatur, et sacra vix in subterraneis conclauiibus tuto peragi poterant, oecumenicum atque legitimum adeo concilium, conuocari potuisse negant. Quod si igitur de quorumvis antiquitate disputant non conueniet secum, quam tenent, sententia: sin oecumenica tantum salua esse volunt, probari nequit antiquitas. Quae de concilio a IESV habito, ac quinque synodis Apostolicis adferunt, quae necessariam vim habeant, probationibus egent: nullum e contrario dubium est, saeculo primo nullum habitum esse concilium, neque conuentum Hierosolymitanum, cuius historia Act. XV. legitur, fuisse concilium,

et

et si fuisset, nullum post saeculum primum potuisse haberi, quia Apostoli nullos habuerunt successores. o) Res vbique optime componeretur, si iustam traderent concilii definitionem: prout enim aut ad plures, aut ad pauciores conuentus pertinere concilii nomen voluerint, diuersa etiam erit quaestionis resolutio. Quod si THOMASII definitio placet, qui: p) *concilium, inquit, est conuentus cleri sub auctoritate principis, vel directi, vel sub aliis praetextibus institutus, eum in finem, ut dissentientes a se haereticos declarent, et ope brachii saecularis coerceant*; vides, sanctos istos conuentus nec diuinae institutionis, nec originem eorum alte adeo repetendam esse. Sin THOMASIVM sequi recusas, et cum aliis facis, qui concilium esse statuunt *conuentum ecclesiasticum, in quo de rebus ad verum DEI cultum spectantibus constituitur*, et concilia celebrata esse scito, quae definitioni isti subiici nequeant, et multos, in quibus de illis rebus constituitur, habitos esse conuentus, et haberi, quibus conciliorum auctoritas tributa nunquam est. Neque nos equidem videmus, qui ex illa definitione effici possit, conciliorum auctorem

C DEVM

o) Conf. MOSHEMII Instit. hist. eccl. L. IV. Helmst. 1764. CHRISTIANI THOMASII

vindiciae iuris maiestatici circa sacra. §. 24. Eiusdem diff. de Iure principis circa haereticos.

§. 46. 47.

p) diff. de Iur. Princ. c. haer. §. 45.

DEVM esse, quum concursus eiusmodi hominum neque praeceperit, ne laudauerit quidem. Subiecta equidem sunt concilia, et quae in his geruntur, diuino moderamini: quam vero ob rem eorum auctor DEVS dicendus omnino non est, propterea quod mala etiam, et res pessime gestae se eius imperio subtrahere nequeunt. Male in subsidium vocantur verba IESV: q) *οὐ γὰρ εἰσὶ δύο ἢ τρεῖς συνηγμένοι εἰς τὸ ἕμὸν ὄνομα, ἐκεῖ εἶμι ἐν μέσῳ αὐτῶν.* CALVINVS: r) *si ex scripturis*, quae sit conciliorum auctoritas quaeritur, nulla exstat illustrior promissio, quam in hac Christi sententia: vbi duo aut tres congregati in nomine meo fuerint, illic in medio eorum sum. *Verum id nihilominus in particularem quemque coetum competit, quam in concilium vniuersale. Neque tamen in eo haeret quaestionis nodus, sed quod addita est conditio, ita demum fore Christum in medio concilii, si in suo nomine congregetur. Quare ut millies episcoporum concilia nominent aduersarii, parum promouebunt: nec ante efficient, ut credamus, quod contendunt, regi a Spiritu Sancto, quam fidem fecerint, congregari in Christi nomine. Si quidem tam possunt impii improbique episcopi aduersus Christum conspire, quam boni et probi in eius nomine coire. Huius rei luculento nobis documento sunt plurima decreta, quae a talibus conciliis prodire.*

q) Matth. XVIII. 20.

r) Instit. L. IV. c. IX. §. 2.

diere. *Señ hoc postea videbitur. Nunc tantum uno verbo respondeo, Christum nihil polliceri, nisi iis, qui in suo nomine congregantur. Quid ergo illud sit desiniamus. Nego in Christi nomine congregari eos, qui abiecto DEI mandato, quo vetat quidquam addi verbo suo, aut detrahi, proprio arbitrio quidvis statuunt; qui non contenti Scripturae oraculis, hoc est unica perfectae sapientiae regula, de suo capite nouum aliquid comminiscuntur* — — — — Qui-
bus nostro iudicio vel hoc addendum est, neque ex verbis illis IESV effici posse, omnia recta fore, quae constituerint, quicumque in sanctissimo nomine conuenerint. Religiosissimi enim homines errandi periculo non sunt immunes: quae ipsis immunitas nobis equidem consciis nusquam promissa est. Vtrum vero in sancto isto nomine ad iudicandum fratres et damnandum conuolarint, ex infra dicendis facile quisque colliget. Nunc vero audi, si placet, quare nullam conciliis, fidem habeamus. In rebus diuinis, si neque rationis lucem sequi, neque rerum usum adhibere, sensibusque nostris vti possumus, fide dignum non habemus, de quo haud exploratum est, eum in errore versari non posse. Quin vero coacti ad concilia episcopi errare possint, et errauerint, dubitare nefas est. Patres ecclesiastici hoc confirmant, s) et non Pontificiorum modo eru-

C 2

s) Vid. GODOFR. WEGNERI diss. de conciliorum auctoritate §. 9. p. 18.

ditissimus quisque, sed GREGORIUS VII. adeo fatetur, *t*) et ipsa rei naturaeque humanae necessaria ratio comprobatur. Qui igitur Conciliis caecam fidem adhibent, Papismum reuocare, vel in Papae locum monstrum centiceps collocare videntur. Romanum enim episcopum hominem erroribus immunem esse negant: conciliis vero, ad quae plures homines conueniunt, immunitatem istam vindicant. Colunt igitur Papam, non quidem illum e sede Romana iurandantem, sed in plura corpora diffusum. Minus etiam videntur a ratione abhorrere, qui vnum hominem ab erroribus liberum esse statuunt, quam qui homines erroribus obnoxios, qui saepius in minimis caecutiunt, ubi se in societatem contulerint, omnino non errare, suaeque placita legum auctoritate munire, ceterorumque fidei praescribere posse docent. Vnicam nouimus fidei normam euangelium filii DEI. Humana auctoritas ecclesia vere Christiana omnino exulare debet: vnum habemus religionis moderatorem, vnum legislatorem, qui nos sanguine suo redemit, praeter hunc nec fidei, nec vitae magistrum habemus. *Εἰς ἓστιν ὁ νομοθετῆς*, inquit S. IACOBVS *v*), *ὁ δυναμενὸς σωσαι καὶ ἀπολεσαι· συ δὲ τις εἶ, ὃς κρίνεις τὸν ἕτερον*. Quo sensu Apostolico imbutus: *possunt ergo*, inquit

LV-

t) Conf. MOSHEMIVS l. c. saec. XI. P. II. c. III. p. 373. Not. q.

v) Ep. IV. 12.

LV THERVS, x) *episcopi congregati, seu concilium errare sicut alii homines tum publici, tum priuati. — — congregari facile est, sed in Spiritu S. congregari non possunt, nisi Apostolorum fundamentum secuti, — — nemo igitur tenetur credere decretis ecclesiae representatiuae i. e. conciliis, nisi Apostolorum scripturis iudicent et loquantur — — et ipsimet dicunt, quod vnus homo potest toti concilio contradicere, si meliorem rationem aut scripturam habuerit. Dicunt hoc, sed mentientes, cum factis hoc ipsum fortiter negent et damnent. Conciliorum ergo omnium, Oecumenicorum quoque nulla est auctoritas, nisi quatenus concordant eorum decreta cum sacris litteris, atque hae igitur, minime vero humana illa decreta, quid credendum sit, constituunt. Alias enim cuncta scripta humana, quatenus cum sacris libris conueniunt, eandem haberent auctoritatem. Si repugnant diuinis oraculis, licet Imperatores et episcopi omnes auctoritate, armis, execrationibus muniant ea et defendant, contemnuntur merito, et ceu Christiana sanctitate indignissima exploduntur. Conciliorum igitur auctoritate, Symbolis, Canonibus, Decretis nulla veritati additur sanctitas, nulla firmitas detrahitur. Haec, quae generatim dicta sunt, propius ad rem propositam referamus.*

C 3

LI-

x) in disput. de potestate concilii 1536. habita.

-Thes. 12. 18. 24. 26. 27.

LIBRI SECVNDI

CAP. III.

CONCILIVM OECVMENICVM, deceteris enim, quorum ipsi non admittunt auctoritatem, nulla est controuersia, ante saeculum quartum habitum esse negant. Inquiramus igitur, *quaenam fuerit illo saeculo, quo oecumenica concilia coacta sunt, rerum sacrarum facies*: an ea fuerit, vt exemplaris instar esse possit, ad quod se accommodent consequentium aetatum homines omnes. Dignissimi fide auctores Christianorum ciuitatem isto aeuo, quod res externas attinet, amplitudinem, splendorem, libertatem laeta cepisse incrementa, et post iniqua fata caput fluctibus quasi egressam sustulisse referunt. Ex publico enim CONSTANTINI ad Christianorum castra transitu non exigui in illorum res redundarunt fructus. Vt vero internus ecclesiae status nunquam fuit pulchrior, quam sub vexationibus, ita in felicitate sub Constantino externa intus sordere, et si integritatem, puritatem, concordiam, in doctrina, vita, caerimoniis, cultu spectes, ab antiqua forma aberrare coepit. a) Nec certum est, quid *de Constantini ad Christianorum* socio-

a) Veniunt nobis in mentem, quae legimus apud EUSEBIUM in Hist. Eccl. L. VIII. c. I. et in SEMLERI hist. eccl. T. I. p. 125. Ast rem eandem infra attingemus.

societatem transitu, eiusque fide virtutibusque ac vitiis statuendum sit. Fuit, b) qui Constantinum nunquam fuisse vere Christianum, ex eo colligeret, quod in huius imperatoris, quae adhuc supersunt, monumentis ac statuis nulum omnino visae ante victum Maxentium in caelo crucis vestigium, nec vllum Christianae religionis signum extet. c) Auctores, qui Constantinum crucem illam vidisse commemorant, quo loco viderit, haud conueniunt. Hi in Galliis, et quidem Augustoduni, illi in Byzantina ciuitate, alii LACTANTII auctoritatem secuti in castris vidisse dicunt, dum obsideret Romam Maxentium tyrannum debellaturus. Nos equidem mirari solemus, qui factum sit, vt crucem non viderit exercitus, neque amici Imperatoris se videre adfirmarint, antequam mirabilem hanc rem ex ipso audiuisent: qui factum sit, vt in exercitu, si hic prodigium vidisse credendus sit, nullus exortus tumultus sit. Scrupulum etiam mouet narratio de cruce a CONSTANTINO visa. d) ZOSIMVS

C 4

e) ad

b) BLAINVILLE in Itinerarii P. II. p. 535. Lemgouiae 1765. edit.

c) Quam rationem nos equidem non probamus. Quot antiqua monumenta temporis iniuria interierunt? Conf. EVSEBII Hist. Eccl. L. IX. c. IX. p. 359. sec. edit. Valesii.

d) Conf. PHILOSTORGIVS L. III. §. 26. p. 57. Edit. Gen. 1643. et Gothofredi diss. p. 187. et seq.

e) ad Christianorum partes transiisse tradit, quoniam a flaminibus lustratione postulata, hisque respondentibus, non esse traditum lustrationis modum, qui foeda adeo Constantini scelera eluere posset, quod confirmat etiam SOZOMENVS f), ab Aegyptio quodam Hispano genere audiuerit, sententiam doctrinae Christianorum habere vim abolendi quodcumque peccatum. Ex his quisque facile intelliget, quid de Constantini fide habendum sit. Quod si nobis hac de re iudicium ferre fas est, similis esse videtur Constantinus Chlodouaeo, de quo vide MOSHEMIVM, g) vt itaque iis non contradicamus, qui cum STRVVIO h), ARNOLDO i) aliisque Constantinum simulatorem fuisse statuunt. k) Vt hoc vno vtamur, infra enim hunc locum iterum attingemus, oratio, quam in Concilio Nicaeno habuit, satis declarat, eum aut supersticiosum fuisse, aut simulatorem. Ad episcopos, qui libellos tradiderant: l) *DEVS* vos, inquit, constituit sacerdotes, et potestatem vobis dedit de nobis quoque

e) L. II. p. 104. Edit. Oxonii 1679.

f) L. I. c. 8.

g) l. c. Saec. V. P. I. c. I. §. 5. p. 175.

h) In diss. de Constantino M. ex rationibus politicis Christiano. Ienae 1713.

i) Kirchen- und Ketzerhistorie. T. I. L. IV. c. II. §. 3.

k) Conf. Allgemeine Weltgeschichte T. XIV. p.

37-42.

l) RVFFIN. Lib. I. c. 2.

quoque iudicandi, et ideo nos a vobis recte iudicamur. Vos autem non potestis a quopiam iudicari. Propter quod DEI solius inter vos exspectate iudicium, et vestra iurgia quaecumque sunt, ad illud diuinum reseruentur examen. Vos etenim nobis a Deo dati estis dii, et conueniens non est, ut homo iudicet deos. Addidisse THEODORETUS ait: se, si forte oculis conspexisset suis episcopum alienum thorum labefactantem, obtekturum paludamento sceleratum facinus, ne cui forte cernentium illud visum noceret. Ex quibus quisque efficiat, quid possit et velit. Quod si vero etiam dubium nullum esset, quin Christianae doctrinae ex animo assenserit, de pietate eius tamen veraque religione longe ampliori iure dubitamus. Tot enim tantaque habemus antiquorum de eius vitiis testimonia, ut taceri aut excusari bona fide nequeant. Vnanimis est auctorum in commemoranda eius crudelitate consensus. Incredibiliter durum fuisse in exigendis vestigalibus, ut corporibus eorum, qui propter paupertatem extremum damnum sustinere non possint, flagra, tormentaque adhibita sint, refert ZOSIMVS. m) EVTROIYVS vero: n). Licinio bellum, inquit, intulit; quamuis necessitudo et affinitas cum eo esset — — postremo Licinius nauali et terrestri praelio victus apud Nicomediam se dedit, et contra religio-

C 5

m) l. c. p. 115.

n) Brev. Hist. Rom. L. X. c. 4.

ligionem sacramenti *Theſſalonicae priuatus occiſus eſt* — — *verum inſolentia rerum ſecondarum aliquantum Conſtantinum ex illa fauorabili animi docilitate mutauit.* Primum neceſſitudines perſecutus, Crispum filium, egregium virum, et ſororis filium, commodae indolis iuuenem interfecit, mox uxorem, poſt numerosos amicos. *Vir primo imperii tempore optimis principibus, ultimo mediis comparandus.* Quod iudicium confirmant praeter Zoſimum Hieronymus, Suidas, Oroſius, Socrates, Sozomenus, Philoſtorgius, Ammianus alique. Crudelitatis imperatorem arguunt etiam ob interfectum Sopatrum, cuius interitum cum illo Socratis conferre non dubitant. o) Quam ſuſpicionem augent, quae de regibus, multisque captiuis aliis immanibus beſtiis obiectis narrantur. p) Sit ergo iudicium penes candidum humanarum rerum aeſtimatorem, iurene an iniuria SIDONIO APOLLINARI teſte, *Conſtantiini tempora illis Neronis ſimilia eſſe dixerit Conſul Ablauius.* Aliorum etiam vitiorum accuſatus eſt: datae fidei fuiſſe immemorem, et voluptati deditum, et prodigum. q) Fuit etiam ſuperſtitioſus. Quum eſſet lepra infectus, magos incantatoresque ad

o) Conf. EYNAPIVS in vita Aedeſii. Col. Allobr. 1616. p. 34-40. quem ſecutus eſſe videtur ZOSIMVS Lib. II.

p) Allgem. Welthiſt. T. XIV. p. 21. §. 19. et p. 53. §. 55.

q) ZOSIMVS l. c. p. 89, 108.

ad hanc curandam adhibuit, qui teste NICEPHORO *r)* morbum adauxerunt. Graecorum, id est, ut loquitur NICEPHORVS, hominum a vera fide alienissimorum, vel secundum ZONARAM Capitolini Iouis sacerdotum, vel quod placet CEDRENO, Iudaeorum consilio voluit se lauare in piscina innocentium puerorum sanguine eoque recenti adhuc et vaporante repleta, nec aliter quam lugentium plorantiumque filios suos muliercularum adspectu ab hoc consilio dimotus est. Qui vero factum fit, ut nihilo fecius summis laudibus extulerint Constantinum, is sane intelliget, qui didicit, quantam vim in animos hominum habeant largitiones. Sacrorum enim ministros, cultores laudis suae ac praecones immensis beneficiis cumulauit. CVNAEVS in praefatione ad Iuliani Caesares *Constantini virtutes plus quam humanae utique celebrantur, et utramque paginam faciunt. Fecit ille quidem multa, quae boni principis famam deturpent. Nam et imperii opes in luxum absumsit, et auri lustralis exactione crudeliter attriuit populum; verum haec Graeci, quibus animus spei ac gratiae obnoxius erat, cernere aut non poterant, aut nolebant. Itaque animus in verba ambitiosus, oblitus legis pressiorisque iudicii post tot accepta beneficia, nihil iam nisi maximas illius laudes magna mercede meditabatur. Quanta etiam fuerit laudatorum*

r) Niceph. Call. H. E. L. VII. c. 33.

torum religio, siue vt rectius dicamus, superstitione, exemplo suo comprobatur ZONARAS, s) qui: *memoratur autem, inquit, inclytus hic imperator pecuniam et citra delectum insumsisse, et minori cum delectu comparasse, ita vt eius in largiendo studium magnificentiae non tribuatur, sed contra verum temperandum est calamo, ne quam diuino illi viro labem adspergam.* Neque libros de *Vita Constantini*, qui vulgo tribuuntur EVSEBIO, fide dignos esse, vel SOCRATES vidit, t) cuius iudicio auctor librorum Imperatoris laudes et panegyricam orationem contexere magis in animo habuit, quam res gestas accurate commemorare. Veriorem illius imaginem expressam habes apud NATALEM ALEXANDRUM. v) *Irrisor potius fuit, quam blandus: Traianum herbam parietariam ob titulos multos aedibus inscriptos appellare solitus erat. Vulgari prouerbio, Trachala, decem annis praestantissimus, duodecim sequentibus latro, decem nouissimis pupillus ob profusiones immodicas numinatus. Hunc in Constantini principatu tamquam in pulcherrimo quodam vultu naeuum notauit Eusebius, quod pessimos ac rapaces homines* ad

s) L. XIII. c. 4. T. II. edit. Paris. 1687. p. 10.

t) H. E. L. I. c. 10. p. 10.

v) H. E. Saec. IV. cap. ult. p. 179. vel potius in excerptis ex libris SEXTI AVRELII VICTORIS de vita et moribus Imperatorum. In Hist. Rom. Script. a SYLBURGIO Francof. MDCXXXVIII edit. T. I. p. 543.

ad amicitiam suam, et ad publica officia adscivisset: et quod fraude et calliditate quorundam hypocritarum fuisset saepissime circumventus.

Quae ergo Constantini religio fuit? quae eius potest esse in rebus sacris instituendis, praecipendis, mutandis apud prudentiores homines auctoritas? WEISMANNVS equidem *x*): *Annon Constantinus ipse persecutionem, vel aliquam saltem illius speciem mouerit in orthodoxos? problema est historicum. —*

— Id vero exploratum est, hunc imperatorem ecclesiam Christianam magis persecutum esse suis beneficiis, quam afflictionibus, cunctis probantibus veritatem dicti illius coelestis, quod secundum aëta Sylvestri fabulosissima desuper tunc sonuit: Hodie venenum effusum est in ecclesiam. Pro inconstanti, quo erat, ingenio nunc cum profanis fecit, nunc cum Christianis, modo Catholicorum, modo haereticorum amantior. Quare hominum multi fuerunt, qui, ut imperatoris gratiam consequerentur, domini exemplum imitati religionem simularent, speque aut metu ducti nunc huic disciplinae, nunc se illi addicerent. Incredibilia damna rebus sacris attulit Constantinus. Quum enim profanorum sacerdotum dignitatem et rēditus in episcopos contulerat, factum est, ut opulentiam, potentiam, honores, splendidam auctoritatem sectarentur, turpissimisque se libidinibus traderent. Ex quo noua enata mala sunt. Qui
in

n) in hist. eccl. Saec. IV. §. 47. p. 343.

in sacerdotum locum venerant sacrorum ministri multos ritus, e quibus deinde ortum traxerunt opiniones, ex paganorum fanis in sua templa transtulerunt, seminaque Papismi sparserunt. Videmus, quamquam concilium Eliberitanum Anno CCCIV praesente Hosio Cordubensi celebratum in coemeterio cereos profanorum more accendere, et in ecclesia imagines pingi vetuit, cereos et luminaria in funeribus, aromata inter preces et sacramenta incensa, religiosam abstinentionem certi ciborum generis, coelibatus admirationem, peregrinationes ad templum Hierosolymitanum, et martyrum sepulchra, et ex horum nimia veneratione ortam sanctorum inuocationem, orationes etiam pro mortuis, sacramentorum abusum, mortuos sacro lauro imbutos, his etiam et infantibus sacrum panem praebentes ministros. Adferebantur ad baptismum lumina accensa, baptizandi corpus vngebatur, baptizati ori sal iniiciebatur, sacer panis domum asportari, et viatici loco dari coepit, immo tamquam medicina contra morbos adhibebatur. Quare AVGVSTINVS de saeculo quinto scripsit: *omnia itaque talia, quae neque sanctorum scripturarum auctoribus continentur, nec in conciliis episcoporum statuta inveniuntur, nec consuetudine vniuersae ecclesiae roborata sunt, sed diuersorum locorum diuersis moribus innumeraliter variant, ita ut vix aut omnino nunquam inueniri possint caussae, quas in iis instituendis* ho-

homines secuti sunt; ubi facultas tribuitur, sine ulla dubitatione refecanda existimo. Quamuis enim neque hoc inueniri possit, quomodo contra fidem sint: ipsam tamen religionem, quam paucissimis et manifestissimis celebrationum sacramentis misericordia Dei esse liberam voluit, seruilibus oneribus premunt, ut tolerabilior sit conditio Iudaeorum, qui etiam, si tempus libertatis non agnouerint, legalibus tamen sarcinis, non humanis praesumptionibus subiiciantur. — —

— Quae de vestigiis Iesu monti oliueti impressis, cruceque Helenae beneficio tum reperta narrantur, aevi istius sensum aperte satis prodere videntur. y) Quo animo fuerint in homines alienas a suis sententias secutos promulgatae aduersus haereticos constitutiones declarant. — — Nullus haereticis mysteriorum locus, nulla ad exercendi animi obstinationis dementiam pateat occasio. Sciant omnes, etiamsi quid speciali quolibet rescripto per fraudem elictoribus huiusmodi hominum genere impetratum est, non valere. Arceantur cunctorum haereticorum ab illicitis congregationibus turbae. Haec quidem sanxit THEODOSIVS M. A.D. CCCLXXXI. z) et Anno CCCLXXXIII. Vitiorum institutio, Deo atque hominibus exosa, Eunomiana scilicet, Ariana, Macedoniana, Apollinariana, caeterarumque sectarum, quas verae religionis venerabili cultu catholicae ob-

y) Sulpicius Severus in Hist. L. II, c. 33. 34.

z) Conf. Codex Theod. T. VI, p. 117.

obseruantiae fides sincera condemnat, neque publicis, neque priuatis aditionibus intra urbium atque agrorum ac villarum loca, aut colligendarum congregationum, aut constituendarum ecclesiarum copiam praesumat, nec celebritatem perfidiae suae, vel sollemnitatem dirae communionis exerceat: neque vllas creandorum sacerdotum usurpet atque habeat ordinationes. a) Quantum vero ab antiqua disciplina, et liberali pacis studio, sine quo Christiana religio nulla est, abhorruerint sua aetate sacrorum ministri, et EVSEBIUS narrat loco supra citato b) et SVLPICIUS SEVERVS. Hic: c) — — inter nostros perpetuum, inquit, discordiarum bellum exarserat: quod iam per quindecim annos foedis dissensionibus agitatum nullo modo sopiri poterat. Et nunc cum maxime discordiis episcoporum turbari, aut miseri omnia cernerentur, cunctaque per eos odio aut gratia, metu, inconstantia, inuidia, factione, libidine, auaritia, arrogantia, desidia essent deprauata: postremo plures aduersum paucos bene consulentes insanis consiliis, et pertinacibus studiis certabant: inter haec plebs Dei, et optimus quisque probro atque ludibrio habebatur — — Quidquid igitur THEODOSIVS de his, qui super religione contendunt, edixit, haud magnam habuisse vim videtur — — — Neque,

a) ibidem p. 127. pluraque huius generis sunt edicta.

b) Hist. Eccl. L. VIII. c. I.

c) L. II. c. 51.

Neque, si ego quid video, illata illo aevo profanis iniuria excusari potest. MOSHEMIVS equidem *d)* antiquiorum auctorum multos credo secutus, ex eo, quod superstitionibus bellum indixit Constantinus, colligit, tum demum imperatorem animum vere Christianum sumsisse: ut ego vero illius religionem exploratam adeo non habendam esse arbitror, ita persuadere mihi nequeo, Christiani regis esse, exscindere templa profanorum, sacraque eorum vi et armis omnino tollere. Praecepta ex hoc genere fuerunt quidem sub veteri testamento, quorum vero longe alia ratio est. Nostro equidem qualicumque iudicio, Christiana religio — — at vera illa et integra, non *traditionaria*, nec *sectaria* — — non vi, et abolendis alienis sacris, quod ab eius auctoritate abhorret, sed persuasione suaque sanctitate propaganda est. Quod vidit vel ipse profanus auctor LIBANIVS *e)* *Oportet enim ista persuadere, non cogere: si vero qui illud non potuit, isto utatur, nihil promouet, videturque id infirmum esse. Nonne vero fertur, et istud inter illorum ipsorum leges esse, ut persuasio quidem laudetur, κακως δὲ ἀναγεῖν τὴν ἀνάγκην.* *f)*

D

CON-

d) l. c. saec. IV. P. I. §. 7. p. 130.

e) In IACOBI GOTHOFREDI opusculis historicis iuridicis, politicis 1634 editis extat Libanii Antiocheni pro templis gentilium non exscindendis ad Theodosium M. Imp. oratio p. 18.

f) Conf. ad h. l. comment. GOTHOFREDVS. p. 52.

CONSTANTINVS equidem neque hac in re sibi constitit, vt difficile sit homini veri studio iudicium ferre. Quamquam enim aduersus aruspices leges tulerat: *g)* de iisdem tamen aruspibus consulendis scripsit ad vr- bis praefectum. *h)* Erat vero imperator iam per nouennium Christianismo imbutus, et non solum consulendorum aruspicum Romanis, verum magicarum etiam artium impune exercendarum potestatem fecit. *i)* Patriis adeo sacris *ὁ ὑμῶν ἐνεκα μαλὺν ἢ χρείας* vsus esse, refert ZOSIMVS. *l)* LIBANIVS vero: *m)* Constantinum reditus templorum et donaria iuris sui fecisse, atque in CPlitana vrbe aedificanda ea impendisse, at solemnia gentilitia intacta reliquisse. Sacrilegii illius vero *n)* sat magnas poenas dedisse, quod, qui de genere ipsius erant, mutuo sese confecerint, stirpsque eius tandem omnis defecerit, cui satius fuisset, stirpem aliquam superstitem relinquere, quam Constantinopolim tot impensis, aliarumque ciuitatum nuditate atque imprecatione excitare. Secundum THEODORETVM *o)* interdicto suo sa-
cra

g) BARON. Ann. T. III. A. C. 319. p. 198.

h) Ibidem. Ao. 321. p. 209. et A, 324. p. 213.

i) Conf. Cod. Theod. L. XVI. Tit. X. Ed. I. et comm. in illud edictum.

l) l. c. p. 103.

m) l. c. p. 9. et 43.

n) ibidem p. 22.

o) H. E. L. V. c. 20.

cra daemonum prorsus sustulit, sana tamen non subuertit, sed inaccessa esse voluit. Cui auctori contradicit EVNAPIVS, *p*) Constantinum sana toto orbe celebratissima euertisse. Referunt alii auctore HIERONYMO, edicto Constantini A. D. CCCXXXII promulgato subuersa esse gentilium templa. At quin sacrificia ab eo prohibita sint, dubium nullum est. *q*) De successoribus certior est sententia. CONSTANS vetuit sacrificia: *r*) CONSTANTIVS *s*) de templis occludendis et prohibendis sacrificiis edicta sanxit. Tertio anno post *t*) simulacrorum auctoribus poenam capitis minatus est. THEODOSIVS *v*) sacrificia, templorumque ad ea celebranda ingressum, cunctis etiam hominum ordinibus cultum gentilitium omnem prohibuit. Nec edicta

D 2

solum

p) l. c. p. 33.

q) Conf. Cod. Theod. L. XVI. T. X. Ed. I. et II. Nec non EVSEB. de V. C. L. IV. c. 23. et 25. et VALESIVS ad h. l. Conuersio fani; quam panegyristae instar commemorat EVSEBIUS de V. C. L. III. c. 55. (de quo templo vide ZOSIMVM L. I. et SELDENVM in syntagmate secundo de diis Syris) propter perpetrata in eo horrenda facinora non omnino improbari, excusari e contrario potest destructio templi Aesculapii. EVSEB. l. c. c. 56.

r) Ao. 341. Cod. Theod. l. c. p. 261.

s) Ao. 353. Ibidem p. 263.

t) Ao. 356. Ibid. p. 266. Conf. etiam LIBANIVS l. c. p. 10. 44. 45. 23. 55. 33-36.

v) Ao. 381. Cod. Theod. l. c. p. 266. et Ao. 392. ibidem p. 273. 274.

solum sanxit Theodosius, verum templa etiam exscidit. x) nec aliter sensisse ceteros huius aevi imperatores, quas tulerunt, leges demonstrant. y) Quid? quod monachi in aedes sacras impetus fecerunt, delatas vero querelas non audiuerunt episcopi. z) Quod si igitur istius aevi mores, Constantini ceterorumque imperatorum animum, sacrorum immutationem, illatam et haereticis et profanis iniuriam, atque alienam propagandae religionis rationem diligenter tecum in animo consideraues, non difficile erit iudicare, an praesulibus, qui mala illa excitarunt, fas fuerit Christianis, quotquot dehinc futuri essent, omnibus leges praescribere? Facilius credam, Scholasticorum aculeatum tortuosumque disputandi genus barbaris saeculis mire celebratum sempiternas fore philosophorum delicias, et doctores illos *Angelicos* et *Seraphicos* omnis sapientiae auctores esse. Causa enim humana ageretur: in diuina vero delirare, caecosque duces pertinaci studio sequi longe est periculosius.

LIBRI

x) THEODORET. L. V. 21. 22. SOROM. VII. 15.

y) Cod. Theod. p. 277. 294. seq.

z) LIBANIUS l. c. p. 11. 13.

LIBRI SECVNDI

CAP. IV.

VIDIMVS equidem capite superiori, quis fuerit saeculorum, quibus oecumenica concilia habita sunt, genius: nunc operae pretium erit, patrum, quorum decreta sancta adeo esse volunt, propius intueri **MOR-ES.** At qui alienum ab omni partium studio animum habet, simul ac antiquarum rerum monumenta scrutatur, fastum videt, aliaque vitia, quibus illi non tam dogmatum, quam hominum a solitis opinionibus se auellentium iudices commaculati fuerunt. *a)* Gloriam sibi ex vana philosophiae, eiusque, ut erat illo saeculo, tenuis ac ieiunae ostentatione arcessentes, ad dialecticorum morem de rebus non tam ad religionem, quam scientiam theologicam pertinentibus subtilius disputabant. Quoniam vero in acutulis conclusionibus suis religionis caput situm esse, perperam sibi persuaferunt, factum est, ut, qui vocabulis recens in Theologiam inuectis uti dubitarent, tamquam profanos auersarentur. Quem impium morem utinam non imitati essent minores! Quis vero est, qui nesciat, ut nostri saeculi iniquitatem taceamus, et **CALVINVM**, et **LVTHERVVM**, et quod incredibile videri posset, ab homi-

D 3

nibus

a) **MOSHEMIVS** l. c. Saec. IV. P. II. c. II. §. 8.

P. 143. *et*

nibus puriorum factorum studiosis, inuidioso Arianorum nomine ornatos esse. Solebant vero non eos solum, qui a vocabulis illis abhorrebant, inter priuatos parietes multis incommodis afficere, verum vt res eo sollempnius ageretur, concilia etiam, quorum auctoritatem praedicare non desinebant, ad eos condemnandos cogere. THOMASIVS: *b)* cum tamen, inquit, non e re fuerit veras causas anathematum laicis manifestas facere, in conciliis et libellis condemnatoriis leues illae dissensiones metaphysicae vel similes sub specie grauium causarum fuere praetextae, uti fere et reges saeculi in manifestis, quae vocant, raro causas genuinas belli scribunt, sed praetextus. Quomodo se gesserint in conciliis, testis esto GREGORIUS NAZIANZENSIS, *c)* qui ingenue fatetur, se fugere concilia, laetum conuentuum horum exitum non vidisse, et ob *Φιλονεικίας* et *Φιλαρχίας* non minui et depelli mala, sed insigniter augeri. Inuentus etiam est *d)* in episcoporum vitia, ex quibus omnia mala in ecclesiam deriuentur, et quidem cum concilio Constantinopolitano contentione exorta sponte abiret. Quo animo fuerint patres Nicaeni, quidquid de his

prae-

b) Diff. de Iure Princ. c. haer. §. 31.

c) Ep. LV. ad Procopium. Opp. edit. Paris. 1630. p. 814.

d) Vid. vitam operibus praemissam. Quo ingenio fuerit Gregorius, quodque secutus sit consilium, cognosces ex RUFFINI H. E. L. II. c. 9.

praedicet EVSEBIUS, e) ex contentionibus intelligitur, quae inter eos de principatu, redditibus, rebusque similibus fuerunt, ut oporteret etiam imperatorem ad pacem hortari. f) Neque silentio dissimulare potuit EVSEBIUS, g) in ipso concilii primordio turpi mentis feruore abreptos esse episcopos: cum multa essent ex utraque parte proposita, magnaue controuersia in ipso disputationis ingressu concitata, imperator toleranter ac placide omnibus animum attendere, studio acri prolatas sententias sensim excipere, vicissim ferre opem utrique disputantium parti, eos magna cum contentione digladiantes paullatim reconciliare — — — Quae vero de his moribus iudicent viri integri verique amantes, exemplis suis comprobant CALVINVS ET PETRVS MARTYR. Ille: h) *quamquam, inquit, in illis quoque antiquis et purioribus est, quid iure desideres* — — — *quod nimio adfectu nonnunquam praecipites ferebantur. Huius postremi, quod omnium durissimum videtur, exemplum illustre extitit in Nicaena synodo* — — — *ipsi tantorum discriminum securi, immo velut grauitatis, modestiae et omnis humanitatis omisso quod in manibus erat certamine* — — *int-*

D 4

stinis

e) De V. C. L. III. c. 9.

f) RVF. L. I. c. 2. SOZOM. l. 16. GELASIUS in hist. Conc. Nicaeni L. II. c. 8.

g) l. c. c. 13.

h) Instit. L. IV. c. IX. §. 10,

stinis diffidiis sese proscindere coeperunt. — — —
— — Foedae criminationes audiebantur: libelli accusatorii volitabant: nec contentionum finis ullus factus esset, donec mutuis vulneribus se confodissent, nisi imperator Constantinus occurrisset — — — Quam multis partibus et alia, quae deinde secuta sunt, concilia lapsa fuisse verisimile est? nec longa demonstratione opus haec res habet. Si quis enim acta perlegat, multas illis infirmitates animaduertet: ne quid dicam grauius. Hic vero: i) ut vero adfectibus patres illi (Nicaeni) commoti fuerint et agitati, satis ex eo declaratur, quod ceu ἀλαστορες et furiae in sese mutuo inuehebantur, atque accusationibus, libellis famosis, et calumniis pium Imperatorem incitabant et inflammabant aduersus collegas, ut mirum fuerit, eum potuisse illorum intemperiem ferre. Conuocati erant, ut de religionis praecipuo capite agerent, et hoc omisso, bili et stomacho tantum indulgebant. Eo quoque processit eorum temeritas, ut se errare non posse venditarint, seque veram constituere ecclesiam, quam agat Spiritus S. et per quam loquatur. GREGORIUS quidem NAZIANZENSIS, ut e multis testibus aliquot modo excitemus, in encomio S. Athanasii l) patres Nicaenos a Spiritu Sancto coactos esse ait. Eandem sententiam

i) 1 Reg. c. XII. p. 104. Tiguri 1571.

l) Vid. ATHANASII opera T. II. p. 505. et GREGORII opera p. 381. in Orat. XXI.

tentiam sequitur GELASIVS, m) per patres Nicaenos locutum esse Spiritum Sanctum: et in compendio sanctarum et vniuersalium synodorum Gelasii historiae praemisso symbolum Nicaenum sanctissimi spiritus afflatu concitati patres edidisse dicuntur. Vel ipse Constantinus diuinam auctoritatem decretis Nicaenis habuit. In litteris enim n) ad ecclesias de synodo Nicaena: quae cum ita se habeant, inquit, libentibus animis hoc decretum tamquam donum Dei, et mandatum reuera caelitus demissum amplexamini. Nam quidquid in sanctis episcoporum conciliis decernitur, id vniuersum diuinae voluntati debet attribui. o) Quae opinio per proximum etiam saeculum propagata est. Patres enim Ephesini, vel rectius CYRILLVS solus, in epist. synod. Ephes. ad Nestorium p) magnam synodum per Sanctum Spiritum in vrbe Nicaea quondam conuenisse, eo credo consilio adfirmauerunt, quo facilius suis decretis diuinam auctoritatem conciliarent. Itaque Dominus noster IESVS CHRISTVS, inquit EVAGRIVS, q) contra quem blasphemias loqui non dubitauit Nestorius, per istud sanctum concilium decedit statuitque, eum et episcopatus dignitate abdicandum, et ab omni

D 5

con-

m) l. c. L. II. c. 12. p. 22.

n) Euseb. de V. C. L. III. c. 18.

o) Adde, quae leguntur apud Ruff. l. 2. 5. Gelas. L. II. c. 8. p. 20. c. 27. p. 39.

p) apud Gelasium in actis syn. Ephes. p. 105.

q) L. I. c. 4.

conuentu sacerdotum penitus excludendum esse. Quorum temerariis opinionibus grauem opponimus, maximeque rationi litterisque sacris consentaneam LVTHERI sententiam r): Superbe et falso, ne dicam blasphemae, iactant, sese in Spiritu S. legitime congregatos esse. Quis eos aut nos certos facit, quod Spiritus S. ad eorum Congregationem necessario sit alligatus? Quam quidem falsam auctoritatem sibi vltro sumsisse episcopos, non temere diximus. Vnde enim sciuit Constantinus hanc rem mirabilem, nisi ipsi eam persuasissent episcopi. Quod si Constantinus aut superstitione, aut quod credibilius est, adulandi causa, et politicis rationibus ductus honorem istum sacrorum administris tribuit: quin hoc tamen illis haud displicuerit, neque laudes declinarint, dubium nullum est. At ipsos de se perperam diuinum afflatum praedicasse, quo maior sit decretorum suorum auctoritas, vel ex eo elucet, quod haec sententia per theologos ipsos ad posteros propagata est. — — Quae tibi de Cyrillo mens est? cum in concilio Ephesino, Ioanne Antiocheno et episcopis eius dioecesis absentibus, re tumultuose gesta factionis suae iudicio et suffragiis Nestorium condemnasset, hunc vero, qui superuenerant, orientales episcopi re tota denuo cognita absoluissent, Imperatoris animum

r) In disputatione de potestate Concilii 1536. habita. Th. 15. 16.

largitionibus corrumpit s), eoque effecit, ut Nestorius a munere remotus maneret, doctrina eius ex ecclesia proscriberetur, amici in exilium pellerentur. O egregios illos viros, quorum vestigia premere laudabile, quorum opiniones pleno certe impuris adfectibus animo prolatas, defensas, ac legum instar sancitas in dubium vocare improbum putant! Non possumus, quin eorum miremur arrogantiam et auersemur, qua sibi ius, quod DEVS verbi sui ministris nunquam dedit, fratres condemnandi, de illorumque libertate, fortunis, vita etiam sententiam ferendi vindicant. *Haec concilia, inquit MOSHEMIVS, t) quorum nullum ante saeculi huius (secundi) medium vestigium unquam apparet, totam ferme formam ecclesiae mutabant. Nam per ea primum antiquis populi Christiani iuribus plurimum detrahebatur: episcoporum autem auctoritati ac dignitati haud parum accedebat: qui quum primum non diffiterentur, se ecclesiarum suarum legatos esse, verbisque populi agere, paullatim maiora sibi arrogabant, et potestatem sibi a Christo datam esse perhibebant, populo Christiano leges fidei, vitaeque dictandi.* *Deinde*

- s) Ut loquitur SALIGIVS in Eutychnismo ante Eutychem p. 257. quod scilicet de Eunuchis et eubiculariis, quibus magnopere fidebat Imperator, et qui ipsi quidvis persuadere poterant, intelligendum esse docet IABLONSKI hist. eccl. Saec. V. c. 3. §. 6. p. 150. Edit. prim.
- t) l. c. saec. II. P. II. c. II. §. 3.

Deinde quae primis temporibus obtinebat, summa episcoporum omnium paritas et aequalitas per haec concilia sensim tollebatur. Necesse enim erat, ut uni ex episcopis prouinciae, qui foedere iuncti erant, potestatis et iuris aliquid supra ceteros in conuentibus istis tribueretur: ex quo iura metropolitanorum nata sunt. Postremo quum mos habendorum conciliorum per uniuersum orbem Christianum peruasisset, et uniuersa ecclesia ingentis reipublicae ex multis minoribus compositae formam adeptae esset, certa ei capita in singulis terrarum orbis partibus praeficienda erant, quae totam molem quodammodo continerent. Hinc Patriarchae, et ad extremum Patriarcharum princeps, episcopus Romanus. Ne summus quidem generis humani doctor, quamquam summa vi ac auctoritate pollebat, ab erroribus repetit poenas, quibus inhumana saepius ferocitate in eos, qui a vulgaribus opinionibus recedunt, neque semper errant, animaduertunt episcopi. Quis dedit verbi diuini ministris potestatem faciendi iudicia? Constantinus equidem clericis permisit, quando essent in ius vocati, ut ad episcoporum iudicia prouocarent, horumque sententiam ratam esse, et aliorum iudicum sententiis plus habere auctoritatis, tamquam ab ipso imperatore prolatam statuit, v) ex quo magnum sacerdotum in occidente imperium idque a Christiana religione alienum originem traxit, quod Germaniae, Galliae totiusque Eu-

v) sozom. l. q.

Europae populi, postquam sese etiam Christo subiecerant, antiquos mores secuti, magnam sacerdotum in aestimandis litibus, coercendis scelestis hominibus, constituendis poenis, ac regenda adeo republica auctoritatem esse voluerunt: x) quae vero cum sacris litteris et doctrina Christiana conciliari nequeunt. Οἰδατε ὅτι οἱ ἄρχοντες τῶν ἔθνων κατακυριεύουσιν αὐτῶν, καὶ οἱ μεγάλοι κατεξουσιαζουσιν αὐτῶν οὐκ οὕτως ἔσαι ἐν ὑμῖν ἀλλ, ὅς ἐάν θελῇ ἐν ὑμῖν μέγας γενεσθαι, ἔσω ὑμῶν διακονος. γ) Ποιμανατε τὸ ἐν ὑμῖν ποιμνιον τοῦ θεοῦ, ἐπισκοποῦντες μὴ ἀναγκασως, ἀλλ' ἐκουσιως· μὴδὲ αἰσχροκερδως, ἀλλὰ προθυμως. 2) Docendi, consolandi, hortandi, DEI etiam comminationes, non suas, interpretandi potestas sacrorum ministris data est, non iudicandi, DEO propria. Neque excusari potest, in conciliis partem litigantem simul iudicis personam egisse. Ad Nicaeni sententiam atque auctoritatem Ariani minime omnium prouocarunt. Si quid vero videmus, is modo legitimus controuersiarum arbiter constituitur, cuius sententiae se ytraque pars saluo iure suo submittere possit. Non aliter ergo patres illi causam egerunt, ac pontifex Romanus,

x) Quae quidem docet MOSHEMIVS. l. c. Saec. VIII. P. II. c. II. §. 2. not. 1.

y) Matth. XX. 25. 26. Marc. X. 42. Luc. XXII. 25.

z) 1 Petr. V. 2. 3. Consentit AVGVSTANA CONFESSIO. Conf. Art. de potestate ecclesiastica, et MELANCHTHONIS apologia.

nus, qui omnes de religione controuersias ad se pertinere dicit, et in propria causa sententiam fert. Sunt quidem, qui idaliter fieri non posse doceant, quam vt in lite alteri parti adhaereant iudices, siquidem etiam Apostoli in synodo Hierosolymitana de circumcisione id constituerint, quod ante habitam synodum verum rectumque esse crediderint. Quibus respondemus, Apostolos fuisse Θεοπνευστος, et miraculorum edendorum potestate praeditos, neutrum vero cadere in patres ad concilia coactos. Nos potius ex eo colligimus, mortalium neminem in rebus ad fidem pertinentibus alterius iudicem esse posse, propterea quod ius non habet alterum ad assumendam sententiam suam obligandi. Vtrum vero patrum Nicaenorum plurimi ab Arii sententia non multum, saltem non magis quam ab illa Alexandri abhorruerint, an rationes ciuiles, ex parte etiam priuatae fuerint, quae suaderent Arii condemnationem, nos nunc inquirere nolumus. Quod proximorum temporum controuersias, hasque dirimendi ius attinet, fas esto adhibere instrumentum pacis: *Sancitum, vt in caussis religionis, omnibusque aliis negotiis, ubi status tamquam unum corpus considerari nequeant, Catholicis et Augustanae Confessionis statibus in diuersas partes euntibus sola amicitabilis compositio lites dirimat, non attenta votorum pluralitate.*

LIBRI SECVNDI

CAPVT V.

VT nulla est ratio, ob quam clericis possit competere ius dominandi; ita id etiam, quod in iudicium vocant, hominum iudicio subiiciendam non est. Qui enim in conciliis assidebant; non scelestos damnarunt, sed **HAERETICOS**. Haeresis quidem potest nonnunquam esse peccatum, interdum etiam crimen: ast non omnis haeresis peccatum, multo minus crimen est. In conciliis vero non curarunt, quam male egerint haeretici, sed quam male, pro iudicium scilicet sententia, senserint. De opinionibus itaque causae, ut sit in foro, perorabantur, quod quidem sanæ rationi quam maxime repugnat, et propterea etiam alienum est, quod acerrimi haereticorum insectatores, quid haeresis sit, nesciunt ipsi. *De haeresi scripturo*, inquit **IMMORTALIS IABLONSKI**, a) *in mentem venit illud AUGVSTINI* in praef. ad libr. de haer. Quid ergo faciat haeticum regulari quadam definitione comprehendere, sicut ego existimo, aut omnino non potest, aut difficilime potest. *Quod Augustini aevo iam incertum erat, nostro, quod vivimus, aevo clarius certiusque factum non est. Pro diuersa enim, cui quis addictus est, haeresi, diuersimode haeticum describere solet, ita ut multi hodieum ingenue cum Augu-*
stino

a) In diss. de sensu vocis *aispous* in S. Litteris §. 1.

*stino fateantur, se, quid sit haeresis, vel haereticus, ignorare. — — — Haeretici sunt sensu S. Scripturae illi Christiani et amoris et veritatis hostes, qui vel ipsi sunt auctores factionum, et diuisionum in ecclesia faces et tubae; vel qui hominibus factionis adhaerent, cum iis factiones alunt, nihilque rectum autumant, nisi quod ipsorum placitis et moribus conueniat, notantes eos, immo odio prosequentes, qui ipsos non sequuntur, eos reiicientes, et nomen ipsorum tamquam malum abiicientes. b) Hem! haereseos notam sibi inurent ipsi, qui alios haereseos accusare amant. Haeresis id denotabit, quod hodie haeresi aduersum et contrarium est, quod liceat haeretificium appellare; vel si pro errore sumitur, denotat errorem ducentem per se ad facienda opera carnis. c) Nec a vero abludere videtur THOMASIVS, strenuus ille praeconceptarum opinionum castigator, qui, si nempe, ut eius verbis utamur, magis ad rem ipsam, quam ad canones respicitur, haeresin nihil aliud esse statuit, quam *dissensum, etiam levissimum eorum, qui unius sectae inter Christianos sunt*, a iudicio cleri, et libris symbolicis ab ipso, ut sint norma fidei aliorum, confectis, et sic haeresin esse *dissensum quemcumque a religione**

b) Ibidem §. XI. Conf. etiam I. I. BREITHAVPTI observationes de haeresi iuxta S. Scripturae sensum. Halae 1697.

c) Est THOMASII sententia l. c. §. 3.

gione dominante. d) Quam sententiam si sequeris, et cur non sequereris, vides originem Conciliorum, quae coacta sunt, ut in Clericorum dissensu intelligatur, quatenus dominetur opinio, quae pars altera superior sit. Potest definitio THOMASII vel ex Christianorum Imperatorum edictis probari. THEODOSIVS enim Euresium pro haeretico habendum edixit, *quoniam haeretici sint, qui vel levi argumento a iudicio catholicae religionis et tramite detecti fuerint deuiare.* *e)* Non fuerunt vero iniqui modo conciliorum assessores, ut sibi, quamvis se esse homines scirent, hominum animis imperandi ius arrogarent, impurioribusque animis, quam ut huic causae, si iusta fuisset, alio quam pessimo exemplo praeesse potuerint: sed *indocti* adeo etiam, ut rei feliciter expediendae impares fuerint. Sabino Macedoniano patres Nicaenos ignorantiae accusanti respondet SOCRATES, *f)* *imprudentem esse Sabinum, qui non cogitet, etiamsi idiotae fuissent synodi huius patres, cum tamen a Deo et gratia Spiritus Sancti fuerint illuminati, haud quaquam a scopo veritatis aberrare potuisse.* At ex iis, quae supra disputauimus, facile quisque intelliget, quam inanis ista responsio sit. Ut nulla lege hoc aevo cautum erat, ne quis

E

rudis

d) l. c. §. 19. et §. 35.

e) Vid. Cod. Theod. XVI. Tit. V. Ed. 28. p. 144. et paratitlon. p. 105. §. 2.

f) l. c. l. 8.9.

rudis et indoctus sacris admoueretur muneribus: ita etiam certis testimoniis constat, ple-rosque tam antistites, quam presbyteros omni plane scientia et doctrina vacuos fuisse.

g) Quod eo etiam comprobari posse videtur, quod sacra dogmata non satis caste et simpliciter proposuerunt, verum ultra terminos diuinæ patefactionis studio parum laudabili interdum produxerunt, nimisque ac subtiliter dissecata non tam sacrarum litterarum, quam hominum auctoritatibus, et argumentationibus dialecticis probarint. h) Temere ergo pro concessio et probato sumunt, concilium non haberi, in quo non affideant viri litterarum peritissimi: non enim de eo, quod fieri debet, sed quod factum est, disputatur. Quae quaestio non ex conclusionibus dialecticis ac ex rei notione petitis, verum narrationibus plenorum fidei auctorum resoluenda est. Legant vero, si velint CONSTANTINI epistolas ad ecclesias, quas ipsi aut Alexander suggessit, aut Nicaenorum patrum alius, et illam ALEXANDRI, i) et acutas responsiones, quas philosopho dedit venerabile concilium. l) In quo quidem fuit EVSEBIUS CAESARIENSIS, vir citra dubium doctus, sed non ita doctus

Theo-

g) MOSHEMIUS l. c. Saec. IV. P. II. c. I. §. 5.

h) Idem l. c. Saec. V. P. II. c. III. §. 6.

i) SOCRAT. I. 9. THEODORET. l. 5. 6. 15.

l) GELASIVS. l. c. p. 22. 25. 27. 37.

Theologiam, vt philosophorum argumenta refutare potuisset. Sacrarum enim litterarum leuiter peritum fuisse, negari non potest. *m*) Nescio igitur vtrum fas fuerit so-

E 2 CRATI,

m) Vir conseruandae Eusebii famae studiosissimus, VALESIVS bona fide praemisit Eusebii historiae ecclesiasticae testimonia veterum, eaque pro Eusebio, in quibus sunt, quae iudicium nostrum confirmant. *In libro quaest. V et N. T., qui inter AVGVSTINI opera editus est*: Memininus in quodam libello Eusebii quondam egregii in reliquis viri legisse, quia *nec Spiritus Sanctus sciat mysterium natiuitatis Domini nostri Iesu Christi*, et admiror, tantae doctrinae virum hanc maculam Spiritui Sancto inflixisse. HIERONYMVS in lib. V. *comm. in Esaïam*: Eusebius Caesariensis, inquit, historicam interpretationem titulo repromittens diuersis sensibus euagatur. Cuius cum libros legerem, aliud multo reperi, quam indice promittebat. Vbicumque enim historia defecerit, transit ad allegoriam, et ita separata consociat, vt mirex eum noua sermonis fabrica in vnum corpus lapidem ferrumque coniungere. PHOTIVS L. I. c. 2. *Philost. hist. eccl. in epit. contr.* Philostorgium ait adfirmasse, Eusebium in iis, quae ad religionem pertinent, lapsum esse, quia existimauerit *ἀγνώσκον το θεον και ἀκαταληπτον*; in alios etiam huiusmodi errores eum incidisse. (Quae contra Philostorgii iudicium moneri possint, Vid. in GOTHOFREDI *diff. in Philostorgium*) ATHANASIVS in libro de Synodis Arimini et Seleucia habitis Opp. ex offic. Commeliniana. 1600. edit. T. I. p. 683. Eusebius quoque ex Caesarea Palaestinae scribens, inquit, ad Euphrationem, non veritus est, palam dicere, *ὅτι ὁ χριστος οὐκ ἐστὶν ἀληθινος θεος*. (quamquam p. 402, 679, 721. Eusebium recessisse scri-

CRATI, Sabino, qui n) Nicaenos doctores rudes et ignaros appellarat, EVSEBII auctoritatem opponere, cum ex eodem SOCRA-TE discimus, o) qua mente EVSEBIUS iis, quae in Synodo decreta erant, suffragatus sit. Eusebium vero *Arianum* fuisse, existimarunt antiquissimi fideque dignissimi scriptores. HIERONYMVS in Apologetico aduersus Rufinum: *Eusebius Caesariensis episcopus — multis testimoniis approbavit, Origenem iuxta se CATHOLICVM, id est, iuxta nos ARIANVM esse. In Libro II. adv. Rufinum: vir doctissimus EVSEBIUS (doctissimum dixi, non catholicum, ne more solito mihi et in hoc calumniam struas) per sex volumina nihil aliud agit, nisi originem suae ostendat fidei, id est ARIANAE PERFIDIAE. In*

eo-

bat ab Arii parte, Synodique Nicaenae decretis subscripsisse.) — — ANTIPATER Bostorum episcopus in libro primo aduersus Eusebii Apol pro Origene: nego tamen, inquit, cum ad exactum eccl. dogmatum cognitionem peruenisse. Quocirca promiscue quidem doctrinae atque eruditionis gloriam ei omnino concedimus: *dogmatum vero notitiam non item. Quia potius ab accurata illorum cognitione eum procul abfuisse, compertum habemus.* — — Si SCALIGERVM in elencho *Trihaeresii* Drusii de sectis Iudaicis commentariis adiecto c. XXIX. p. 355. audire placet, nullius scriptorum eccl. plures alucinationes extant hodie, quam Eusebii. Adde iudicium BARONII Ann. T. III. A. D. 324. p. 214.

n) L. I. c. 8.

o) Socrat. l. 5. Theodor. l. 12.

eodem libro Eusebium *Arianorum principem* vocat. In epistola ad Ctesiphontem aduersus Pelagianos, *Eusebium Caesariensem Arianum fuisse, nemo est, qui nesciat. Eandem sententiam sequuntur ZONARVS p) et NICEPHORVS q)* Hic: *In multis tamen, inquit, eum (Eusebium Pamphili) apparet Arii sententiam comprobasse, ut qui filium, sicut id ex eius scriptis colligere licet, creaturam vocet. Photius r): — — etenim et hic eum pluribus locis τὸν υἱὸν βλασφημοῦντα videas eundemque secundam causam appellantem ac ἀρχιτῆγον, aliaque eiusmodi, quae Arianorum infaniae propria sunt. Idem: s) — — Quis illum (Constantinum) baptizarit, dissimulat. De Ariana insuper haeresi nihil aperte commemorat; nec utrum ipse ei aliquando adhaeserit, nec quod eam abiecerit. Sed neque recte an secus senserit Arius, usquam refert: tametsi haec necessario commemoranda essent. Quippe cum Nicæna Synodus inter res a Constantino gestas praecipuum locum obtineat, et alioqui exactissimam totius negotii narrationem ipsa suo quodam iure flagitare videatur. Verum ille dissensionem quidem inter Alexandrum et Arium exortam commemorat, sic enim haeresin callide et dissimulanter appellat — — verum haec*

E 3 (quae

p) Ann. L. XIII. c. 4. quod quidem ex eius historia eccl. probare vult.

q) H. E. L. IX. c. 14. L. I. c. 1. L. VI. c. 37.

r) in Biblioth. 1611. c. 13. p. 11.

s) ibidem c. 127. p. 307.

(quae de Arii et Alexandri dissidio, hosque conciliandi studio Imperatoris narrat) *ab illo non satis accurate et aperte traduntur. Prorsus enim tamquam pudore suffusus, nec Arii impietatem publice traducere cupiens, tum Synodi sententiam aduersus Arium prolatam, tum eorum, qui impietatis eius socii et in exilium simul expulsi fuerunt, iustissimam ultionem, illud denique caelitus inflictum Ario exitium, quod omnium conspectui subiectum fuit, sciens praetermisit: nec historiam synodi, resque in ea gestas commemoravit.* Eandem sententiam sequuntur **BARONIVS** *t)* et **Natalis ALEXANDER**, *v)* omnium eruditissime hanc rem persecutus **CLERICVS** est. *x)* Cuius quidem sententiae auctoritas ex eo augeri posse videtur, quod synodus Tyria praesidibus utroque Eusebio Caesareensi, et Nicomediensi habita fuit Ariana *y)*: Ariani Eusebio episcopatum Antiochenum tradere voluerunt: *z)* ad Eusebium prouocauit Arius *a)*: ex amicitia, qua

Aria-

t) Ad Ann CCCXXXV. Eusebium Caesareensem perfidia atque astu Eusebio Nicomediensi non imparem esse dicit. A. CCCXL. confirmat iudicium antiquorum de Eusebii Arianismo, haecque addit: *eum defendere velle nihil aliud existimandum est, quam ecclesiam catholicam impugnare*

v) Saec. IV. c. 3. §. 2. p. 32.

x) In Epist Crit. Ep. 2. in artis criticae Vol. III.

y) EPIPH. haer. 68.

z) SOCRAT. l. 18. 24. SOZOM. II. 18. NICEPH. VIII. 45.

a) THEOD. l. 5.

Arianos Eusebius complexus est: ex iis, quae gessit contra Athanasium, et ex vestigiis Arianismi in libris eius obuiis. *b)* Eorum vero, qui Arianismi absoluunt Eusebium, princeps facile est CAVEVS. *c)* Quod si causam animo ab omni partium studio alienissimo aestimamus, omnes illos, qui aliis formulis, quam erant in Nicaeno concilio constitutae, vsi sunt, ARIANORVM nomine antiqui ornasse videntur. Quod quidem iniquum adeo est, ut theologi vere orthodoxi, atque ab omni haeresi alieni, qui diuinam tantum auctoritatem sequuntur, neque humanis formulis vim inesse credunt, inuiso illo nomine condecorandi essent. Quin vero Eusebius, si ista Arianorum nominis potestas esse creditur, Arianus fuerit, dubium nullum est. Quamquam enim nobis non omnino probatur iudicium DUPINII, *Eusebium Orthodoxum quidem fuisse, sed Irenicum*; eum tamen non quidem Arii sententiam probasse, verum in eorum partes, quibus diuinitatis personae disparis gradus et ordinis esse videntur, propendisse censemus. *d)* Quod si quis fuerit, qui dubitet, an Nicaenae sententiae fauerit

E 4 *Eusebii*

b) NATALIS ALEXANDER. H. E. saec. IV. diff. XVII. et SANDIVS l. c. p. 46. 47. 135. 141. Quorum vterque multos adfert auctores Arianismi Eusebii testes.

c) In hist. litter. Col. Allobr. 1720. p. III.

d) Quae est sententia MOSHEMII l. c. Saec. IV. P. II. c. II. §. 9.

Eusebius, legat, quibus ad auertendam ab eo ἐτεροδξίας calumniam vsus est VALE-
SIVS, argumenta, et si quid videt, nec ad
inuestigandum verum ineptus omnino est,
dubitare credo desinet. EVSEBIVS itaque
is non fuit qui decretis Nicaenis auctorita-
tem addere potuisset. ATHANASIVS qui-
dem iuris peritus adiutor erat infeliciū
episcoporum, quem pro flagello Arianorum
habuerunt: inter caecos enim facile regnat
luscus. Quam vero sacrarum rerum harum-
que explicandi veri sensus peritus fuerit, qua
igitur auctoritate in concilio disputarit, iudi-
cet candidus rerum aestimator ex iis, quae
contra Arianos adfert in libro suo *de synodi
Nicaenae contra Arianam haeresin decretis*. Sunt
etiam in ceteris eius libris, quibus iudicium
illud confirmari possit: vt nobis hoc ipso
quidem momento in mentem venit memo-
rabile illud contra Macedonium argumentum
repetitum a Dauide, quem etiam ceu vñctum
a Domino adorarit Nathan. Ex quo facile
potest intelligi, quae fuerit eruditio episco-
porum, quos sua adiuuit Athanasius. Hem!
quae erit conciliorum auctoritas, quorum
assessores ad tyrannidem adspirant, religio-
nis praecepta nec tenent, nec seruant, ipsi-
que impuris cupiditatibus seruiunt. Verum
vlterius progrediendum est: quum enim de
re adeo graui, de seruanda aut abiicienda
humana fide agitur, longior disputatio in
malam partem accipienda non est.

LIBRI SECVNDI

CAP. VI.

NEQVE incommodum erit in OCCASIONES inquirere, in quibus fuerunt, ob quas venerandae adeo societates conuenerent, causae. Ast concilia non statim coacta sunt, ubi esset exorta haeresis, sed quoties ere visum est, et sperarunt, fore ut suae sententiae calculos adiiciant plurimi. Quod si spes ista dubia esset, in dissentientes nullo habito concilio a clero vel populi vel Imperatoris gratia freto saeuitum est. ALEXANDER ante concilium Nicaenum, et antequam de eo cogitatum esset, priuata auctoritate ex ciuitate ARIVM eiecit. *e*) Memorabilis est sermo NESTORII tum quidem orthodoxi, et insignis haereticorum flagelli *f*):

δὸς μοι, ὦ βασιλεῦ, καθάραν τὴν γῆν τῶν αἵρετικῶν, καὶ γὰρ σοὶ τὸν οὐρανὸν ἀντιδῶσω. συγκατέλε μοι τοὺς αἵρετικούς, καὶ γὰρ συγκατέλω σοὶ τοὺς περσᾶς. Si vero de haeresibus conuocarentur episcopi, id plerumque factum est ob leuissimum dissensum. Quod profani adeo viderunt: AMMIANVS enim MAR-

E 5

CEL-

e) Conf. ARII epistola ad Eusebium Nicomediae episcopum apud Theod. l. 5. et SOCRATES l. 6. et EPIPHANIVS haer. LXIX. ex recens. Petauii. Col. 1682. T. I. p. 729. GELASIVS etiam CYZICENVS l. c. L. II, c. 2.

f) SOCRAT. VII. 29.

CELLINVS: g) *Christianam religionem, inquit, absolutam et simplicem anili superstitione confundens, (Constantius) in qua scrutanda perplexius, quam componenda grauius excitauit dissidia plurima, quae progressa fusius aluit concertatione verborum, ut cateruis antistitum iumentis publicis ultro citroque discurrentibus per synodos, quas appellat, dum ritum omnem ad suum trahere conantur arbitrium, rei vehiculariae succideret neruos. Saepe de littera aut vocula lis eret: qui tamen dissensus, si sacerdotes haeresin eum esse voluerunt, grauissimi criminis loco habitus est. Nec aliter de lite Ariana iudicauit vel ipse CONSTANTINVS. In epistola ad Alexandrum episcopum et Arium presbyterum; h) ac mihi quidem, inquit, de harum rerum initio ac origine accuratius cogitanti leuis admodum caussa visa est, nec tanta animorum contentione digna — — Inde igitur praesentis controuersiae fundamentum intelligo iactum esse, quod tu Alexander a presbyteris de loco quodam in S. litteris scripto quaerebas, immo vero de*

in-

g) L. XXI. in fine.

h) Apud EVSEBIUM de V. C. II. c. 68-72. SOCRAT. I. 7. SOZOM. I. 16. vbi multa de inanibus theologorum controuersiis praeclare dicta sunt. SOCRATES equidem. L. I. c. 5. eandem, quam Constantinus, de hac lite sententiam tulit. NICEPHORVS etiam H. E. L. VIII. c. 5. Nugas dicit et contentiosas disputationes, quae speciem utilitatis prae se tulissent, de quibus antea quaesitum non esset, ea in quaestionem adduxisse.

inani quadam quaestionis particula sciscitabaris, quid quisque eorum sentiret. — — *Vester conseruus vos hortatur, ut de rebus eiusmodi nec omnino rogetis, nec ad rogatum respondeatis.* Alexandrum curiosius aliquando disseruisse, et subtilius de sancta Trinitate, vnitatemque in Trinitate esse, refert SOCRATES. *i)* Quam sententiam quoniam Arius Sabellianismum redolere suspicabatur, *l)* in opinionem venit Sabellii opinioni omnino contrariam. Quamquam Alexander auctor fuerat, *m)* et Arium ex ecclesia eiecit, in disceptatione tamen cum eo in confesso cleri habita dubitasse aliquantisper videtur, ab cuius parte stet veritas. *n)* Versata vero omnis controuersia in voce ὁμοουσιος est. Formulae fidei ab Arianis synodo oblatae, quam proponit Eusebius in epistola ad ecclesiam post concilium scripta, in qua filius *προ παντων των αιωνων εκ του πατρος γεγεννημενος* dicitur, nemo contradixit, quare imperator iussit, ut omnes eidem assentirentur, ac subscriberent, modo vox CONSUBSTANTIALE adderetur. *o)* Hanc vocem a Nicaenis inuentam esse, non Nicaenae fidei aduersariorum, sed acerrimorum defensorum sententia

i) I. 5.

l) Ibidem.

m) Ibidem.

n) SOZOM. I. 15. et IV. 32.

o) Auctore equidem EUSEBIO: THEODORETUS vero l. 7. discerptam esse formulam ait. Quare suspecta nonnullis Eusebii narratio est.

tentia est. In epistola synodica ad imperatorem Constantium episcopi ad concilium Ariminense coacti, iique Nicaenae doctrinae in hac ipsa epistola studiosi sanctos confessores ac martyres huius dogmatis auctores et inuentores fuisse dicunt. *p*) Solent etiam Critici ex hac voce aliisque, quibus antiquissimi Christiani vsi non sunt, colligere, scripta antiquioribus auctoribus attributa, in quibus occurant illae voces, spuria et supposititia esse. Quam diligenter tamen vrgerent solent, vocem *ὁμολογῆτος* adhibitam esse ante concilium Nicaenum. Quod catholicos attinet, testes quidem SOCRATEM et ATHANASIVM adferunt. Ille enim: *q*) nonnullos veteres episcopos et scriptores in patris et filii diuinitate explicanda hoc verbo vsos esse: hic vero apud THEODORETVM *r*) Eusebium eandem sententiam habuisse adfirmat. Ast si exempla, non testimonia requirimus, illis vere carent. Nesciunt enim, quae adducant, nec omnino haberent, nisi ex Athanasio THEOGNOSTI et DIONYSII nomine transcriberent. *s*) At THEOGNO-

STI

p) THEODORET. II. 19. SOCRAT. II. 29. SOZOM. IV. 17.

q) L. II. c. 5. p. 511. in Hist. eccl. scriptoribus Gracis graecolatine ex interpr. IO. CHRISTOPHORSONI Col. Allobr. 1612. editis.

r) L. I. c. 8. et in libro suo de decretis syn. Nic. nec non de Syn. Arim. et Seleuc.

s) Conf. PETAVII Theol. Dogm. T. II. L. IV. c. 5. §. I.

STI hypotyposeon libri septem tantum ex PHOTIO noti sunt, cui homo iste ORIGENIS sententiam secutus esse videtur. r) De DIONYSII Alexandrini scriptis non supersunt nisi fragmenta, eaque ne certa quidem, et brevis epistola. Ea enim, quae contra Paullum Samosatenum, vel ut alii malunt, Sabellium scripta ab eo esse dicitur, supposititia est: quod si non esset, dubitaretur, quo sensu vocem ὁμοουσιος adhibuisset. Adhibitam vero esse a profanis scriptoribus, et ab haereticis, a nemine negari potest, nisi ab homine antiquarum rerum ignaro. Vfus illa est Plato, vsi sunt Aristoteles, Plotinus, Porphyrius, Iamblichus, et ex haereticis Paullus Samosatenus, ac Gnostici. Nec minus indubium est, hanc vocem reiectam esse in synodis, non illis solum quas coegerunt Ariani, cuius nominis vim supra demonstrauius, verum etiam Antiochena saeculo tertio aduersus Paullum Samosatenum habita, quae a plerisque pro duabus synodis habetur, quoniam in altera retractasse Paullus, in altera depositus esse, alteri Firmilianus, alteri Helenus praesedissee videtur. Quamquidem, ut ex innumeris scriptoribus paucos modo excitemus, de Antichena synodo sententiam CVCCELLAEVS, CLERICVS, SAM. MARESIVS, PET. ZORNIVS, RAV in historia vocis ὁμοουσιος, HOLBERGIUS alique secuti

r) PHOTII biblioth. a Schotto 1611. edita p. 279.
Cod. 106.

secuti sunt. Quamquam hanc vocem alio omnino sensu Nicaeae stabilitam, alio Antiochiae reiectam, esse statuant, ATHANASII auctoritatem secuti, nobis equidem non omnino dubio carere videtur, quae vera fuerit PAVLLI sententia. Verba enim ATHANASII, ex quibus Celeb. IABLONSKI efficere vult s) PAVLLVM abhorruisse ab huius vocis vsu, non aliam admittunt interpretationem, quam eam, quae allatae modo ATHANASII sententiae non repugnet. Quod si fides haberetur posset SANDIO t), patres Antiochenos in epistola ad Paullum ARIANIZASSE dicere-mus. De qua re vero iudicare propterea nolumus, quod bibliotheca patrum, in qua epistola illa extat, ad manus non est, SANDIVS etiam a PETAVIO episcopos illos in illorum numerum, qui idem quod Arius tradidissent, relatos esse dicit, quem locum in Petavii libris non inuenimus. Non esse tamen, cur magnopere confidant sententiae Athanasii, ex philosophandi, qua de hac ipsa re vsus est, ratione aequus quisque rerum aestimator facile colliget. v) Caeterum quia adfirmant, inquit, episcopos, qui Samosatenum condemnarunt, dixisse filium non esse patri-

s) In disp. de genuina Paulli Samosateni doctrina, in Acad. nostra 1736. edit. §. 5.

t) Hist. eccles. p. 123. 124.

v) In Ep. de Synodis Arimini et Seleucia habitis. Opp. T. I. p. 706.

ὁμολογίον, ac iam deinde ipsos ob reuerentiam honoremque eorum, qui ita locuti sunt, ab hac voce abhorrere, rectum fuerit reuerenter cum iis de ea re disceptationes facere. Nam arietare cum illis prorsus indecorum est, eo quod omnes patres sint. Rursus diiudicare, istos bene, illos male dixisse, nequaquam sanctum est. Omnes enim ἐκοιμήθησαν ἐν Χριστῷ. Fuisse vero vocem istam patribus orthodoxis etiam post Concilium Nicaenum ambiguum, intelligi potest ex iis, quae SOCRATES commemorat. x) Sicut nos, inquit, ex variis epistolis, quas post concilium episcopi alter ad alterum scripserunt, perspicue deprehendimus, verbum ὁμολογίον nonnullorum animos vehementer conturbauit: in quo quidem excutiendo, dum multum temporis ac studii consumebant, eiusque vim tamquam ad viuum refecare curiose nimium moliebantur, intestinum bellum inter ipsos excitarunt, atque ea, quae gerebantur, nihil a nocturna pugna discreparunt. Nam minime omnino ab se mutuo videbatur intelligi, cur se inter ipsos maledictis concidere oecoepissent. Etenim qui vocem ὁμολογίον repudiabant, illos, qui eandem receperant, Sabellii et Montani opinionem de integro introducere censuerunt, et ob eam causam eas blasphematores nuncuparunt, tamquam filii Dei essentiam tollere molientes. Qui autem contra fidei ὁμολογίον firme adhaerescebant, alios multos deos inuehere arbitrati sunt, eosque tamquam gentilitatem inferentes

x) l. c. L. I. c. 23.

ferentes auersati — — — Idem ex RV-
FINI historia y), et ex dissertationum, quasi
Historiae ecclesiasticae suae Tomo quarto adiecit
NATALIS ALEXANDER, *decima quarta et*
quinta confirmari potest. Neque totius di-
sputandi de Trinitate generis admodum cer-
tos fuisse, ex eo nos equidem colligimus,
quod et Catholici Arianorum instar, et Ca-
tholicorum more Ariani loquuntur, patres-
que contra Sabellium disputantes Arianismo,
Arium autem dum refutant, Sabellianismo
fauere videntur, cuius quidem rei alio for-
san tempore specimen edere fas erit. 2) Non
est ergo, cur simulemus, nos non probare
Constantini sententiam, de re leui, ac parui
momenti exortum inter Alexandrum et
Arium dissidium esse. Quod cum considera-
mus, venit in mentem memorabile illud
GREGORII NAZIANZENI, qui in oratione
de laudibus Athanasii: *res, inquit, profecto*
ridicula, vel potius miseranda. Diuersae fidei
speciem leuis illa et ieiuna de sono vocum alter-
catio. Hinc deinde et Sabellianismus ob tres
personas excogitatus est, et Arianismus ob tres
hypostases, quorum utrumque pertinax conten-
dendi studium effinxerat. Ne vero paullo au-
daciores in ferendo de ea re iudicio fuisse

vi-

y) L. I. c. 21.

2) Quid alii, BAELII certe admiratores, qui apud
hunc scriptorem similem obseruationem extare non
nescient, ex sententia nostra colligant, non cura-
mus.

videamus, quae postquam patrum Nicaenorum auctoritate definita est, grauis adeo ac sancta facta esse creditur, ut sempiternae salutis spem inire homini non liceat, qui decreta Nicaena in dubium vocare ausus fuerit, adiicimus testimonia theologorum fidei ac auctoritatis plenissimorum. **AUGUSTINVS** a) magna prorsus inopia humanum laborare (de Trinitate) eloquium, neque adhuc termini adfirmat, ut aliquid diceretur, sed ne taceretur. **LUTHERVS** contra Latomum: nec est, inquit, quod mihi ὁμοουσιον illud obieceris aduersus Arianos receptum. Non fuit receptum a multis, iisque praeclarissimis, quod et Hieronymus optauit aboleri, adeoque non effugerunt periculum hoc inuento vocabulo, ut Hieronymus queratur nescire, quid venenilateat in syllabis et litteris, adeo illud Ariani magis, quam scripturas etiam exagitabant — — Quid si odit anima mea vocem ὁμοουσιος, et nolim ea uti, non ero haereticus. **CALVINVS**: b) Utinam quidem sepulta (inuenta nomina) essent — — neque vero tam praecisa sum austeritate, ut ob nudas vocolas digladiari sustineam. Animaduerto enim veteres multa alioqui religione de iis rebus loquentes, nec inter se nec singulos etiam secum ubique consentire. Quas enim Hilarius formulas a conciliis usurpatas excusat? quo licentiae interdum pro-

F

filit

a) De Trinitate. L. V. c. 9.

b) Instit. L. I. c. 13. §. 5.

silit Augustinus? quam absimiles sunt Græci Latinis! sed hic eius variationis exemplum unum sufficiat. Nomen ὁμοουσιον cum reddere Latine vellent, dixerunt consubstantialem, unam esse Patris et Filii substantiam indicantes, atque ita substantiam usurpantes pro essentia. Vnde et Hieronymus ad Damasum sacrilegium esse dicit, tres in Deo substantias praedicare. Atqui plus centies apud Hilarium reperies, tres esse in Deo substantias — — Nec antiquitus quaestionem illam, quae non ad religionem, sed ad theologiam, aut si mauis, ad philosophiam, quam nos equidem dicere solemus, theologicam pertinet, tanti habitam non esse, ex eo intelligimus, quod patrum, qui ante Nicaenum Concilium vixerunt, plurimi, forsitan omnes, ii saltem, quorum ad nos incorrupta scripta peruenerunt, de rebus sacris longe aliter senserunt, quam deinde in concilio constitutum est, Praeter SANDIVM in nucleo historiae ecclesiasticae et QVICKE-RVM in Irenico Irenicorum sententiae istius auctores habemus PETAVIVM c) BRVCKE-RVM in historia Philosophiae, WHITBY d)

GIL-

c) Dogm. T. II. L. I. c. 3-6.

d) In disquisitionibus modestis in clarissimi Bulli defensionem fidei Nicaenae. Lond. 1718. Georgio enim Bullo Presbytero Anglicano auctore prodierat Oxonii 1685. defensio fidei Nicaenae ex scriptis, quae extant, catholicorum doctorum, qui intra tria prima Ecclesiae Christianae saecula floruerunt. In qua obiter quoque CPlitana confessio de spiritu S. antiquiorum testimoniis adstruitur.

GILBERTVM CLERKE *e)*, HVETIVM *f)*,
IVRIVM *g)* aliosque. Nec ab ea omnino
abhorruisse videtur MOSHEMIVS. *h)* Sunt
etiam theologi reſtitutis puritati ſacris addi-
cti, qui terminos illos in dogmate de Trini-
tate adhiberi ſolitos, ſimpliciter neceſſarios
F 2 eſſe

e) In Ante-Niceniſmo, qui exhibet teſtimonia pa-
trum Ante-Nicenorū, in quibus elucet ſenſus
Eccleſiae Primaeuo-Catholicae quoad articulum de
Trinitate, nec non in reſponſione ſua ad Bulli de-
ſenſionem, quibus libris vno volumine 695 edi-
tis addita eſt ſcriptio, qua vera et antiqua fides de
diuinitate Chriſti contra Bulli iudicium explicata
et aſſerta dicitur.

f) In Orig. L. II. c. II. §. X. p. 36. ſeq. patres
Ante-Nicaenos Platonis caſtra ſecutos eſſe ait.

g) In Apol. Moral. Reform. contra Arnoldum c. 15.
inter ſcriptores trium primorum ſaeculorum nul-
lum eſſe ſcribit, qui non vſus ſit terminis, qui in-
aequalitatem inter patrem et filium exprimere vi-
dentur.

h) I. c. Saec. IV. P. II. c. V. §. 9. -- -- dogma
de tribus perſonis -- -- tribus prioribus re-
rum Chriſtianarum ſaeculis nondum ex toto deſi-
nitum erat. Hoc quidem contra Sabellianos et
alios ſaepe decretum erat, vere Patrem a Filio, et
ab vtroque Spiritum ſanctum differre -- --
at de mutua harum perſonarum relatione, atque
diſcriminis, quod eas diſiungit, natura nec diſpu-
tatum, nec ideo ab eccleſia praeceptum erat
aliquid. Multo minus formulae praeſcriptae erant,
quibus de hoc myſterio loquendum eſſet. Itaque
diuerſo modo doctores ſine offeſſione hanc rem
explicabant, et variae de Patris, Filii et Spiritus S.
diſfe-

esse negant, sed posse sine illis mysterium Trinitatis proponi vltro fatentur. i) Quare nos nondum poenitet, quum hos libros primum ederemus, viri, qui Ven. SEMLERVM de patrum Ante-Nicaenorum fide Petauii sententiam secutum mirabili certe ignorantiae aut leuitatis argumento Socinianismi accusarat, improbasse immodestiam. Turpe enim est, cognitioni et perceptioni assertionem approbationemque, turpius contrariae sententiae defensorum criminationem praecurrere. Quod eo minus poenitere potest, quam paullo post se errasse fassus ipse est. Haetenus ergo de occasione concilii Nicaeni — — Quod de Ariana lite Constantinus, idem fere de Macedonianorum caussa existimauit THEODOSIVS, l) quam obrem etiam solitas *περι ούσιας και φύσεως Θεου* disputationes vetuit. NESTORIVM nobis depingunt ceu hominem ignarum, superbum, crudelem et impium: dogma vero eius horrendum: hae enim sunt elegantiae, quibus di-

spu-

differentia differebant. In Aegypto, vicinisque regionibus, plerique cum aliis in rebus, tum hoc in dogmate, Origenis sequebantur sententias, qui docuerat, Filium in Deo id esse, quod ratio est in homine, et Spiritum Sanctum nihil aliud, quam vim agendi et operandi diuinam

i) Conf. REINH. HENR. ROLLII diss. theol. de terminis ecclesiasticis in loco de Deo Vnitriuo adhiberi solitis. Giesiae 1750. § 2.

l) NICEPHOR. H. E. L. XII. c. 10.

sputationes suas vel inuectiuas in Nestorium et veteres et recentiores exornare solent. At si propius et penitius origo magni huius schismatis discutiatur, fatendum est sagacibus et candidis rerum aestimatoribus. omnes has turbas concitatas fuisse propter mera verba, merasque locutiones. m) CYRILLVS in epistola ad Aegypti monachos: n) *Audior enim inquit, exitiales quosdam rumores inter vos profeminatos; nonnullos quoque oberrare, qui sinceram vestram fidem demoliri studeant, et inanium vocularum bullas apud rude vulgus eructantes, utrum Θετοκον sacram virginem appellare liceat, in controuersiam vocare audeant. Praestaret sane eiusmodi quaestionibus omnino supersedere, et in ea, quae abstrusionis considerationis sunt, nec aliter fere, nisi veluti in speculo et aenigmate etiam ab iis, qui ingenii celeritate mentisque subtilitate pollent, perspicui possunt, nequaquam inquirere.* — —

NESTORIVS se a sententia, qua in Christo duae personae fuisse creduntur, alienissimum ad vitae usque finem professus est. o) Neque

F 3

haec

m) Hoc IABLONSKII iudicium est in exercit. de Nestorianismo Berolini. 1724. edito. Vid. eius etiam hist. eccl. Saec. V. c. 3 §. 4. p. 146. seq.

n) Quae extat in Actis Oecumenicae tertiae synodi, Ephesi habitae Theodoro Peltano interprete una cum Gelasii commentario in Acta Concilii Nicaeni in bibliopolio Commeliniano 1604 editis.

o) MOSHEMIVS l. c. Saec. V. P. II. c. V. §. 9. testes

haec opinio vnquam diserte ab eo proposita, sed ab aduersariis eius tantum repudiato DEIPARE cognomine, loquendique modis quibusdam incautis et ambiguis lege consecutionis expressa est. Hinc sunt tam veterum, quam recentiorum longe plurimi, qui idem ipsum, quod Ephesinos, sensisse, alio vero modo locutum esse arbitrantur, omnemque culpam funestissimi huius dissidii in Cyrilli turbulentum ingenium, et iniquam erga Nestorium voluntatem coniiciunt. *p*) Dictu igitur mirabile equidem, sed verissimum est, a Constantino M. inde vsque ad saeculum, quod sacrae ciuitati pristinam puritatem reddere coepit, plerasque disputationes, quae haereses, lites, bella pepere-
runt, non ex sacris litteris, sed sectaria philosophia repetitas, multasque adeo hominum myriades ob Platonis aut Aristotelis auctoritatem omni miseriarum genere vexatas esse. En graues conciliorum causas: audi vero etiam, quo ordine res in sanctis his confessibus gestae sint.

LIBRI

testes adfert MARIUM MERCATOREM in Op. T. II. p. 286. edit. Garnerii, et Nestorium ipsum in fragmentis epistolarum in ASSEMANI Bibl. Orient. Vat. T. II. p. 40. 41.

p) MOSHEMIVS l. c.

LIBRI SECVNDI

CAP. VII.

PRIMO ergo DE NICAENO, quod honoris causa την μεγάλην συνόδον vocare solet ATHANASIVS. Res narrabitur, vt est. De rebus gestis loquimur, vtrum dogmata sacrorum scriptorum sententiis consentanea sint, non disquirimus. Non agitur recipiendae aut abiiciendae patrum doctrinae causa, sed vtrum ob conciliorum auctoritatem assumenda sit, disputatur. Concilii necessitatem Imperator non vidit, pacis potius suasor fuit, de rebus minoribus litem esse existimans. Alexander vero, postquam legatum Imperatoris Hosium, quem ad Arianorum partes postea abiisse opinati sunt q), in amicitiam
F 4 suam

- q) Lege SVLPIC. SEVER. L. II. c. 40. SOCRATE auctore l. 26. fidei Sirmiensis formulis, postquam plagae ipsi inflictae, membraque machinis distorta essent, necessitate compulsus, consensit et subscripsit. Id ita factum esse, ως λεγεται, adfirmat SOZOMENVS L. IV. 5. PHILOSTORGIVS etiam L. IV. c. 3. et contra ὁμοουσιον et contra Athanasium subscripsisse: ad quem locum consulendae sunt GOTHOFREDI dissertationes. Praeter hos et ex his Hosii lapsum multi alii commemorant. Vtrum vero resipuerit, res et WEISMANNI, et nostro iudicio dubitationem habet. BARONIUS. Athanasii in epist. ad solit. vit. agent. et Apol. II. auctoritatem secutus Cordubensem illum episcopum

suam pertraxerat, ab Imperatore impetrauit, vt concilium conuocaretur. *r)* Cum tandem Arii, quem ingenii et eruditionis laude multis praestitisse, et moribus ad pietatis ac modestiae professionem compositis se commendasse, ne haereticorum acerrimi quidem censores negant, *s)* ad istos iudices delata causa esset, antequam esset cognita, damnamdam esse pronuntiarunt, *t)* eoque simul consilio se conuenisse monstrarunt, vt posthabita veritatis inuestigatione opinioni suae inuiolatam auctoritatem conciliarent. Ab his iudicibus, quorum virtutes suprademonstrauimus, causa religionis aestimanda erat. Praeerat iis quidem Imperator Constantinus illo ipso tempore a nece Licinii reuersus, qui
autem

pum resipuisse putat, vellicatus eam ob rem a CASPARO BARLAEO. Resipuisse negant FAVSTINVS et MARCELLINVS in libello ad Theod. et Valentin.

r) EPIPHANIVS. haer. LXVIII.

s) VITRINGA in Apocal. c. VIII. 10. p. 358. 359. LIGHTFOOT. Opp. T. II. Opp. Posth. p. 165. SALMERO in disp. X. in epist. ad Romanos. IAC. BASNAGE dans l'histoire de l'eglise. T. I. p. 80.

t) Conf, Oratio EVSTATHII apud BARONIUM ad Ann. CCCXXV. PHILOSTORGIVS L. I. 6. SOCRAT. I. 9. THEODORET. L. I. c. 8. 9. NAT. ALEX. H. E. T. IV. Saec. IV. c. 3. §. 2. p. 31. An Arius adfuerit non liquet. EPIPHANIVS p. 720. mortuum fuisse scribit, cum concilium ageretur: dissentiant ceteri.

autem *episcoporum decreta*, ut *SULPICII* verbis utamur, *complexus est. v)* Additi ei etiam erant praesides ex clericis sumti, de quo honorifico praesidendi officio motus etiam excitatos esse, scriptorum nonnulli autumant. Quam huius aevi licentiam, abhorrentesque a Christiana humanitate ministrorum sensus, quam impune in alios saeuierint, contemplaturis haud aliena videbuntur verba *LIVII*, qui: *nihil fallacius est, inquit, quam praua religio. Vbi Dei numen praetenditur sceleribus, subit animum timor, ne fraudibus humanis vindicandis diuini iuris aliquid immistum violemus.* In Concilio *CONSTANTINOPOLITANO* non sancti Euangelii, sed *Nicaenorum* decretorum ratio habita est. In *Maximi Cynici* locum ponunt *Nectarium*, et propter sacrarum rerum ignorantiam, et vitam ante actam ad feliciter obeundum episcopi munus inhabilem. *x)* Quem antequam Imperator elegisset, singuli e necessariis suis aliquem ad episcopi *CPlitani* dignitatem perducere cupiebant, quod quidem disertis verbis adfirmat *SOZOMENVS. y)* Quam studiosi fuerint hi iudices vani honoris, in hoc

F 5

etiam

v) L. II. c. 35. Quanta vero reuerentia prosecutus sit episcopus, docet *GELASIUS* in actis Conc. Nic. c. VI. et *Vul. EVSEBIUS* etiam de V. C. L. III. 10.

x) *SOCRAT. V. 8. THEOD. V. 7. SOZOM. V. 7. VII. 7.*

y) l. c. VII. 7.

etiam conuentu aperte declararunt ipsi. *a)* EPHESI res haud ceciderunt felicius. *a)* Quod si memineris, quis fuerit CYRILLVS qui Nestorium condemnauit, reuocabit autem in memoriam BARBEYRACIUS *b)*, qui hominem ambitiosum fuisse docet, et violentum, qui amplificandae modo auctoritatis studuerit, nec ab vlllo abstinuerit atrocitatis genere; intelliges sane, qui res in isto comitio geri potuerint. Nec te falli, sed fuisse in sancto conuentu Cyrillum sui similem DUPINIVS testis esto. *c)* Quamquam CYRILLVS

2) SOZOM. VII. 7-10. NICEPHORVS l. c. XII. 12. 14.

a) Conf. Acta huius Concilii.

b) In praef. ad PVFFENDORFII Ius Naturae Galliae edit.

c) Biblioth. des Aut. Eccl. T. III. P. II. p. 320 — —
La maniere, dont la chose est jugée, semble encore prouver clairement, que c'étoit la passion, qui faisoit agir St. Cyrille, et les Eveques de son parti, qu'ils vouloient, a quelque prix que ce fut, condamner Nestorius, et qu'ils ne craignoient rien tant que la venue des Eveques d'Orient, de peur de n'être pas les maitres de faire ce qu'il leur plairait. Car des la premiere seance, ils citerent par deux fois Nestorius, lurent les temoignages des Peres, les lettres du St. Cyrille avec ses douze Chapitres, et les ecrits de Nestorius, et dirent tous leur avis. Iamais affaire n'a été conclue avec tant de precipitation: la moindre de ces choses meritoit vne seance entiere. Comment a-t-on pu examiner en si peu de tems les douze propositions de St. Cyrille, qui ont eu besoin de tant d'ecla-

LVs sacrorum scriptorum auctoritatem secutus non est, *d*) iniurius etiam fuit Nestorio, eiusque scriptis, *e*) sententiam suam tamen, qua condemnauit Nestorium, Iesu Christo attribuere non dubitauit. *f*) Ad quam ferendam, vel probandam potius per sacros canones, et epistolam sanctissimi patris,

d'éclaircissemens, et qui ont tant causé de disputes? Comment conferer tant de passages des sermons de Nestorius avec ce, qui les precedoit et suivoit, pour en trouver le vrai sens? Comment pouvoit-on être assuré en si peu de tems des sentimens des anciens peres? Toutes ces choses demandoient un long et sérieux examen de plusieurs jours; mais les eveques du Concile avoient si peur de ne pas achever dans cette seule seance, qu'ils demeurèrent enfermes depuis le matin jusqu'au soir, pour juger seuls cette affaire, de peur que les choses ne tournassent autrement s'ils attendoient au lendemain. La sentence qu'ils font signifier a Nestorius est concue en des termes, qui marquent la passion, qui les animoit: A Nestorius nouveau Judas. N'étoit ce pas assez de le condamner et de le déposer, sans l'insulter encore par des paroles injurieuses? Conf. etiam SOCRAT. L. VII. c. 34. EVAGRIUS H. E. L. I. c. 4. IABLONSKI Instit. hist. Christ. Saec. V. c. III. §. 4. seq. MOSHEMUS l. c. Saec. V. P. II. c. V. G. ARNOLDVS H. E. L. V. c. III. §. 10. p. 229.

d) EVAGRIUS l. c.

e) LIBERATVS c. V. breuiarii: Cyrillus, inquit, deflorationes quasdam librorum Nestorii faciebat, eum perturbare volens: erat enim, vt dicitur, eius inimicus.

f) ARNOLDVS l. c. p. 236. GELAS. in Act. Syn. Eph. p. 105.

tris, et Comministri Coelestini Romanae ecclesiae episcopi coactam esse synodum probare vult ALEXANDER NATALIS. *g)* Pelagiani vero, quod in illo Concilio non omnia Anathemata probarunt, cum Nestorianis vna condemnati sunt. Alienum esse dicebant patres, XXX. se opponere velle concilio sanctorum CCX. episcoporum. *h)* In Concilio CONSTANTINOPOLITANO contra Eutychem A. A. C. N. CDXLVIII habito *i)*, licet publice testaretur, nolle se a fratrum communione diuellere, iussus etiam eiurare haeresin suam, se, si ita vellent, facturum esse responderet, a munere tamen remotus, coetu etiam sacro exclusus est. Intercessit vero apud Theodosium Eudocia precibusque suis effecit, ut proximo anno propter Eutichetis causam synodus, in qua iudices CPlitani aut auctores essent, aut rei, EPHESI ageretur. Sub ipso concilii initio traditas ab Iulio litteras supprimit Dioscorus, et Eutichetis, quem exhibuerat, libello perlecto, surgit de medio patrum, altaque voce, hunc optimam de religione sententiam, neque se aliam sequi pronuntiat. Quo audito Eutyches resumit animum, de iniuriis CPlitanis acerrime queritur monachique trecenti libellum offerunt, quo se communioni, a qua Flavianus submouerat, restitui rogant.

Exitus

g) H. E. T. V. p. 68.

h) ARNOLDVS l. c. c. V. §. 4. p. 241.

i) EVAGRIVS L. I. c. IX.

Exitus est, ut CPlitana acta rescindantur, Eutyches Catholicus pronuntietur, pristinaeque dignitati restituatur, anathema denique iis dicatur, qui duas esse in Christo naturas docuerint. Eusebio impietatis damnato, Flauiano proscripto, Episcopi ceteri partim a monachis, partim et maxime a purpuratis aulae minis verberibusque compelluntur, ut synodi sententiae subscribant. Flavianus vim animaduertens ad Romanum episcopum prouocat, iussu autem Barsumae, monachi a milite aliquo, erant enim milites cum gladiis et fustibus in concilium intromissi, ad necem usque caeditur, petiturque calcibus, ut triduo post ex concepta pectoris plaga decederet. Ab isto tragico exitu synodus adhuc *lotrocinalis* et *praedatoria* dici solet. *l)* Tantis malis medelam allaturum conuocatur tandem Concilium CHALCEDONENSE *m)*, in quo primo Romanus Pontifex praeses fuit, habitum ad tumulum S. Euphemiae. MARCIANVS symbolum Nicaenum sanctissimae legis instar seruari praeceperat, quo vero prudentior LEO sacros libros

l) EVAGRIVS L. I. 9. 10. II. 2. 4. 18. ZONARAS. L. XIII. 23. NICEPHOR. CALL. L. XIV. 47. 49.

m) EVAGRIVS L. II. c. 2. 3. 4. 18. III. 4. NICEPHORVS XV. 2. et sequ. Legant inprimis velim c. V. ZONARAS Ann. L. XIII. 24. 25. THEODORVS LECTOR. Coll. L. I. DYPINIVS l. c. p. 327.

libros, horumque in ortis de rebus sacris controuersis vsus atque auctoritatem data epistola commendauit. Qua lecta a poenitis initium sumunt, qui pontificis vices sustinebant, legati, iubentque abire e confesso Dioscorum, qui quidem surgit, sed in medicorum episcoporum iterum confidet. Posthaec prodit Eusebius, accusat Dioscorum, eum et Eutychetis asseclam, et commissae in Flauiano caedis auctorem esse, rogatque, ut Ephesina acta rescindantur. Cognitis Dioscori facinoribus, episcopos, qui ad Ephesinorum consilia accesserant, nisi vitandi tumultus causa pro iis intercessissent patres Chalcedonenses, a publicis muneribus remouisset Imperator. In his praeter Iuuenalem patriarcham Hierosolymitanum quatuor erant episcopi, qui supplices veniam rogauerunt, se exilii, fustium, ensium, militum metuententiam in charta pura subscripsisse. Vtrum in hoc concilio sacros libros consulerint, incertum, certissimum e contrario est, praeter symbola Conciliorum, adhibitam etiam esse LEONIS epistolam, qua lecta, hanc esse Apostolorum fidem clamarent. Nec dubium est, quin ea epistola in symboli Chalcedonensis loco posita sit. Ingens vero ortus tumultus est, quum multi episcopi, quamuis pro orthodoxis haberentur, epistolam subscribere nollent, monachi etiam, qui eo aevo tantum non omnes Eutychiani erant, de restituendo Discoro supplicarent: quibus autem

autem synodus alta voce respondit: *Anathema Dioscoro, foras monachos.* Theodore-
rum ad damnandum Nestorium cogunt, Iba-
rum se decies mille anathemata Nestorio et
Eutychi dicere velle pollicitum recipiunt,
Ephesinum Concilium Oecumenicis adscribi
vetant, Conciliorum itaque auctoritatem ex
sua pendere docent. Quam vere in omni-
bus conciliis dici potuisset, quod dixit olim
in Seleuciano praeses ex aula missus Leonas,
qui, cum turbas videret, concilium dimisit,
et reuocatus ab episcopis respondit: *ἔπειδη
δε τινες διεσησαν, ἔδυναμαι παραγινεσθαι,
ἀπελθετε οὖν, καὶ ἐν τῇ ἐκκλησίᾳ φλυα-
ρεῖτε.* *n)*

LIBRI SECVNDI

CAP. VIII.

Ea, quae viri toti terrarum orbi, cunctis-
que saeculis leges daturi DECREVE-
RVNT, breuitatis studiosi leuiter tangemus.
At Nicaena decreta, cetera enim silentio
praeterire malumus, deprauata sunt, quod
acerrimi conciliorum defensores negare non
solent. Numerus incertus est. In concilio-
rum editione XX canones recensentur, qua-
cum consentiunt THEODORETVS *o)*, et
GELASIVS: *p)* apud RVFINVM *q)* vero
XXII

n) SOCRAT. II. 40. *o)* l. c. L. I. 8.

p) l. c. II. 31. *q)* l. c. I. 6.

XXII leguntur. Apud hunc equidem scriptorem quatuor canonibus eadem comprehendendi aiunt, quae apud ceteros auctores in duobus, sexto nimirum et octavo continentur: quod quamquam non omni veri species caret, magna tamen est in comparandis secundum canonum omnium editionibus difficultas. IACOBI BASNAGII quidem iudicio dubium est, an canones isti, si integri essent, augerent, quae plerique synodum istam prosequuntur, an minuerent venerationem. Im illis, quae supersunt et circumferuntur, aperta vestigia Papismi sunt. Ex quo genere datum episcopis mandatum est, caueant, *ne quis absque viatico e vita decedat.* r) Cui honori patribus istis cedit, quod, nisi luscus Paphautius, cui, quum imperante Maximino vexarentur Christiani, alter oculus ferro effosus erat, acutius vidisset, eosque docuisset meliora, *caelibatum clericis mandassent*, nullaque habita auctoritatis viri huius ac consilii ratione in caelibatu viventibus, quamquam sacrae litterae contrarium statuunt, matrimonium interdixerint? s) VALESIVS equidem t) hanc rem in dubium vocat: at ex RVFINI silentio, quem alio in loco auctorem parum diligentem Valesius ipse dicit, quidquam confici posse non videtur. Quod

r) GELASIVS. l. c.

s) SOCRATES l. 8. II. SOZOM. I. 23. CEDRENVS in hist. comp. edit. Paris. 1647. p. 287.

t) ad locum Socratis.

si HIERONYMVM in praef. ad librum Iudith auctorem sequi placet, librum illum in sacrorum librorum numero habuit Nicaena Synodus. In cuius auctoritate pater ille equidem acquieuit: nos vero nostram de Nicaenis decretis sententiam confirmatam habemus. Quod si quis concilium alterum cum altero comparauerit, *sibi met repugnasse inuicem*, ita quisque quam facillime intelliget, vt ab omni partium studio alienissimus fuerit.

v) Si auctoritati auctoritatem opponere vellemus, antestaremur virum cum propter ceteras virtutes, tum candidissimum veri amorem et venerabilem, et amabilem, LVTHE- RVM, cuius haud magna fuit de conciliis opinio. Vt vero tandem longiori huic de conciliis disputationi finem faciamus, *magnum* illorum velint, quorum pleraque tamen reiecta sunt, *numerum* contemplantur rogamus. Cur ergo non omnibus eadem auctoritas? cum plura vsurparint illud: *visum est Spiritui Sancto*: quare hunc paucissimis prae- fuisse credunt? saniores equidem, hoc ex decretis et dogmatibus constare, dicunt: ex quo autem perspicuum est, Conciliis nullam esse habendam fidem, nisi de rebus istis, quas praecipiant, aliae eaeque certiores rationes adferantur. Quum igitur clericorum tradita extra concilium praecepta, iis, quae in conciliis dantur, minora sint, se etiam er-

G

randi

v) CALVINVS Inst. L. IV. c. IX. §. 9. SALMON de l'etude des Conciles. p. 188.

randi periculo sine summa iniquitate eximere nequeant, auctoritas vero conciliorum sita sit in testimonio priuato de vera, quam stabiliunt, doctrina, nos quidem quam confidentissime docemus, latarum ab hominibus in conciliis legum nullam auctoritatem, eas potius quam diligentissime examinandas esse, atque quamquam priuilegiis, iuribus, minis et execrationibus muniantur, sine scelere posse, conscioque integritatis sane animo repudiari. PICTETVS equidem x) legitima concilia esse censet, quae conuocantur ab iis, qui habent ius conuocandi, ad quod viri pii in nomine IESV conueniunt, et in quo omnia ex verbo diuino diiudicantur: abi, et quaere legitimum. Quodcumque dederis, alterum ex illis defuisse, facili negotio probabitur. Non ob grauissimas itaque, propter quas omnibus hominibus in rebus diuinis fides deneganda est, rationes solum, verum etiam saeculum, quo habendorum conciliorum inductus mos est, assessorum ignorantiam, dominandi cupidinem, vitiaque alia, occasiones conciliorum vanas saepe, nonnumquam etiam improbas, excitatos in istis iudiciis tumultus, aduersa sanctae veritati decreta, multitudinem etiam conuentuum, et quia nullus fuerit, in quo non infederit macula, conciliis omnibus, quaecumque demum fuerint, in rebus ad religionem pertinentibus fidem nullam adhibemus. De quorum

x) In Theol. Christ. L. XIV. c. 32.

quorum conuentuum, et vniuersae fidei humanae fructibus disputabitur, postquam de symbolis, librisque eo consilio scriptis, vt aliis instar legum fidei sint, sententiam libere proposuerimus.

LIBER TERTIVS

CAP. I.

LIBRI SYMBOLICI admodum vtilis, quin necessarii etiam sunt, quando fidei et doctrinae ratio publice reddenda, aut sinistrae suspiciones, apertaеque calumniae remouendae sunt. Summa eorum erat necessitas, quum maiores nostri excusso iugo Romano, fractisque tyrannicae hominum fidei vinculis sanctae puritati studerent, vt integritas doctrinae, eiusque cum sacris litteris consensus monstraretur. Felicissimi adeo fuerunt AVGVSTANAE CONFSSIONIS fructus, ex qua multi didicerunt, quanta sit Romanae ecclesiae superstitio: hodieque Catechismorum, quorum vtinam liberalior esset facies, ea est vtilitas, vt pueri hominesque litterarum expertes, quorum scientia neminem non iuuat, ea in promptu habeant. Magni itaque libros istos facimus: illis vero nullam habemus fidem, nisi QVATENVS concordant cum S. Scriptura. Eos itaque fidei normam esse negamus: quia omnes, qui

hac regula sanctam fidem iudicant, in sacra oracula iniuriam facere existimamus. Quam sententiam ne temere pronuntiasse videamur, pondera quaeso, argumentandi, quam sequimur, rationem. Symbolorum auctores homines fuerunt erroribus obnoxii, qui in rebus ad fidem pertinentibus praeter Scripturam sapere non potuerunt. SYMBOLICA ENI auctorem multi faciunt HOSIVM. Quare SVLPICIUS SEVERVS illo auctore Nicaenam Synodum confectam haberi ait. y) ATHANASIVS: οὗτος (ὁσιος) τὴν ἐν Νικαίᾳ πίσιν ἐξέθετο. z) Quod quidem nonnulli ita intelligunt, vt exaratum ab alio scriptore librum in ordinem redegisse HOSIVM putent. Alii, in quibus sunt VALLA et SANDIVS, ex EPIPHANIO a) MARCELLVM ANCYRANVM symboli conditorem fuisse colligunt. Quod quidem mirabile utique esset, propterea quod Marcellus haereticus fuisse fertur. b) Sunt etiam, qui ATHANASIVM, qui HERMOGENEM NEOCAESARIENSEM symboli illius auctorem faciant. Quisquis illud vero condiderit, nom-
tamen

y) l. c. II. 40.

z) In epist. ad solit. vit. agentens. p. 648.

a) haeres. LXXII.

b) CAVE hist. litt. Allobrog. 1720. p. 127. BARO-

NIVS l. c. T. IV. p. 236. Ann. 371. DUPINVS

l. c. T. II. p. 107. Semler. H. E. T. I. p. 158.

Scriptorumque antiquorum doctissimi ac sanctissimi teste PETAVIO Theol. Dogm. T. II. L. II.

c. 13.

tamen erit credo purioribus sacris additus homo, qui temerarius adeo sit, ut auctorem inflatum diuinum habuisse adfirmet, symbolum humani ingenii opus esse neget. Quin-immo illustria in hoc symbolo extant humanae imbecillitatis documenta. Quod enim mutari, mutilari, in eo scilicet quod caput rei est, et adaugeri potest, non potest esse diuinum. In aliis exemplaribus vox *ὁμοουσιος* legitur, in aliis non legitur. Constantino-
poli symbolum adauctum est. c) Auctor esse dicitur GREGORIUS NYSSENUS. d) In Hispaniis saeculo sexto, in Gallia non ante octauum addita verba sunt: FILIOQVE maiorem nata formula auctoritatem est in synodo Aquisgranensi A. DCCCIX habita, quam probare noluit LEO III. Pontifex Romanus, immo, ut haec verba (FILIOQVE) ex symbolo expungantur, decreuit. Quare NATALI ALEXANDRO hoc additamentum non ante saeculum nonum in ecclesia Romana factum esse videtur. e) Qui haec vero facta a catholicis adiectio conciliari possit cum decreto patrum Ephesinorum, qui contra eos, qui symbolo aliquid addituri sint,
G 3 ana-

c) ARNOLD l. c. L. IV. c. 7. §. 21. ATHANASIVS in Epist. ad Iouianum Imp. NICEPH. l. c. VII. l. c. 12. II. 5

d) Teste NICEPHORO L. LXII. c. 13. quem sequitur BARONIUS Ann. CCCLXXXI.

e) l. c. saec. IV. diff. XXXVIII. Conf. etiam PETAVIVS. l. c. T. II. L. 7. c. 2.

anathema pronuntiarunt, nos equidem non videmus. Memorabile est, neque in Nicaeno, neque Cplitano symbolo Macedonianis et Pneumatomachis opposito Spiritum Sanctum vocari DEVM. Quin fuerunt etiam caeteroquin catholici homines, qui Spiritum Sanctum palam aperteque DEVM nominari non sinerent, et qui vocare sic auderent, eis tamquam catholicae fidei inimicis obstreperent. *f)* Esse vero doctrinam Nicaenam a suis adeo defensoribus, qui ad Ariminense Concilium conuenerant, pro ingenii humani foetu habitam, supra demonstrauius. Quare etiam AVGVSTINVS, neque se Ariminensis concilii, neque, contra quem disputabat, Maximinum Arianum Nicaeni auctoritate detineri ait. *Scripturarum, inquit, auctoritatibus, non quorumcunque propriis, sed utrisque communibus testibus, res cum re, caussa cum caussa, ratio cum ratione certet.* CALVINVS formulam DEVM DE DEO duram appellat. *g)* SYMBOLVM CHALCEDONENSE cūsum est ex epistola LEONIS, *h)* quem ΘΕΟΠΥΕΥΣΟΥ fuisse non facile quisquam adfirmauerit. Quod ATHANASIO adscribi solet, eo minus diuinum vocari poterit, quum disceptent adhuc, vtrum Athanasii, an in-

f) Conf. PETAVIVS. l. c. T. II. L. I. c. XIV. §. 19. 20. 21.

g) Conf. CALVINI tractatus theol. omnes. Gen. 597. p. 780. 794.

h) EVAGRIVS l. c. L. II. 4. 18.

inferioris aetatis foetus sit. Quod si isti etiam vindicari posset, nec eruditione eius, nec pietate, si vtraque intaminatis fulgeret honoribus, maior symbolo auctoritas adderetur. Multo igitur minus recentiorum symbolorum auctores insolitis donis et muneribus vti sunt, qui errarunt saepe, et pro modestia sua, quam vtinam imitarentur sacrae doctrinae doctores omnes, se errare non posse negarunt. At inexcusabilis eorum videtur esse temeritas, qui MELANCHTHONEM, cum scriberet Augustanam Confessionem, formulaeque concordiae auctores Θεο-πνευστος fuisse adfirmant. i) Vtrum vero in his libris humanae vanitatis vestigia extent, et in formulae concordiae praefatione, quod vult THOMASIVS, l) aperte stabiliatur fides carbonaria, Laici omnes pro truncis habeantur

G 4

tur

i) Vid. (GOTTFR. LESZ) *Ehre der Bekenntnissbücher etc. etc.* Leipz. 1758. p. 15. 16. 20. et ARNOLDVS. l.c. L.XVI. C.XVIII. §. 3. 18. 32. Nec non dissertatio de libris symbolieis, quae est in eleganti Diario Berolinensi: *Vermischte Abhandlungen und Urtheile über das neueste in der Gelehrsch.* 1756. T. I. P. I. 68. cuius auctor citat wittenbergische Kirchenordn. Gedr. durch Hans Luft. 1559. in Quarto p. 9. Wie soll man Gott erkennen? Antw. wie er sich selbst gnädiglich offenbaret, und seine Offenbarung in der Propheten und Apostel Schriften, und in die SYMBOLA gefasset hat.

l) de iure principis circa haereticos in opp.

tur et stipitibus, disquirere nostrum non est. Sunt quidem, qui dicant, eruditissimos ac religiosissimos theologos symbolorum debere esse auctores. Quibus quae respondeamus in promptu sunt. Non de eo, quod fieri potest et debet, sed quod factum est, disputatur. Viri docti, qui nomine et munere theologorum carent, sacrarum litterarum vero studio delectantur, et in cognoscendis iis, quae ad religionem pertinent, assiduam eamque liberalem operam ponunt, acutiussaepe vident, partium certe minus sunt studiosi. Dictu perquam difficile est, quis sit eruditissimus tam in eodem, quam diuerso litterarum genere. Eruditissimus sectae ad animum superstitionem usque addictus esse potest, vir scilicet plurimarum linguarum, artium, historiarum ceteris vel aetatis suae vel ciuitatis peritior, at liberalis philosophiae expers. Neque eruditio errores, neque pietas defendit. Consulite praeteritorum temporum monumenta, et quo ingenio, eruditione, mente ac consilio, moribusque plurimi fuerint symbolorum auctores videte. Et haec quidem de illis. Vt autem plerique libris istis humanis firmiter inhaerent, eosque et leges sacrorum faciunt, iisque armorum instar vtuntur, quibus quilibet debelletur dissensus: ita nec desunt grauissimi viri, qui longe aliter sentiant. De LUTHERO ante diximus: quem in utroque Protestantium coetu secuti sunt viri laude sua non defraudandi, qui neminem

minem pro schismatico habendum esse putarunt, si a consuetis formulis symbolisque recesserit, neque si ecclesia expulsus fuerit, eos potius, qui hunc eiecissent, schismaticos esse. THOMASIVS pro ea, qua eminebat super seruile genus animi integritate: *praeter rationem*, inquit, *et S. Scripturam nullum alium libellum admitto, minime vero omnium a clero confectum, et conscientiiis laicorum obtrusum. Volo iure uti, quo Lutherus usus est, quod non potest denegari ulli homini. Symbola et libros symbolicos, qua confessiones sunt eorum, qui confecerunt, non odi, sed quae normae esse debent conscientiarum aliarum, et iudices controuersiarum, omnes non odi quidem, sed horreo, et si opus est, ad iuramentum perhorrescentiae me offero. m)* Quibus ergo, si symbolorum magna adeo est auctoritas, usus est PAVLLVS? Quare apostoli nullam formulam condiderunt? Quare ne diuinus quidem salutis nostrae reparator? haec nouitas suspecta est, quod viri a felicissimo saeculo, quo longe maioribus donis homines ornabantur, longius remoti leges condere coeperunt, auctores ecclesiarum, Apostoli diuinitus eruditi id ausi non sint. Prima etiam repurgatae ecclesiae aetate librorum symbolicorum nulla fuit auctoritas, sed aliis scriptis humanis pares habiti sunt: Nisi omnia, oculique ipsi nos fallunt, idem volunt, quorum auctoritatem tuentur, libri symbolo-

G 5

m) l. c.

bolici. n) *Credimus, confitemur et docemus VNICAM regulam et normam, secundum quam OMNIA DOGMATA, OMNESQVE DOCTORES aestimari et iudicari oporteat, nullam OMNINO aliam esse, quam PROPHETICA et APOSTOLICA scripta cum Veteris tum Noui Testamenti* — — — *Reliqua vero siue PATRVM, siue NEOTERICORVM scripta, quorumque veniant nomine, S. Litteris NEQVAQVAM sunt aequiparanda, sed vniuersa illis, ita subiicienda, ut alia ratione non recipiantur, nisi TESTIVM, loco* — — — *Si tandem multitudinem istorum librorum intueris, facile vides, omnem illorum auctoritatem aut pendere a praeuia eaque seria inuestigatione, et eam itaque omnino imminui, aut a placitis decretisque theologorum, quod summe utique tyrannis est. Quanta sit symbolorum varietas, qui nunc haec, nunc illa coetibus obtrusa sint, disputare nihil attinet. Nemo est, qui non videat, se, si velit ratione uti, ex libris symbolicis, quaenam ecclesia ad veritatem proxime accedat, cum vnaquaeque suorum symbolorum auctores summis laudibus efferat, diiudicare non posse: nisi forte dicas, quemlibet oportere id symbolum se-*

n) Epit. Art. de quibus controuersiae ortae sunt --

-- Conf. etiam HENR. MVHLII diss. de eo, quod iustum est circa religionem, et libros symbolicos. Kilonii. 1713. edita.

qui, quod in patria aut gente sua legis vim obtinuit, ut itaque Saxo Formulam Concordiae, Batauus Leges Dordracenas, Consensum suum Heluetus tamquam optimam fidei normum accipiat, quamquam fieri non potest, quin hoc vel illud symbolum a vero non abhorreat. Vere equidem Sophronius Pompeiopolis Paphlagoniae urbis episcopus in concilio Seleuciano: εἰ το καθ' ἑκάστην ἡμέραν ἰδίαν ἐκτιθεσθαι βουλήσιν, πίστεως ὑπάρχει ἐκθεσις, ἐπιλείπει ἡμᾶς ἡ τῆς ἀληθείας ἀκριβεία.

o) Nec possumus, quin transcribamus etiam verba HILARII, ut intelligant, quam sententiam de ista re ab antiquis inde temporibus habuerint viri liberali sensu praediti. — — *Post Nicaenam synodum, inquit, nihil aliud, quam fidem scribimus; dum in verbis pugna est; dum de nouitatibus quaestio est; dum de ambiguis, dum de auctoritatibus querela est, dum de studiis certamen est; dum in consensu difficultas est; dumque alter alteri anathema esse coepit, prope iam nemo est Christi. Proximi anni fides quid immutationis habet? primum decretum ὁμοουσίων decernit taceri; sequens rursus ὁμοουσίων decernit et praedicat; tertium οὐσίαν simpliciter a patribus praesumptam per indulgentiam excusat; quartum non excusat, sed condemnat. Tandem eo processum est, ut neque penes nos, neque penes quemquam ante nos, sanctum exinde aliquid atque inuiolabile perseueret. Annuas atque menstruas de DEO fides de-*

cernimus, decretis poenitemus, poenitentes defendimus, defensores anathematizamus, aut in nostris aliena, aut in alienis nostra damnamus, et mordentes inuicem iam absumti sumus — — — cum semel nouas professiones fidei conficere coeperunt, facta est fides temporum potius, quam euangeliorum. Admodum miserabile est, nouas fidei formulas singulis annis confici. Tot nunc fides sunt, quot voluntates. p) Salutaris itaque fuisset ecclesiae repurgatae, si a multiplicandis symbolis abstinuisset, ac in Augustana acquieuisset Confessione. Quod eo facilius potuisset effici, quum confessio ista non transferretur modo in permultas linguas, et de fide Protestantium inter omnes gentes constaret q); verum illi vel CALVINVS ipse sub-

p) Conf. AB. BVCHOLCERVS in Chronologia p. 649. scriptoribus H. E. a Grynaeo editis adiect. ARNOLDVS l. c. LIV. c. 8. §. 10. L. XVI. c. 20. §. 9. Mirabitur forte quispiam, me iterum et saepius Arnoldum auctorem sequi: scito vero, me testimonia eius, quem saepius in insigni errore deprehendi, minime recepisse oraculorum instar, sed haec etiam diligentius ponderasse. Quisquis es, noli Arnoldo credere, infirma fidem testium, quos adfert, aut fidem historicam causae tuae patrocinaturus omnem tolle. Verum de Arnoldi H. E. iudicium vide in WEISMANNI H. E. p. 43. 44.

q) Conf. ESTOR. in delin. Iur. Publ. Eccles. Protest. exhibente iura et benef. Aug. Conf. c. l. §. 6. p. 7. CAROLI GOTTH. MÜLLERI Oratio, quae memoria relig. form. in Aug. Imperii confesso 1330 recit.

subscripserit. *Ego si quis alius, inquit r), veram et sinceram consensionem expeto, quam modo DEVS ipse verbo suo sanciat: nec vero AVGVSTANAM CONFENSIONEM repudio, cui pridem sciens ac lubens subscripsi sicuti eam auctor ipse interpretatus est. Est etiam confessio corpori symbolorum Reformatorum Geneuae MDLI edito, cuius rubrum est: Harmonia confessionum fidei orthodoxarum, addita. Quod iusiurandum religionis, et subscriptionem librorum symbolicorum attinet, ne falcem alienae messi immittere videamur, id silentio lubenter praeterimus. Iuris doctores hanc sibi quaestionem vindicant. Quis est, qui disputare velit cum viro, qui imperiosa voce — — ex quo, inquit, consequum fit, principem recte ac propitio iure postulare, ut Libris Symbolicis ciues, ac pastores ecclesiae inprimis, subscribant hac formula: QVIA cum S. Scriptura conueniunt et DAMNAKE illos, qui hoc modo QVATENVS conueniunt, eos assumendos esse statuunt. Licet enim non audeam adfirmare Augustanam Confessionem*

recit. renov. Ienae 1758. CHRIST. HENR. HASII Comm. de lingua Carnorum et Illyr. Stauonica inpr. de Aug. Conf. versione eadem dialecto exarata. ibid. 1759. aliique scriptores.

r) Ep. CCXXXVI. Martino Scarligio Eccl. Ratisb. Past. - - In eandem sententiam loquuntur 10. STVRMIVS in Ep. ad Frid. Princ. inter ep. Calvini CCCIV. et HIERON. ZANCHIVS miscel. tr. de coena Domini confess. ad Magistr.

tionem esse normam fidei, sed **NORMATVM** dici debere existimem: Θεοπνευστος tamen **ME-DIATAM** ipsi recte adscribi putem. Ex quo fit, ut videamus Arnoldum — — — aliosque huius furfuris **DELIROS** censores, et Augustanae Confessionis sciolos obtrectatores — — — sed exclusi hi vivant a beneficiis, quatenus leges imperii statuunt Augustanae Confessioni. Ne conquerantur, si suo sensu abundantes eiciantur ex imperio: sed cogitent potius, se **Pseudomartyrum** augere numerum. s) Quae ex hac sententia confici possint, nos vero nunc equidem conficere nolumus, ita quisque facillime intelliget, ut candidissimus verius cultor fuerit. Vtrum subscriptionis, et iurisiurandi excusatio adferri, quo animo utrumque fieri ab honesto viro possit, quando orta sit haec consuetudo, quas ob causas introducta, quo consilio Augustanam Confessionem subscripserint Germaniae principes, qua re hunc morem non habuerint antiqui Christiani, qui religionis doctores, ut id doceant, iureiurando teneri possint, ad quod auditores credendum nulla lege coguntur, utrum in errores etiam, qui sunt in libris symbolicis t), iurandum sit, videant alii v) Id quidem dubio caret, **Symbolum Apostoli-**

s) ESTOR. l. c. c. IX §. 18. p. 124.

t) Conf. ARNOLDVS l. c. L. XVI. c. 18. §. 9. LESZCZYŃSKI. c. p. 129.

v) Vid. KÖLBELE von der Zulässigkeit der Eide. Frf.

stolicum ab omnibus assumi Christianis, ad quod assumendum nulla vi coguntur: e contrario vero neque splendida ceterorum symbolorum beneficia, neque vim ac auctoritatem ministrorum, neque regum magistratumque de seruandis symbolis edicta, neque demum acutae illae satisque doctae de symbolorum sanctitatae disputationes potuisse Christianos omnes ad concordiam reuocare.

LIBER TERTIVS

CAP. II.

FACILE equidem praeuidemus, quam impios et profanos, vel religioni ipsi inimicissimos nos esse, clamitaturi sint. In superstitionis enim penetralia irruere, et mysteria humanae fidei, quae ut in Capitolio Ioui vicina esse creditur, aperire impune vix licet. Tantum autem nos cepit veritatis amor, ut iniurias non extimescamus, rationes vero, si quas attulerint, nos non neglecturos, verum si meliora edocti fuerimus, errorem confessuros esse, bona fide

1767. Diligentior longe atque acutior scriptio est: Versuch über wichtige Wahrheiten zur Glückseligkeit der Menschen von einem redlichgesinnten Schweitzer. prim. 1766. deinde 1768. edita. Prima editio a Magistratu Bernensi suppressa, auctor HERBERTVS Bernensium a concionibus sacris, senex octogenarius in carcerem coniectus est.

polliceamur. Dicunt, *in fide humana multa esse, quae bona sint*: quod quidem, quia nulla res abiecta adeo atque turpis est, ut nihil prorsus boni in se contineat, non negamus: sed de hoc in praesenti causa non quaeritur. Neque nos dogmata Conciliorum et Symbolorum nunc equidem impugnamus, sed humanam, in qua nituntur, auctoritatem. Nostrum esse putamus, ut diuini Redemptoris mansuetudinem, amorem inimicorum errantium tolerationem imitemur: de sanctitate huius officii autem, nos neque Concilii cuiusdam, neque Symboli, neque Excellentissimi Doctoris auctoritas certos reddidit. Neque nos, inquiunt, *caeca fide dogmata tenemus*, sed omnia ponderamus sacri codicis lance, et quae Concilia et Symbola huic consentanea constituunt, ista assumimus. Recte quidem sacros libros, et liberalem sanae rationis usum fontes esse dicitis, e quibus haurienda sit sancta veritas: quae vero Conciliorum ergo humanarumque Constitutionum auctoritas est? Superuacua sunt opera, quae sancte tuemini, et legum loco ponitis: nihil enim concordant cum S. Scriptura, aut si quid continent, quod rectae rationi repugnet, assumi non possunt. Librorum igitur cuiusvis generis, quin haereticorum etiam qui neque Oraculis Diuinis, neque doctrinae, de cuius veritate aliunde certius constat, repugnant, eadem, quae Symbolorum vestrorum, auctoritas erit. Probe sci-

mus

mus, quae his opponere solent puritatis, quam vocant, anxie studiosi homines. *Haec*, inquiunt, *latebrae haereticorum sunt*, qui neglectis patrum et doctorum constitutionibus, sub S. Scripturae velo se abscondere volunt. Ni omnia nos fallunt, haec ea omnino sententia est, quam in commonitorio suo pro fidei catholicae antiquitate, et aduersus profanas omnium haeresium nouitates docuit famosus ille Pontificiorum antesignanus VINCENTIVS LIRINENSIS. Ille vero: *qui in fide recta*, inquit, *vult permanere integer atque sanus*, munire eam duobus modis debet, *diuinae legis auctoritate*, ecclesiae catholicae traditione — — *quia scripturam sacram pro ipsa sua altitudine non vno eodemque sensu vniuersi accipiunt; sed eiusdem eloquentia aliter atque aliter alius atque alius interpretatur; ut paene quot homines sunt, tot illinc sententiae erui posse videantur. Aliter namque illam Nouatianus, aliter Photinus, aliter Sabellius, aliter Donatus exponit, aliter Arius, Eunomius, Macedonius, aliter Apollinaris, Priscillianus, aliter Iouianus, Pelagius, Caelestinus, aliter postremo Nestorius. Et idcirco multum necesse est propter tantos tam varii erroris anfractus, ut prophetae et apostolicae interpretationis lineae secundum ecclesiastici et catholici sensus normam dirigantur* — — In quam sententiam paullo diligentius inquirere placet: audite ergo, haeresium atrociores quam flagitiorum insectatores, quam male rationes ve-

H — — stras

stras subduxeritis. Quod si haereses et impiae opiniones praesidium in sacris litteriss inueniunt, neque refutari possunt; nisi constituentur decreta humana, quaero ex vobis, quae de sacrarum litterarum *perspicuitate* animo sententia sedeat. Protestantes equidem de eo conueniunt, dogmata ad salutem maxime facientia ea claritate a sacris scriptoribus tradi, vt ea nemo non facili negotio discere possit; solent etiam haereticum vocare, qui in articulis, quos vocant, fundamentalibus errat: ex vestra igitur sententia rite efficitur, haereticorum errores non esse fundamentales, aut maximas res atque grauissimas in sacris libris obscurius doceri. Alterutrum vobis statuendum esse, certum est: vtrum vero sequi placuerit, vos male conclusisse, propriisque repugnare placitis, sole clarius est. Dolemus vicem vestram, qui ex hominum libris religionem vestram melius defendi posse existimatis, quam ex libris sacris, secuti exemplum Pontificii in comitiis Augustanis, qui se etiam *LVTHERVMI* ex patribus, non autem ex Scripturis refutare posse fatebatur. In vos igitur vere accidit, quod respondit illi homini Dux Ba- uaricus: *vestri aduersarii Scripturis inhaerent, vos estis ab ea alieni..* Prorsus autem nescimus, quid velint, qui quidem Symbolorum auctoritatem cum magno eruditionis apparatu, altaque, minaci interdum voce defendunt, solos tamen articulos fundamentales in

Symbolis traditos, minime vero illorum explicationes et probationes accipi debere docent. Quod si ergo ne in definiendis quidem, et demonstrandis dogmatibus Symbolis habenda fides est: qui poterunt articuli isti fundamenti loco ponendi tutius absque omni probationum praesidio assumi? quanta sunt inter theologos de fundamentalium articulorum natura, discrimine, numero dissidia? articuli aliis sunt fundamentales, qui aliis minime sunt; ut itaque nec iurata subscriptione pariatur consensus, siquidem se quilibet in fundamentales articulos, qui sibi esse videntur, non vero in ceteros iurasse, et de his igitur, quidquid libuerit, sentire se posse opinabitur. Articulos istos quidem Scripturae verbis definiri aiunt: quid igitur opus est Symbolis, cum id in quo cardo rei versatur, totidem verbis in S. Scripturis extet, cetera vero fidem non mereantur. Ast nunquam legerit celebratissima Symbola, qui in illis articulos, quos fundamentales, eosque primi quidem ordinis esse volunt, non Scripturarum, sed humanis verbis descriptos esse nesciat. Quot erunt fundamentales, si solis Scripturae verbis inhaerendum, humana vero negligenda sunt? Nonne hoc pacto Symbolum vnumquodque bono animo subscribere Christianus poterit? quod tamen hominum, qui symbola condiderunt, consiliis maxime repugnat. Quaerimus etiam: utrum Scripta veltra humana detorqueri ne-

queant? Recte quidem dicitis, esse dogmata *limitata, restricta*, terminisque scholasticis tamquam carceribus et vinculis inclusa: haec vero expositio, an a Deo profecta, an ab hominibus est? Postremum si negare nefas est, sinete stet quisque suo iudicio, hominisque iura teneat, alias occupatis tyrannidem, et in DEI iura inuolatis. Quamquam etiam humana arte ad doctorum ingenia et consilium sit in libris vestris detorta sacra doctrina: hoc tamen non obstat, quin Symbolorum interpretes a se dissentiant ipsi. Addimus, Concilia et Symbola erroribus non fecisse finem. Non dubitamus, fore multos in utroque Protestantium coetu, qui errore, cuius Nestorium accusare solent, imbuti sint; ut etiam in hoc de S. coena, in illo de decretis multi longe aliter sentiunt, quam Libri Symbolici ecclesiae, cui se socios publice adiungunt, aut omnes praescribunt, aut plurimi. Neque fieri potest, ut quilibet Christianus Conciliorum Symbolorumque decreta sequi teneatur, propterea quod verum eorum sensum assequi non potest homo litterarum expertus. Quam inania igitur et peruersa sunt hominum conamina, qui alios cruciant, alios eandem sententiam secutos tolerant, immo eorum sunt incuriosi? Verum haec utique non ex dissensu, sed periculo, quod humanae auctoritati imminet, diiudicantur. Fallatur indoctum vulgus, nil inde mali: ubi vero theologus aut philosophus

phus dubitauerit modo, summa religionis periclitari creditur, profanus esto. Neque dissensus iste, qui Conciliis et Symbolis non tollitur, semper periculosus adeo est, vt tolli omnino debeat, neque semper potest. Vt enim nullae res ex omni parte consentiunt: ita etiam opiniones hominum non possunt non ex aliqua saltem parte a se inuicem dissidere. Huc faciunt ingenia non eadem omnibus data, locus natiuitatis et tempus, parentum et praeceptorum conditio, studiorum et sociorum diuersitas. Quae si diligentius paullo tecum expenderis, opinionum concordiam his in terris salua tamen humanae societatis felicitate frustra expectari videbis. Vt in antiqua Graecia Philosophi Pythagorici, Epicurei, Stoici, Platonici, Peripatetici, Cynici fuerunt, et patriam suam non turbarunt, quam philosophorum modestiam apud Alexandrum et Arium teste SOCRATE laudauit Constantinus *); sic etiam in sacra ciuitate dissensus potest et debet tolerari absque publicae et communis salutis periculo, in primaeva etiam eaque purissima ecclesia toleratus est. Quin etiam ecclesia Romana, licet eius sectae et ordines non in rebus minoris momenti solum, sed etiam grauissimis, et in eo, quod caput haereseos est, Pontificis auctoritate mirum quantum a se dissideant inuicem, mole tamen se tenuit sua, et fortuna longe splendidiori vitur.

H 3

Quod

*) l. c. L. l. c. 7.

Quod si tandem haeretici S. Litteras in vfusus suos conuertunt, hae ideo non abrogandae, neque earum in locum nouae auctoritatis substituendae sunt. Quamuis diabolus Scripturas creparet, non desit tamen iisdem armis hostem debellare sanctissimus religionis auctor. Si omnia arma, quibus vtuntur aduersarii abiicienda sunt, abiice etiam rationem et te pecorum gregi adiunge: infensissimi enim et pertinacissimi diuinae veritatis hostes ratione gloriantur.

LIBRI TERTII

CAP. III.

QVVM argumentum pro symbolorum auctoritate ab ecclesiae iure factisque cum ministris passionibus repetitum vrgeri nostris diebus in primis solet, a theologis etiam tam veritatis quam pacis studiosissimis caute licet et cum laudabili circumspectione adhiberi, ab aliis vero augeri adeo et amplificari, vt si horum consilio obtemperandum esset, redirent ferrea illa saecula, quibus, vbicumque fuerit improbus religiosae puritatis custos, qui haereseos aliis notam iniurare pro impudentia sua voluerit, scelestissimorum hominum instar habendi, conuiciis poenisque fatigandi essent acutissimi atque integerrimi theologi: rem illam ob horum improba consilia, illorum vero auctoritatem, quam diligenter,

genter, breuiter tamen, ne lectori verbositate nostra molestiam creemus, ponderare constituimus, dicta, si quis nos meliora docuerit, retractare parati. Vnamquamque videlicet ecclesiam, propterea quod societas est, iure suo dicunt ponere condiciones ab iis, qui sacrorum priuilegiorum participes esse volunt, sancte seruandas, et inter Christianos et doctores intercedere pacta: illas vero condiciones poni in Symbolis, et ad haec pacta referri. Salua res esset, si cum ecclesia coniunctio ex hominum arbitrio, non ex officii sanctitate penderet, neque a DEO, sed ab hominibus instituta esset, ecclesia igitur a ceteris societatibus, quam suo quisque iudicio inire et conciliare potest, prorsus non differret. Vt vero in omni societate non naturalium modo, sed ciuiliū etiam legum ratio habenda est, si alias legitima esse velit: ita multo minus sancto euangelio aduersari debet ecclesiastica institutio. Condiciones, quibus homines coetui sacro addendi sunt, non sitae sunt in potestate mortalium. Num tu communione tua eicies, quem olim in beatorum sedem recipiet DEVS? Quid igitur opus est tuis conditionibus, cum illae diuinae, neque tuae voluntati, neque mutationi vlli subiectae sint? de pactis hic etiam minus apte caussa inferitur: in his enim nihil potest constitui, quod pugnet cum lege, et officio maiori. Quod si pactorum, quae fingunt, sancta adeo sunt

H 4 pri-

privilegia, qui puriorem doctrinam tradere potuerit LUTHERVS, non videmus: neque qui hodie hoc pacto teneantur religionis doctores, qui in articulos modo fundamentales iurarunt. Id quidem perspicuum satis est, cum Laicis quos vocant, quorum plurimi litterarum et philosophiae ignari sunt, maximam adeo symbolorum partem non intelligunt, pactum illud fieri non posse. Vt ecclesiae cuiuslibet non officium modo. sed ius etiam esse dicunt prouidendi, vt doctrina, cuius veritas agnita sit, et in hac consensus conseruetur ac propagetur. Non negamus, officio illo teneri ecclesiam, id est, coetum hominum, qui diuinos libros in religionis causa sequendos esse statuunt: si quid vero videmus, conseruatio ac propagatio illa non ad problemata theologica, nec ad quaestiones philosophicas pertinet. Non enim in his, sed in decretis religio nititur in Sacris Libris aperte traditis, quae illitteratissimus quisque intelligere potest, nisi omnino sit a sano sensu destitutus. Nec in his quidquam aliud, quam officium video, ius non video, nisi quatenus potestatem habet ecclesia postulandi, ne quis se ab exsequendo officio suo remoretur. Minime vero omnium effici potest, ecclesiam habere ius cogendi suos ad consensum doctrinarum, quoad se socios et adiutores, non vero hostes eius fore promittunt. Officium tuum est scribere, habes etiam ius scribendi, quoniam saluis legibus

gibus naturalibus et ciuilibus nemini te turbare licet, ius illud vero neutiquam efficit, vt aliorum sit, scripta tua legere. Est officium Christianorum omnium commune, maiorem rerum sacrarum cognitionem propagare, eorum autem etiam est, nullius hominis libertati officere. Neque cognitio illa, vera et salutaris (de hac enim loquimur, non de cognitionis simulatione) legibus, sed docendo, commendando, persuadendo propagatur. Quod si excipiantur dogmata in sacris litteris dilucide atque perspicue tradita, consensus plenus nec necessarius est, nec existere vlllo modo potest. Instituta est ecclesia, vt ad fidem in DEVM et ad aeternam felicitatem perducantur homines: ad quod non opus est doctrina, nisi ea, quae in S. litteris aperte extat. Quum ecclesiae *particulares* eo differunt ab *uniuersali*, quod haec S. Scripturam in rebus fidei sequendam esse statuatur, modum vero, quo doctrina ex Scriptura haurienda sit, non definiat, *particulares* vero abhorrentes a se inuicem doctrinas tradant suo iudicio, vt quidem volunt, ex S. Litteris haustas; hae quidem ad assensum homines cogendi ius habere nequeunt, quoniam eodem iure vtuntur Christiani omnes. Quod eo quidem certius est, propterea quod vnius cuiusque hominis longe pluris interest, vniuersalis ecclesiae, quam particularis membrum esse. Non Lutherani olim, Arminiani, Sociniani, sed Christiani

aeternam felicitatem consequentur. Quod si officium illud non caute satis circumscribitur, quisque tenebitur, o seruilem illam atque abiectissimam sententiam! seruare opiniones ecclesiae particularis, in qua quamuis inscius atque inuitus natus sit. Sit igitur necessarius in fundamentalibus articulis consensus: propter hos vero humani libri symbolica auctoritate muniendi omnino non sunt. Qui enim articulos illos veros esse negat, non particularis, sed vniuersalis ecclesiae socius, id est Christianus esse desinit. Solent equidem e notione rei, siue *a priori* probare velle, sine doctrinae consensu nec sacras orationes, nec publicas preces haberi posse: quo vero ratiocinandi genere nos equidem magnopere moueri non solemus. Cui enim si obstet indubia et communis experientia, hanc sequendam praecipue existimamus. Non in Anglicanis vero coetibus modo, sed in Germanicis etiam, quibus verum DEI cultum exulare non facile quisquam adfirmauerit, publicorum doctorum muneribus funguntur, qui in Sacri Codicis et vniuersorum eius librorum interpretatione a se inuicem dissident, quin in dogmatibus etiam, quae aut alterutra aut vtraque pars fundamentalia esse autumat. Quamquam igitur fieri non potest, quin homines in nulla parte secum consentientes sacra communia non habeant: haec tamen sine pleno consensu vtilia et salutaria esse posse, comprobat etiam vsus sa-

cra-

crarum cantionum, quarum auctores non eandem de omnibus sententiam secutos esse satis constat. Neque est, cur consensum illum nimio studio vrgeant. Qui igitur probabunt symbola ab tota ecclesia adfensione sua comprobata esse? G. WERNSDORFIVS equidem *v)*, postquam de consensu necessitate disputauit, in condendis symbolis partes Theologis relinquendas esse statuit. Mallemus dixisset, quibus Theologis. Idem officium principis esse statuit, vt ad condendum symbolum conuocet Clericos. Num omnes igitur, aut plurimos, aut aliquos? Sume, quae velis: nisi caeca fides regnare iubeatur, Clerici et Laici multi ex ecclesia eiiciendi erunt. Neque tanti est concordiae studium habendum, vt exsequendo maiori officio obesse debeat. Vt vero scientiarum omnium, ita inprimis religionis doctor, si vir integer et honestus esse velit, in doctrinae, quam tradit, veritatem animo ab omni partium, sectae adeo suae etiam studio alieno inquirere debet. Quod officium nullo pacto, nullo iureiurando, nisi impium et ab honestate alienissimum fuerit, tolli vlllo modo potest. Sunt viri docti, moderatione animi et aequitate maxime commendabiles, qui, vt vnaquaeque ecclesia particularis doctrinam

v) In diss. de potestate principis circa symbola ciuium in religione ab ipso dissentientium. Viteb. 1711.

ſtrinam tamquam veram acceptam litteris
 mandet, neceſſarium, hanc ſcriptionem vero
 ſymbolica auctoritate munire, vtile eſſe opi-
 nentur. Hi ergo non neceſſitatem Symbo-
 lorum, ſed vtilitatem modo tuentur, ne-
 neſſitatem vero ad doctrinae ſcriptionem re-
 ferunt. Cuius ſententiae auctorum et pro-
 bitatem et perſpicaciam laudo proboque:
 ſunt tamen in hac etiam quaedam, quae mihi
 ſcrupulum iniiciunt, nec optimos viros diſ-
 ſenſum meum male laturos eſſe ſpero. Ne-
 ceſſitatem ſcriptionis antiqui Chriſtiani certe
 non perſpexerunt. Ante ſaeculum quartum,
 quamquam in plures haereſes abierat popu-
 lus Chriſtianus, *τοῖς* ſanctae doctrinae ex
 Apoſtolico, vt tum erat, Symbolo Cate-
 chumenis tradebantur, quod poſtquam didi-
 cerant ac intellexerant, ad baptiſmum ad-
 miſſi ſunt. Scripſit equidem Catecheſes il-
 luminatorum CYRILLVS Archiepiſcopus
 Hieroſolymitanus, vir minime *ὀρθόδοξωτα-
 τος*: quae vero tantum abeſt, vt catechiſmo-
 rum noſtrorum aut Symbolorum loco fuiſ-
 ſent, vt poſt praefationem potius lectorem
 in limine quaſi libri moniturus auctor, aut
 alius quis antiquorum, memorabilia illa ver-
 ba poſuerit: *Catecheſes illas illuminatorum ac-
 cedentibus quidem ad baptiſmum, et his qui hoc
 lauacrum habent iam fidelibus, legends exhibeas:
 catechumenis vero et aliis, qui non ſunt
 Chriſtiani, ne dederis: alioquin redditurus es
 Domino rationem.* An vero myſtagogicae
 ge-

genuinae, an spuriae sint, recte dubitatur. Ob hodiernum quidem rerum Christianarum conditionem, et ludimagistrorum ignorantiam; qui pueros praeter id, quod scriptum habent, nihil docere solent, catechismi necessarii sunt. Ast male consultum est sacris rebus, quod hominibus doctrinae omnino expertibus docendam religionem commiserint. Mandant ergo memoriae suae catechismos suos pueruli, neque propter illiberalem disciplinam fieri potest, ut rationes praeceptorum peruideant. Quotumquemque mihi dabis, qui his scholis egressus id didicerit, quod verae religionis caput est, animoque imbiberit sententias fidei in DEVM, et quem hic misit, IESVM CHRISTVM consentaneas, ad quas et consilia sua, et vitam omnem componat? Perutilem igitur scriptionem illam fieri posse, non nego; at omnino et simpliciter necessariam esse non video. Neque commode satis *systematicae* doctrinae causa interponitur. In sacris libris systematis formam Christiana doctrina non habet. Ex quo ego equidem colligere soleo, methodum systematicam in tradenda religione non omnino esse necessariam, propterea quod DEVS melius nouit, quae ratio communi hominum institutioni conuenientissima sit, quam catechismorum auctores omnes. Neque fas est, maioris cognitionis necessitatem in omnibus Christianis vrgeri. Non ex sola cognitione religio aestimanda

manda est. Quamquam enim sine scientia, religio nulla est, hanc vero illa augere potest; homo tamen minori cognitione, sed maiori pietate praeditus homini, qui scientiae quam virtutis studiosior est, religione antecellit. Magnus theologus religionis, et religiosissimus homo theologicæ scientiæ expers esse potest. Quod si hominum Christianorum, quin maxime etiam piorum plurimi, sacrorum dogmatum nexum aut perperam, aut parum distincte peripiciant, quod non facile quisquam in dubium vocauerit, nisi in terris nostris omnino fuerit hospes, ex eo colligere fas esset, plurimos Christianos, pios etiam religione vacare, cuius iniuriæ participes esse nolumus. Enimvero habemus scripta symbola: quot ergo illicitorum hominum ex his systematicam scientiam hauserunt? Systematum equidem auctores raro solent ex S. libris dogmata horumque nexum repetere, sed plerumque systemata aut ad arbitrarias sententias suas, aut particularis ecclesie placita condunt, S. litteras vero pro lubitu detorquent. et id probare iubent, quod, antequam consuluerant sacros auctores, verum firmumque fore statuerunt. Quod si vero etiam demonstratum esset non ad theologicam modo scientiam, sed ad religionem etiam systematicam cognitionem necessariam esse: fas tamen esset dubitare, an scriptio, quæ cognitione illa lectores imbuat, symbolica auctoritate munienda sit.

Sunt

Sunt quidem in sacrorum ministris, qui et necessariae cognitionis, et verae religionis expertes, nec officiorum suorum probe memores sint, atque dolendum est, homines ad nullam fere rem vtilis, nullo merito, neque ingenio, neque moribus, neque scientia commendabiles, qui annos aliquot in Academico, eoque saepe sat illiberali otio, deinde vero nonnunquam inter expertes bonarum rerum omnium homines consumserunt, ad obeunda sacra munera adhiberi; quoad vero opinio regnauerit, administrando sacro muneri quemuis hominem, eum etiam, qui nec ad dicendum ius, nec ad exercendam mercaturam aptus sit, parem esse, magistratus igitur non cogitauerint, munus ministrorum graue esse et sanctum, cui nemo digne praeesse nostro praesertim saeculo possit, nisi a litteris, rerum humanarum scientia, morum et probitate et elegancia instructus sit, malum illud non tolletur, quaecumque etiam cudantur symbola. Ingens habemus symbolorum corpus, quae cum commentariis et explicationibus sat magnam bibliothecam efficiunt: ea vero in augendam ministrorum scientiam et religionem magnam vim habuisse, nos equidem fugit. Neque ferendi essent ministri, qui nec ampliorem religionis, nec liberaliorem scientiam haberent, quam ea est, quae ex symbolicis libris hauritur. Quando vero sine litterarum adiumentis S. Scripturam intelligi non posse dicunt:

dicunt: id sententiae, quam nos equidem de sacris libris adhuc habuimus, aduersari ingenue fatemur. Ex eo enim effici posse videtur, doctorum modo hominum esse, sacros libros legere, quod quidem sacris litteris et antiquorum Christianorum consuetudini repugnat. Quamquam enim sunt S. Scripturae partes, quae ab illiterato homine intelligi nequeant, theologicam scientiam etiam homo philologiae, philosophiae et historiarum praesidio non munitus parare sibi non possit: id tamen, quod ad religionis caput pertinet, perspicue adeo traditur, ut quisque eius sensum facile assequatur, si a puero modo monitus fuerit, qui libri potissimum legendi sint. Iam dudum optavi, ut faciat quis rei periculum, quam acute finxit quondam CLERICVS, et Noui Foederis libros adolescentibus praeclaris ingenio, liberalibusque artibus ac naturali rerum diuinarum scientia probe imbutis, ab omnibus vero praeconceptionis, quas commendare potuisset particularis ecclesiae amor, opinionibus liberis legendos tradat, ut, postquam legerint, referant sensum, quem de Christiana religione ex S. Scriptura perceperint, quod nostro equidem iudicio delectabile humani ingenii spectaculum esset. Viri docti, hominem litterarum expertem multa vera, sed falsa etiam et abhorrentia ex S. Scriptura collecturum esse dicent: ad quae multa responderi possunt, nos nonnulla paucis expe-

pe-

pediemus. Diligens verique amans lector in fundamentalibus rebus, si locum alterum Scripturae cum altero contulerit, non facile errabit: si in ceteris errat, habet hoc cum doctissimis commune. Ast minus et rarius errabit, si fuerit ante liberaliter institutus. Quod si vero se ab omnibus erroribus omnino liberare non potuerit: vel in eo humanae fortis exemplum cognoscemus. Ex symbolis vero num falsa colligi nequeunt? Num post multiplicata symbola infrequentiores facti errores sunt? Ex his nostro quidem iudicio, quoniam eorum multa litterariorum et philosophicarum formularum plena sunt, abhorrentes a vero sententias longe facilius, quam ex Scriptura, indoctus hauriet. Tandem quod caput rei est, unde sciret, auctorem symboli non errasse, cum eum, nisi Papae instar venerari velit, errare potuisse, dubitare nequeat. Verum: alienum est, inquiunt, si publicorum doctorum in concione alter ante meridiem probet, quod a meridie neget et improbet alter. Quod vero necessario accidere putant, quando cuique ex solis S. litteris doctrinae formam sumere liceat. Vos ergo, quos propter religiosum propagandae sanctae veritatis studium et colo, et, si dicere fas est, diligo, admittetis, ut nemo ministrorum ex solis litteris sacris doctrinam suam petat, vel aliqui non petant, atque in humana caecaque fide acquiescant? Quod


I

ego

ego mihi equidem persuadere nolo: at nescio, qui factum sit, ut sibi olim non contradixerint; an post condita symbola sibi non contradicant; ah nulla omnino contradictio ferenda sit; vtrum verissimae et gravissimae contradictiones ex legendis S. Litteris, an ex theologorum disputationibus et philosophia theologica oriantur? Quando vero symbolicos libros, quos habemus, omnes incommodos esse adfirmant ipsi: alios tamen, atque ita, ut salva S. Scripturae auctoritate conscientiaeque libertate desideria nostris satisfiat, condi posse opinantur: ex viris doctis, ut cetera mittam, haec modo quaero: quis symbola illa condet? quis vobis, per fidem vestram vos obtestor, persuadebit, vos non posse sine impietate auctoris symboli sententia recedere? quem servandae symbolicae legis custodem constituetis? — — Concionatoribus, quorum plurimi litterarum expertes sunt, nullam doctrinae formam praescribere nobis periculi plenum opus esse olim ipsis visum est: postquam vero sexcentos, qui symbolis libris obedientiam omnes promiserant, eosque, ut hoc quidem a praecceptoribus suis acceperant, sancte servandos esse, statuebant, quidquid in buccam venerat, effutientes audiuimus: nec hoc malum symbolorum beneficio tolli, non persuasimus nobis, sed vidimus. Vellemus

verco

vero, omnibus sacrorum ministris decretum illud Synodi Pinczoviensis praeciperetur, vt a proferendis in concionem controuersis, doctioribusque ac difficilioribus quaestionibus abstinere. Quod hunc vsum allatum esset, vt in contradictiones, de quibus supra dictum est, non facile inciderent. Neque verendum est, ne sacri oratores non habituri sint, de quo publice dicant. Dogmata enim in S Scriptura perspicue tradita, tanta quanta est regendorum morum vitaeque instituendae scientia, historia sacra atque naturalis religio populariter et ad augendum pietatis sensum accommodate dicturis amplissimam materiam praebebunt. Verum haec haecenus: restat, vt ex historia persequamur fructus symbolicae fidei, quam HVMANAM vocare fas fuit, propterea quod patres ad concilia coacti symbolorumque auctores non aliam, quam ceteri homines, naturam habuerunt.



LIBER QVARTVS.

CAP. I.

QUOD si quos de conciliorum, latarumque in his legum vsu disputantes audire placet, magna erunt, quae Concilia et Symbole rei sacrae attulerunt, emolumenta: verum res factas consideremus, dialecticorum enim more a principiis rem repetere, et quid fieri possit, disquirere, ad rem praesentem nil facit. Certiorem redditam fidem securitati sacrae ciuitatis et sanctitati consullum, pacem restitutam esse, demonstrare velim, qui conciliorum praestantiam summi efferre laudibus solent. Certissimos non reddunt istorum saeculorum, quae super sunt, monumenta, non pacem, sed acerbiores lites tristioraque dissidia post acta concilia exorta esse, quam ante eorum congregationem fuerant. SVPICIVS SEVERVS

x) — — igitur frequentibus conciliis nihil actum, nostris in fide manentibus, illis de perfidia non cedentibus — — — hoc verum modo concilium dimissum, bono initio, foedo exitu est consummatum. Damnatur a Constantino Arius, in exilium pellitur, quocumque vero in gratiam Imperator redit: Dederat hoc tempori, vt Arium, Eusebium Nicomediensem et Theognin locis suis cedere iubeat

retro

ret, sed paullo post restituit Arium. Clementem epistola ad se euocat curru publico
 vsurum: cum formulam fidei offerret, in qua
 omiserat το ὁμοουσιον, rogaret vero, vt ab-
 scissis ζητήμασι et περιστολογιαῖς matri eccle-
 siae restitueretur, synodo Hierosolymitanae
 eum commendauit. Episcopi in epistola ad
 Aegyptios epp. narrant, Arium, cui impe-
 rator πίστεως ὀρθοδοξίαν ἐμαρτυρεῖ, in commu-
 nionem ecclesiasticam receptum esse. γ) Post
 aliquot menses, ceteros etiam episcopos re-
 stituit, eisque vel hoc indulgit, vt scriptis
 aduersam partem oppugnarent. Descripsit
 quidem SOCRATES formulam μετανείας,
 qua Eusebius et Theognis impetrarint resti-
 tionem suam, eam etiam SOZOMENVS
 repetit; sed falsam esse et ὑποβολιμαίαν scri-
 ptionem, vt multae aliae sunt in caussis hu-
 us generis, ostendit auctor apologiae so-
 ciorum portus regii. z) Sunt etiam, qui
 Constantinum, sensu credo antiquo, quo
 etiam Apostoli Ariani essent, quia non lo-
 quuntur vt Nicaeae praeceptum est, Aria-
 num factum esse dicant. Quamquam enim
 Homousianis fauisse Constantinum, dubio
 omni caret: testimonia tamen ab omni su-
 spicione libera, quibus confirmetur, eum
 ad mortem vsque huic parti addictum fuisse,

I 3 non

γ) SEMLERI. H. E. T. I. p. 139. EVSEB. de V.
 C. L. IV. c. 42. RVFF. I. II. SOZOM. II. 27.

z) SEMLERVS. l. c. p. 153.

non habemus. HIERONYMVS in Chronico: *Constantinus, inquit, extremo vitae suae tempore ab Eusebio Nicomediensi Episcopo baptizatus in Arianum dogma inclinatus.* a) LVCIFER CALARITANVS. Lib. I. ad Constantium imperatorem pro Athanasio scribens patrem eius (Constantinum) Athanasium persecutum esse — — Constantium etiam loquentem facit: *nisi pater meus benefecisset conferre se ad Arianos, non eius filii regnarem.* Quia ne scriptores quidem, qui in Orthodoxia Constantinum perseuerasse aiunt, qui fidei Nicaenae auctoritatem defenderent, eos Arianorum artibus deceptum vexasse negant. b) Constantius filius Constantini catholicos odio habuit c): Valens multis iniuriis laceravit. d) Quo factum est ut Homousiani, qui adhuc victores fuerant de Arianorum victoria quererentur. SVL

PII

a) NAT. ALEX. H. E. Saec. IV. diff. XXIV.

b) Allgem. Welthist. T. XIV. p. 87. §. 92.

c) ATHANASIVS in epl. ad. solit. vit. ag. Ruffin. l. 15-17. SOCRAT. II. 26. THEODORET. II. 1. SOZOM. III. 18. IV. 2. IULIANVS in Epi. LIII. ad Bostrenos Edit. Spond. p. 435. EPIPH. haer. LXIX. Allg. Welth. T. XIV. p. 148. §. 160. p. 182. §. 204. p. 179. 180. §. 201. quamquam crimine eum absoluit GREGORIUS NAZIANZENVS in Orat. III. et IV. Contra Iulianum.

d) RUFF. II. 2. §. SOCRAT. IV. I. 16. 17. 20. THEODORET. IV. 12. 13. SOZOM. VI. 6. 10. 11. BARONIUS. T. IV. An. 366. p. 162. An. 367. p. 201. A. 370. p. 208. 218. A. 372. p. 277. 297.

PICIUS SEVERVS e) — — — haeresis Arii porupit, totumque orbem inuesto errore turbauerat. Etenim duobus Ariis acerrimis perfidiae huius auctoribus Imperator etiam deprauatur: dumque sibi religionis officium videtur implere, vim persecutionis exercuit: atque in exilium episcopi, saeuitum in Clericos, animaduersum in laicos, qui se ab Arianorum communione secreuerant — — Tum vero Ariani, ubi doli parum processerant, vi agere discernunt. Nam quodlibet audere atque agere facile erat regis (Constantii) amicitia subnixis, quam sibi prauis adulationibus deuinxerant. Quin etiam ex consensione multorum inexpugnabiles erant. Nam omnes fere Pannoniarum Episcopi, multique orientalium, ac tota Asia in perfidiam eorum coniurauerant. — — f) Constantius apud THEODORETVM g) exprobrat Liberio episcopo Romano, ipsum vna cum Athanasio totius se mundi consensui opponere. Quota, inquit, pars tu es orbis terrarum, qui solus facis cum homine scelerato, et orbis terrarum ac mundi totius pacem dissoluis? Quanta fuerit Arianorum auctoritas, ex synodo Ariminensi, Sirmiensi formula, rebusque Ancyrae gestis intelligitur. De qua

14

Aria-

e) L. II. 35. 38. 39.

f) Conf. etiam. SOCRAT. I. 39. II. 2. 28. 30. 37. etc. SOZOM. IV. 6. RUF. I. 21. THEOD. I. 14. II. 16. 21. GREGORIUS NAZIANZENSIS Or. XXV. adu. Arianos.

g) l. c. II. 16.

Arianismi propagatione multis in locis questus HIERONYMVS, *totum orbem ingemuisse ait, et miratum esse, se tam subito factum Ari-
num.* *h)* Adfectarunt Ariani adeo nomen catholicorum, *i)* quod ne inane esse videretur, in contrariarum sententiarum assertores, vitium scilicet, quod dominantibus sectis commune esse solet, secuti iniurias fecerunt. Tanta mala sacris rebus attulit schisma, quod ex causa priuata ortum traxerat. *l)* Quid rei publicae intererat, Arium et Alexandrum se inuicem vocare haereticos? Vt vero Arianorum opiniones Nicaenum Concilium minime sustulit; sic nec Ephesinum Nestorianismum extinxit, qui oriente toto olim iam per Syriam, Chaldaeam, Assyriam, Mesopotamiam dispersus, sedes suas ad hunc usque diem fixit. Nec laetior fuit Chalcedonensis Concilii exitus. Triumphauit Eutychianismus, quamdiu in viuis fuit Theodosius. Quam atrociter in Catholicos fauuerunt Eutychiani? quare non ante concilium de Henotico cogitabatur, cum postea frustra ediceretur, nec ab orthodoxis, nec ab Eutychianis concorditer probatum. *m)* Cui vsui fuerunt tristes illae dialecticorum prae-

h) Dial. adu. Lucifer.

i) EPIPHAN. haer. XXXVII.

l) SOCRAT. I. §. THEOD. I. 2.

m) Vid. IABLONSKII diss. de Henotico, eiusdemque hist. ccl P. I. p. 154. Nec non MOSHEM H. E. saec. V. P. II. c. IV. §. 16. seq.

praeceptiones, quae sanctae veritati maiorem lucem non attulerunt, verum amplio-rem disceptationibus campum aperuerunt? Quamquam enim in Nicaeno Concilio, in quo patres sibi haud constituisse videntur, peregrinis, a S. Scriptura alienis, *ἀγράφοις* vocibus vti prohiberetur, ex quibus EUSEBIO auctore omnis fere ecclesiarum dissensio ac perturbatio, *συγχυσις καὶ ἀκατάστασις* orta sit *n*); ab illis tamen inde saeculis malum illud ad nostram vsque aetatem serpsit, vt in salutari doctrina, quam nos ratione duce et natura nunquam fuisse affecutos, verum diuinae gratiae munus esse. vno ore fatemur omnes, vanis formulis ludere et superbire velint, Apostolicae simplicitatis, quae maiorem pietatem primae ecclesiae pacemque conseruauit, obliti. Saeculo quidem secundo alia dogmata, quam symbolo Apostolico comprehensa, non tradebantur, summaque doctrinae de DEO et de rebus ad eum pertinentibus ante Nicaenum Concilium simplicitas erat: vt vero in litibus Ariani ab vtraque parte nouas formulas conditas esse vel ATHANASIVS ipse fatetur *o*), ita postea etiam ceteras doctrinas ad inuenta ab hominibus verba alligare non dubitarunt.

I 5

Dices

n) SOCRAT. l. 2. GELASIVS l. c. c. 36. p. 49.

o) In epl. de decr. Syn. Nic. contra haeres. Arian.

T. I. p. 400. SOZOM. l. 21. VI. 4. THEOD.

II. 28.

Dices fortasse, hunc esse vsum conciliorum, vt *haeretici et orthodoxi discernantur*: haec si tibi seria mens, nulla Christianorum pars verae doctrinae studiosior est, quam Romana. Sin habitas in repurgata ecclesia synodos putas: Lutherani quidem a Reformatis, hi ab Arminianis auulsi molesque, quibus a se inuicem arceantur, exstructae sunt. Res dignae sacris conuentibus! Pharisei cum Sadducaeis, quamuis opinionibus immane quantum a se inuicem dissiderent, in vno templo sacra celebrarunt, vtrisque etiam patuit ad summos honores aditus: Christiani de formulis saepe litigantes, et si res bona mente ageretur, in eo, quod caput rei est, consentientes cum fratribus vna ex Romana seruitute egressis, qui in vocabulis *ἀγροφαίς* dissentiunt, sacra communia habere religioni sibi ducunt. *Tolle sophisticas consequentias, tolle cauillationes atque calumnias, tolle denique superbiam et ambitionem, et facile de cetero conueniemus.* Quod quidem BERNEGGERI apud HEVMANNVM iudicium ita probamus, vt nostrum esse putaremus. Iudaeorum haereses illae quidem mutuo se odio persecutae sunt: quod vero Christiani, licet in multas societates abierint, neque vt illi Iudaei in vna ciuitate degant, adhuc non deposuerunt. Quis tam hospes est in re litteratorum publica, vt ignoret dictatores illos *Caluinianorum* et *Sacramentariorum* modestis nominibus scri-

scriptiones suas et commentarios exornantes. Neque caeci adeo sumus, vt in reformatam etiam ecclesia creatos vitio censores fuisse negemus. At ex pluribus vnum memorabile pacis studii exemplum commemorare fas esto, cui an aliud opponi possit nos equidem nescimus. Quum ex occasione ciuis cuiusdam Lugdunensis, cuius filiam ambibat adolescens Germanus Augustanae, vt loquuntur, Confessionis addictus, quaesitum esset, quo loco habendi forent ii, quos vulgo Lutheranos vocant, fratres, qui ad synodum Carentonae in suburbano Parisiensi MDCXXXI conuenerant, ex omnibus Galliarum prouinciis ab ecclesiis missi, vniuersi ita censuerunt: *quando Augustanae Confessionis ecclesiae cum ceteris reformatis in omnibus verae religionis principiis, articulisque fundamentalibus conueniunt, cultumque exercent purum ab omni idolatriae et superstitionis labe, si qui sint illius professionis homines, qui cum charitatis et lenitatis spiritu sacros ecclesiarum nostrarum coetus frequentent, earumque communionem expetant, iis sine ulla abiuratione praeuia, liberum esto ad sanctam Christi mensam nobiscum accedere, matrimonia cum nostrae confessionis feminis contrahere, et infantes baptismo tingendos de more offerre, atque suscipere, dum nostris synedriis in hoc ultimo casu sancte spondeant, se infantes, quos de sacro lauacro susceperint, neque directe vnquam, neque indirecte aduersus eam, quam nostrae ecclesiae cre-*

credunt atque profitentur, doctrinam sollicitaturos, sed ea iduntaxat fidei capita edocturos, de quibus inter nostras ipsorumque ecclesias conuenit. p)

LIBER QVARTVS.

C A P. II.

Ex discidiis illis, quae peperit humana fides, enatae sunt dirae illae vexationes, quae profanos adeo stupidos detinuerunt. In litibus Arianis, cum antistites et populi multitudo quemque a partibus suis auersum conuiciis lacerarent, eo tandem indignitatis res processit, vt sancta doctrina turpissimo risu ac ludibrio in theatris traduceretur. *q)* Neque honorificam peruersitatis illius mentionem iniicit AMMIANVS MARCELLINVS, qui *nullas infestas hominibus, inquit, bestias, ut sunt sibi ferales plerique Christianorum, expertus* (Iulianus). *r)* Abderitanae pectora plebis, vel inhumana potius, omnique sensu exuta habebunt, qui ferocitatem, qua homines ob opinionum dissidia in homines saeuiant, eamque ab omni non solum religione, sed etiam ratione et natura alienam non mirentur,

p) Conf. De pace inter euangelicos procuranda sententiae IV. traditae IO. DVRAEO. Londini MDCXXXVIII.

q) EVSEB. de V. C. L. II. c. 61. SOCRAT. I. 6.
r) Hist. L. XXII.

rentur, non detestentur, cum nec lupis vnquam hic mos fuit, nec leonibus, nisi in dispar genus. Ex eo autem tempore, quo fides humana legis vim nata est, hae etiam vexationes sumserunt initium. Exitiabilis illa sententia, errores hominum de rebus diuinis, si moniti mentem mutare nolint, poenis et suppliciis vlciscendos esse, postquam Constantinus otia Christianis fecerat, a multis probata, in certaminibus cum Priscillianistis et Donatistis exemplis roborata, Augustini auctoritate prorsus sancita, et ad sequentem aetatem traducta est. s) Dici vix potest, quam immanes in haereticos decreuerint poenas. *Eminet inter eas, vt THOMASII verbis vtamur, excommunicatio, eaque non intra terminos exclusionis a societate ecclesiastica permanens, sed exclusio ab omni consortio ciuili, exemplo praetenso Ioannis Euangelistae intuitu Cerinthi stabilita, ac horrendis ceremoniis peracta, et maledictionibus — — — adiunctisque adiurationibus execrandis, ex Iudaismo in Christianismum translatis. Quae excommunicatio extenditur etiam ad receptatores et defensores haereticorum. Quae adeo cum summam infamiam inferret, non poterant non eiusmodi excommunicationem sequi et alii effectus, infames alias concomitantes, et cum excommunicatio summa species infamiae sit, adhuc maiores;*

qua-

s) Auctor est MOSHEMIVS l. c. saec. IV. P. II. c. III. §. 16. p. 153. 154.

quales sunt: haereticis non esse seruandam fidem, in tantum ut nec subditi domino amplius teneantur, sed ab eius obsequio liberati sint. Quod haeretici ad dignitates et officia publica non admittantur, unde nec haereticus potest fieri imperator. Et filii quoque haereticorum usque ad secundum gradum paternae lineae et primum materane sunt inhabiles ad officium publicum et beneficium ecclesiasticum. Ob haeresin possunt sponsalia rescindi, et matrimonium contractum soluitur, nec mulieres haereticae gaudent priuilegio dotis, ac mulier scienter haeretico nubens, dotem amittit, eaque fisco applicatur. Amittunt patriam potestatem haeretici, et praeterea haeresis est inter iustas exhaeredationis causas, tam intuitu patris quam filii. Imo in genere haeretici non possunt succedere, nec ab intestato, nec ex testamento, nec legatum aut fidei commissum accipere, licet sit testamentum militis. Libri eorum prohibentur, et igne comburi iubentur, immo et illi, qui eos legunt, ultimo supplicio puniri. Bona haereticorum, si laici sunt, confiscantur, etiam post mortem, si clerici, eorum bona ecclesiis, a quibus stipendia receperunt, applicantur. Denegatur haereticis auxilium aduocatorum, contra eos admittuntur etiam excommunicati ad testimonium, immo non opus est, ut testium et accusatorum nomina iis publicentur; potest haereticis decerni poena exilii; damnantur etiam ad perpetuos carceres, immo ultimo supplicio afficiuntur, et denique honesta sepul-

pultura iis denegatur — — — *z)* Tantum potuit superstitio suadere malorum! tantae sunt animis caelestibus irae! Quo iure vero poenae istae constitutae sint, videant, qui inhumanitatem illam amant, maximorumque tumultuum faces saepe sunt et tubae. Placet forte AVGVSTINI somnium de Hagare domo Abrahami eiecta, cuius exemplo nempe vera ecclesia de falsa poenas sumere possit *v)*; aut MAIMBURGII de haeresi monarchiae inimicissima *x)*; aut THOMAE, qui haeresin cum ciuili crimine confert, et quia maius crimen sit, fidem quam pecuniam corrumpere, haereticos etiam durioribus poenis afficiendos esse putat *y)*; aut LIPSII cum Maimburgio facientis, in republica non tole-

z) Haec THOMASIVS in diss. de iure principis circa haereticos §. 56 - 66. dicta auctoritatibus confirmat.

v) Conf. BAYLE Oeuvr. T. II. a la Haye. 1727. p. 451. nec sibi constitit AVGVSTINVS, in disputatione enim aduersus Manichaeos: *quamquam Dominus, inquit, per seruos suos regna subuertat erroris, ipsos tamen homines, in quantum homines sunt, emendandos esse potius, quam perdendos iubet.* Apud Baelium in Dict. Art. Anabapt. Lit. G.

x) hist. du Calu. p. 96. *l'heresie est l'ennemie capitale de la Monarchie.* Refutatur a Baelio Oeuvr. T. II. Critiq. gen. de l'hist. du Calu. p. 54. Eiusdem Maimburgii axioma: *il ne faut souffrir, qu'une religion dans un Etat,* ibid. p. 71. examini subiicitur.

y) Secund. Secund. Qu. XI. Art. III. p. m. 24.

tolerandam esse, nisi vnam religionem 2)) aut Loiolitarum impiae artes, qui BODINVM adeo, quoniam principibus haereticos vexare fas esse negarat, in Atheorum numerum retulisse dicuntur? Longe alia praecipiant doctissimi iuris doctores; sanctissimae vero religioni, cuius causam se agere temere praedicant, impia ista atque inhumanam conamina quam maxime repugnant. a)) Adferunt equidem exempla Pseudoprophetarum et sacrificulorum ex Iudaeorum historia, quae vero cum haereticis et oeconomia Noui Testamenti conferri non possunt. Quod consilio, quo animo, Christianae religioni intolerans ingenium proprium, atque ob pacis studium Protestantes pro falsis Christianis habendos esse statuerit PRADESIVS, id quidem intellectu difficile omnino non est: hanc vero eius sententiam non esse cum ceteris eius opinionibus a Pontificiis publice notatam, admirabile esse videtur. Toleravit salutis nostrae reparator errantes, eorum imbecillitati mira sapientia succurrere solitus, impios modo, ac scelestos quam grauissime increpuit: qui se eius sectatores esse praedicant,

2) Doctr. Ciuil. L. IV. c. 3. Opp. Antw. 637. edit. T. IV. p. 47.

a) Conf. liber a Ven. RAMBACHIO Halae 1759. 1760. germ. idiom. don. *Schicksal der Protestanten in Franckreich*. T. I. p. 12. 35. Elegans etiam libellus Berolini 1767. editus: *Vom falschen Religionseifer*. p. 59. 89.

cant, acerbissimo odio dissentientes prosequuntur. O praeclaram illam imitationem! Veritatem quidem commendat Scriptura, verum etiam pacem. c) Infirmos fide non abiici, sed assumi, et imbecillitates sustineri iubet Apostolus. d) Quin auersi etiam a vera religione populi in ea fuerunt sententia, errantes tollerandos esse. *Differentium inter se reprehensiones*, inquit, CICERO, *non sunt vituperandae. Maledicta contumeliae, iracundiae, contentiones, concertationesque in disputando pertinaces indignae mihi philosophia videri solent.* e) SENECA de ira: *non est prudentis errantes odisse, alioquin ipse sibi odio erit.* Quamquam singulis gentibus proprius erat deorum ordo, et sua cuique colendi deos et placandi ratio; haec tamen religionum varietas nec bella, nec inimicitias inter populos, si ab Aegyptiis forte discesseris, concitavit. Iudaei etiam per totum fere terrarum orbem Augusti temporibus diffusi, quamvis multitudini propter religionis morumque differentiam vehementer exosi essent, profanorum magistratum legibus et mandatis adversus vim et iniurias populorum muniti erant. g) Facta sub HADRIANO vexatione, hanc post exerceri prohibuit, iniustum esse pro-

K

nun-

c) ZACH. VIII. 19.

d) MATTH. XII. 7. EPH. IV. 1-6. PHIL. III. 15-16. I COR. XIII. 4-7. GAL. VI. 1, 2, 14-16.

e) L. I. de fin. bon. et mal.

f) MOSHEMIVS l. c. p. 13. et 23.

nuntians, ut quisquam sine crimine reus constitueretur. g) Themistium VALENTI Arianorum oppressionem orthodoxorum dissuasisse, ex ipsis historiae ecclesiasticae scriptoribus constat. h) ANTONINVS Philosophus eiusdem lenitatis exemplum praebet, i) nec difficile esset plura addere, si alias pateretur locus. Rectam rationem secuti, vacuique prauis cupiditatibus homines, de humanis erroribus, id est, de suis acerbè non iudicabunt. Quam sibi igitur ecclesia conciliat auctoritatem tolerando impios, errantes atrocissime vexando? Inhumanum censent gentes a Christiana fide alienas vi et armis opprimere; quanto igitur potius errantes Christianos, ob opinionum dissidia scelestorum loco habere prohibebit sancte praecepta humanitas? Recte quidem BAEIIVS, si qui fuerint, qui religionis causa odisse alios velint, his expectandum esse, donec Aegyptiorum exempla secuti alii hos, alii Christianorum illos deos venerentur. l) AVGVSTINVS de haeresibus scripturo singulari DEI auxilio opus esse

g) SVLF. SEV. II. 31. Vexatio sub Hadriano facta SPANHEMII iudicio cruenta non fuit. Populos passim in Christianos clamores excitasse, nullo edicto Imperatoris. Conf. H. E. Saec. II.

h) SOCR. IV. 32. SOZOM. VI. 36. NICEPH. XI. 46.

i) EVSEB. H. E. L. IV. c. 13. et VALESIVS ad h. 1.

l) Dict. Art. HENR. ALTING. not. E.

arbitratus est, *cernis me, ut idagam*, in praef. libr. de haer. inquit, *piis ad Deum non solum tuis, verum et aliorum fratrum orationibus adiuvandum m)*: multo magis igitur haereticos iudicaturus hoc auxilio indigebit. Quod si piis precibus implorassent DEVM austeri iudices, non eo animi ardore in homines, eosque innocentissimos saepe saevissent: quod nunc autem in conciliis maxime placet, et cum rei ratione optime convenit, est precatio de condonandis peccatis in concilio- rum fine habita. Nobis, qui Romanae tyrannidis iugum excussimus, dedecori cedit, quum pontificiorum inhumanitatem recte accusamus, odium nihilominus in dissentientes habere, BOSSVETI adeo iniurias, quibus Protestantes premebantur, excusantis sententiae vim addere, se haereticorum poenis praeter Anabaptistas et Socinianos opposuisse neminem. At portentum conflatum est recens! incredibili admiratione, summo simul tristitiae sensu affecti sumus, quum ex commentariis de libris theologicis, qui Gedani eduntur, viri suis ceteroquin meritis

K 2

spe-

m) Quem locum citat BELIESOBRIUS in diss. *sur les Adamites*, quae extat in Bibliotheca Germanica. T. IV. Art. III. p. 118. ubi ille: il n'y a point en effet d'ouvrage, ou un Auteur ait plus de besoin d'être aidé de la Grace, que dans une histoire des hérésies, parce qu'il n'y en a point, ou il se trouve un plus grand concours de causes d'erreur. — —

spectatissimi acerbissimam vehementiam, eam-
 que a Gedanensibus approbatam esse intel-
 leximus. Ille vero in oratione sacra Vitte-
 bergae in indoctae multitudinis concione
 habita: *quod si rediret carus Lutherus meus,*
haecque videret atque audiret, superbos illos theo-
logos, commentariorumque auctores, non aliter
ac olim IESVS, ex aede et cathedra flagello
expelleret. Credite mihi, ex quo ecclesiae pri-
stina integritas restituta est, in coetibus nostris
peius, quam nunc, actum non est, neque ea vn-
quam impudentia in mediam ecclesiam se publice
immiserunt ἀπίστας ministri. — — Per
 DEVM O. M. quis vnquam sana mente
 praeditus, nec intemperato studio totus de-
 ditus atque occaecatus LVTHERO, viro
 ceteroquin summo, omnibusque nostrae
 quidem aetatis acerrimis defensoribus suis
 longe maiori eam, quam IESVS habuit,
 auctoritatem tribuere ausus est? aut quo in S.
 codicis loco legislator ille Vittebergensis
 legit, IESVM imbecillitatis humanae pa-
 tientissimum, errantes homines, aut theo-
 logos errores propagantes flagellis cecidisse?
 Quo iure theologi a Vittebergensi fide alieni
 ἀπίστοι vocantur? sed haec est hominum a
 Christiana mansuetudine auersorum consue-
 tudo, vt a nulla sibi iniuria temperent, si
 suae auctoritatis causa agitur, nuper adeo
 esset etiam, qui non Socinianos solum, quam-
 quam his etiam iniuria infertur, sed theolo-
 gos etiam humanae equidem auctoritatis ne-
 gli-

gligentes, multo vero doctiores, quam ut Socinianorum ullamque aliam inuentam ab hominibus de Trinitate doctrinam approbare possent, *Deistarum* nomine ornare non erubesceret. Quam turpis mater sit necesse est, quae detestandam adeo genuit, aluitque prolem!

LIBER QVARTVS.

CAP. III.

FIDEI humanae nimia veneratio tantos excitavit furores, ut in libros, quod prudentiori posteritati incredibile forte videbitur, non aliter quam in scelestissimos homines saeuierint. Nisi Numae Pompilii scripta iussu Senatus combusta essent, rectius dixisset SENECA: *eo saeculo ingeniorum coepisse supplicia, quo et desierint ingenia*. Quam profanorum imprudentiam imitati haereticorum iudices libros iisdem fere, quibus auctores, suppliciis multarunt. Non vetuit solum Constantinus librum, in quo Arius sententiam suam exposuerat, praelegere, verum etiam Arianorum libros omnes comburi iussit, poenasque proposuit istos asseruaturis. *n)* Habuit Imperator, qui crudelitatem imitarentur: *o)* nec consequentibus saeculis

K 3 de

n) SOZOM. L. I. c. 21. SOCRAT. I. 9. BAYLE
Diet. Art. Arius.

o) EVAGRIVS. L. III. 4.

de more illo decessisse homines acceptarum a maioribus rerum tenaces, GREGORII in liberales artes iniuria, controuersia REUCHLINI, Wormatiense datum a CAROLO QVINTO Academiae Vindobonensi de comburendis LVTHERI scriptis mandatum, exemplaque alia comprobant. Quod vero laudari ne in pessimi quidem generis libris potest, tam quod in illis multa nonnunquam sunt, quae refutandis aduersariis inferuiunt, quam ob suspicionem, in quam se adducunt, qui a libris poenas sumunt, velle causa sua diffisos argumenta, quibus resoluendis impares sint, vi et armis tollere. Quin poenae illae rebus humanis fraudi esse videntur. Qui obscuri erant, paucis cogniti, a paucioribus lecti ipso supplicio diuulgantur latius, quaeruntur intentius, cariusque emuntur. In tristissimis istis malis, quae generi nostro adfert humana fides et hoc est, vt mire imminuatur ac laceretur veritas. Quando enim in rebus a rationis acumine disiunctis hominum arbitrium legis vim obtinet, fieri non potest, quin bonis admisceantur mala. Cuius rei fidem facit, ac praeceptiones humanae auctoritate munitas diuinae fidei omnisque religionis contemnendae causas fuisse, historia docet. Quod si recte iudicauit IABLONSKI: *haereticos esse, qui fidem propriam legis loco ponant p)*: videant, qui haereses, quas vocant, quoquo modo tollere volunt,

p) In diss. de vera significatione vocis *oigeris*. §. 6.

ne sibi pessimae haereseos notam inurant ipsi. Quum praecisa enim iudicandi sententiamque suam proferendi potestate, veritas ipsa humano imperio subiici videtur: nae humana fides veritati longe inimicissima habenda erit. Apostoli quidem volunt, vt *omnia probemus, neque cuilibet credamus q)*: quod verò fieri nequit, quando imperium accepit humana auctoritas. Libertas sentiendi, quae velis, et quae sentias, dicendi puritatem reddidit sacris rebus, quibus repurgandis, si se fidei humanae vinculis alligari passus esset, inhabilis fuisset LUTHERVS. Neque religionis scientia, si ab eo nempe, quod sanctioris doctrinae caput est, et in sacris libris diserte traditur, recesseris, omni ex parte perfecta est, vt, quo vltra progrediantur homines, non habeant. Memorabilia nobis videntur, quae GOHRENIUS in fine disputationis *de fermento Pharisaeorum* sub praesidio WEISSENBORNII lenae impetrandorum Academicorum honorum causa habitae: — *breuisque* (alius scilicet temporis opportunitati reseruanda est) *disquisitio* de reliquiis fermenti Pharisaici in ecclesia Christiana adhuc dum obuiis, *nisi forte ab hocce instituto me absterruerint, quae Abrahamo Heidano easdem in Reformata Ecclesia delitescentes quaerenti, indaganti, omnibusque palam facienti oborta sunt negotia.* Qui placitis hominum vim legis vindicant, sibimet libertatem adimunt ipsi, et

K 4

te-

q) 1 Thess. V. 21. 1 Io. IV. 1.

temere in se legem sanciant iniquam. Dum enim quae volunt, et credunt libenter, et quae sentiunt ipsi, ceteros sentire sperant, iubent, cogunt, ne umbra quidem libertatis remanet. Eo enim consilio humana fides inuiolabilis esse dicitur, summaque, qua fieri potest, munitur auctoritate, ut credendi libertas tollatur. Quod si e sacris libris modo, eorumque dubitationem nullam relinquentibus apud animum locis repetenda doctrina esset, periclitarentur nonnunquam inueteratae opiniones, quae ut saluae atque integrae essent, formulae condebantur ceteris Christianis praescribendae. Verus Papismus, qui non solum intra Romae moenia residet, sed longe lateque sub lenioris nominis simulatione dominatur. *Peccatur Iliacos intra muros, et extra. Equidem scio, symbola usus non contemnendos praestare — — — cauendum tamen, ne nimis urgeantur; neque nimis specialia dogmata definiant, ne conscientiae tenebrae, quae nihil praeter S. Scripturam in rebus fidei assumit, vis inferatur. Exemplis demonstratum est, huiusce coactionis effectus plures malos, quam vnquam bonos fuisse: lege historiam motuum praepter Concilium Chalcedonense, ut et Henoticon Zenonis excitatorum, ac contremisce. Haec quidem Vir Apostolica pietate praeditus, IABLONSKI: audi alium celebrem doctorem. TURRETINVS in oratione de adulterati Christianismi causis: mancipandis, inquit, animis, atque ad assensum inuitis trahendis*

dis nouae fiebant de credendis leges, noua symbola fidei, nouae sanctiones, noua anathemata in eos, qui vel latum unguem circa res saepe obscurissimas, neque in scriptura definitas a receptis placitis vocibusque discederent. Sic homines se homines obliti, DEI propria sibi sumserunt. Sic iugo a DEO imposito aliud atque aliud iugum addidere. Sic fides imperata, quae suaderi potius debuit, quaeque soli DEO suberat, humanis placitis, atque imperiis subiecta est conscientia; plane contra exemplum Apostoli, qui non fidei dominari, sed fidelium gaudio seruire, sui muneris esse censebat. Quo factum est, ut multi sint ab inquirendis aliorum, promulgandisque suis sententiis deterriti. Quum enim fama malum sit, quo non aliud velocius ullum mobilitate viget, viresque acquirat eundo, tam ficti prauique tenax, quam nuntia veri; veriti, ne haereticis adscribantur, muneribus moueantur, eiiciantur e patria, vel carcere fatigentur et vinculis, silent, aut cum somniantibus somniant, meliora probantes deteriora sequuntur. O tyrannidem! o simulationem! Neque nobis quidem consciis aliam originem, quam ex humanae auctoritatis nimio studio, fraudes illae sacrae habuerunt. Mittimus profanorum nugas, quibus credulum vulgus deceptum sunt sacerdotes, qui se a diis edoctos esse ac per oracula deorum voluntatem et futura praedicere venditarunt, quum olim iam mirabile philosophis visum est; quod non rideat

deat haruspex, cum haruspicem viderit: at Christianorum res quam turpibus dedecoratae fraudibus sunt? *Pias fraudes, immopotius impias, spurios foetus tum Apostolis, tum Apostolicis viris adscriptos, Imperatorum donationes fictas, Pontificum pseudodecretales, falsa miracula, legendas putidas, aliaque id genus commenta adulterando Christianismo, vel corruptelis saltem confirmandis plurimum inseruisse, omnino peregrinus sit in ecclesiae rebus,* inquit TURRETIVS, *qui nesciat, ad eundem fere modum, quo, qui genuinis nobilitatis instrumentis destituuntur mendacia cudere non erubescunt.* Caue putes, ab hoc vitio, antequam in vniuersam ecclesiam imperium Romanus episcopus adfectaret, immunes fuisse Christianos: cum ipsa fide humana et natum est malum, et adoleuit. Capitalis ille error: *fallere ac mentiri virtus est, si res sacra hoc vitio iuuari queat, iam ante saeculum quartum approbatores suos habuit. Quantos ineptissimarum fabularum acervos, quantumque piorum mendaciorum exercitum per omnia saecula, infelici verae religionis fato produxerit, dictu incredibile esse ait MOSHEMIVS.* Vereor ego, inquit, *ne qui curiosus maximorum et sanctissimorum huius (quarti) saeculi doctorum res gestas et libros explorauerit, omnes fere hac scabie inquinatos inuenturus sit. Non AMBROSIVM, non HILARIVM, non AVGVSTINVM, non GREGORIVM NAZIANZENVM, non HIERONYMV M excipio.*

Ex

Ex fide humana oritur etiam *inconstantia et mutabilitas mentis*. Quum enim ficulneo fundamento innititur, ubicumque maior accesserit auctoritas, aut homo quem auctorem secuti sunt, mutet opinionem, religionem etiam mutant, eademque temeritate, qua alteri se olim parti adiunxerant, ad alteram transeunt. Quod quidem ex Christianorum post Nicaenum Concilium exemplo intelligitur, qui nunc ARII, nunc ALEXANDRI factioni adhaeserunt, prout aut huic, aut illi fauerent Imperatores. Fidei tandem mancipia non dubitant, diuinam nonnunquam legem violare, vt seruentur hominum instituta. Vtrum hoc in coetibus, qui se a sordibus Romanis pueros esse praedicant, nunquam accadat, iudicet diligens rerum, quae fiunt, isque candidus aestimator. Quibus malis omnibus annumeranda etiam est impia illa religionis contemtorum audacia, qua diuinis humana miscent mendaciis suis speciem addituri, cuius rei specimen dedimus in IVLIANO.

LIBRI QVARTI

CAP. IV.

QVI fieri potuerit, vt humana fides, licet plurimi probe norint, quam vana sit eius auctoritas, sancte adeo et culta sit, et colatur, atque tantorum malorum causas ac fontes sine acerbissimae tristitiae sensu indicare non possumus. Vtinam in his causis praeconceptae modo opiniones, neque improbae atque impurissimae cupiditates essent. Opinio quidem temere assumpta est, vt quaeque sententia antiquissima est, ita eam etiam verissimam esse. Quo fit, vt SYMMACHVM sequantur, qui: *si longa, inquit, aetas auctoritatem religionibus faciet, seruanda est tot saeculis fides, et sequendi sunt nobis parentes, qui feliciter secuti sunt suos.* Cui antiquitatis studio se interdum adiungit inuidia, nouitatem ab aliis allatam inuisam reddit, et in mustaceo quaerit laureolam.

Hi sunt inuidiae nimirum — — mores,

Praeferat antiquos semper vt illa nouis.

*Sic veterem ingrati Pompeii quaerimus
umbram,*

Et laudant Catuli Iulia templa senes.

Sunt

Sunt etiam, qui turpe putent, parere iunioribus, et quae imberbi didicerint, senes perdenda fateri; qui eruditione sua inflati, opiniones suas non commendent solum, sed aliis inuitis etiam obtrudant, nec quemquam priorem ferre possint, nec parem; qui sibi soli sapere videantur, sua solum legant, sua ament, ceteros indicta causa condemnent; qui quaerant gloriam ab hominibus, seque ad illorum consuetudinem componant; qui oculis male lippi inunctis in amicorum vitia tam cernant acuti, quam aquila, aut serpens Epidaurius. Alii facultatibus suis consulere volunt, tenentque maiorum statuta, ut amicos sibi et fautores, horumque beneficia concilient. Quod si igitur metuendae aduersitates nullae essent, plures prodirent veritatisque honorem et puritatem vindicarent, qui nunc equidem iniquo metu oppressi improbe silent. Sic vero, inquit MOSHEMIVS, *vita est hominum, ut prudentes sileant, plebs temere credat, fallaciarum architecti triumphent, quum veritatis professioni multum periculi adiunctum est.* Alii Curios simulant, et Bacchanalia viuunt: famam sibi conciliaturi in miseros haereticos feroci atrocitate irruunt coercendae propriae sibi improbitatis immemores. Plerique forsitan eunt, quaitur, duces suos caeco impetu secuti, quod sinistro omine ad docendi munus accesserunt, quum ad circum-

du-

ducendum aratrum adfecti melius esse videantur, aut ignavi adeo sunt, ut de religionis causa parum solliciti sint, sed otium, immo vero turpissimum languorem in summis deliciis ponant. Tantum vero abest, ut, cuius iniquitatis nos maxime puderet, viros traditarum ab hominibus opinionum tenaces omnium illorum vitiis incusemus, ut plurimos ab omnibus illis puros esse non speremus modo ac optemus, verum etiam confidamus. Plurimi nimis dediti antiquorum doctorum venerationi sunt, quae ex liberali pietate proficiscitur, atque laudabilis omnino esset, nisi a cognoscendo vero abstraheretur. Quamvis enim pius error sit, atque excusabilis, quin inhumana veritatis defensione longe amabilior: suam tamen, id est erroris naturam exuere, et cum veritate, cui repugnat, consentire non potest. Ni verum omnia nos fallunt, aequiores se humanae fidei aduersariis praebuissent, nisi fuissent illi, qui nouitatis, quam veritatis studiosiores aberrassent saepius a vero, et in admirabilem

biles opiniones, quin vitia interdum etiam incidissent. At causa sua nihilominus humanam fidem cadere, quisque videt, qui videre vult. Quaecumque vero causae sint, late patet humanae auctoritatis regnum, et a pristina integritate religionis cultores auocat. Confer igitur, si placet, hodiernam Christianismi faciem cum ea, quam aevo Apostolico habuit, et vices nostras luge. In antiquissima ecclesia nulla fuerunt Concilia, Symbola nulla, neque vexationes, neque pompa in rebus sacris, liberalis vero et decora in tradenda doctrina sacra, interpretandisque oraculis ab omni vana subtilitate abhorreas simplicitas, pietatis, modestiae, tolerantiae summum studium; redi ad nostra tempora, et mirare — — — hem quo sunt res redactae! — — — Concilia, Symbola, Confessiones, Canones, Decreta, sed dissidia etiam, rixas, contentiones, conuicia, bella, quaestiones tortuosas et difficiles, publicorum sacrorum indiligentissimam administrationem, eamque ad opinionem et consue-

fuetudinem magis, quam ad rationem compositam, vitam a ceteris gentibus, blanda solum morum specie, quam elegantem dicunt, abhorrentem. Haec ut se habeant, ubi ad exitum nos conuertimus, qui nobis omnibus idem patet, quam apertissimum est, nullius in sacris rebus momenti humanam fidem esse. Quando enim felix faustaue venerit hora mortalium rebus exemptos ad beatiores sedes euectura, fides ista nullam habebit in animos vim. Neque quaeretur in Concilio nouissimo, eoque solo vere oecumenico de Conciliis, de Symbolis, de Decretis, de Societate Ecclesiastica, nec de vllis opinionibus: — — ἐφ' ὅσον ἐποιήσατε ἐν ταύταις, τῶν ἀδελφῶν μου τῶν ἐλαχίστων, ἐμοὶ ἐποιήσατε: de hoc quaeretur, ex hoc iudicabitur. Vtinam huius exitus memores id vnum curarent, ut olim ex praesentis vitae diuersorio laeti possint abire!

DE
PRAECIPVIS
CHRISTIANAE
DOCTRINAE
CAPITIBVS
LIBER SINGVLARIS.

Εἰ τις ἑτεροδιδασκαλεῖ, καὶ μὴ προσερχεται
ὑγιαίνουσι λόγοις τοῖς τοῦ κυρίου ἡμῶν Ἰησοῦ
Χριστοῦ, καὶ τῇ κατ' εὐσεβειαν διδασκαλίᾳ,
τετυφῶται, μὴδὲν ἐπισταμένος, ἀλλὰ νοσῶν
περὶ ζητησεῖς καὶ λογομαχίας, ἐξ ὧν γίνεται
φθονος, ἔρις, βλασφημιαί, ὑπονοιαί πονεραί,
διαπαράτριβαι διεφθαρμένων ἀνθρώπων τον
νουν, καὶ ἀπεσερηνμένων τῆς ἀληθείας, νομι-
ζόντων πορισμὸν εἶναι τὴν εὐσεβειαν. ἀφίστατο
ἀπο τῶν τοιούτων. 1 Tim. VI. 3. 4. 5.

DOCKING

...



QVVM nobis aliquot abhinc annis scriptio theologica publicae disputationis causa edenda esset, id quidem vel in ipso eius ingressu ac limine commendatum nobis habuimus, ut de ea re scriberetur, quae et gravis esset, et theologo non indigna, cuiusque assidua meditatio ad hominum propagandae sacrae doctrinae studiosorum sensus moresque formandos aliquid conferret. Quae enim ceterae institui atque haberi solent disputationes, quamvis elegantes sint, et varia eruditione, eaque politissima refertae, adeo ut auctores operae multum oleique in lucubrationibus suis consumserint, si nullam vim in animos habent, neque ad eos flectendos valent, neque iuuant ad veram sapientiam curam suam atque operam collaturos, non multum certe profunt societati humanae, atque hoc vno nomine laudabiles sunt, quod famam hominum et eruditionem illustrent: quae virtutis autem amorem augent, ad eumque ita quemque maxime incitant, ut est

quisque veri honestique studiosissimus, eae maxime decent virum constantem, qui se desidiosissimo otio diffuere, languescere, et nihil agere existimat, si horum cogitationibus perdiderit neque patriae, neque ciuibus, neque studiosae litterarum iuuentuti profuturis. Quum ea igitur, quae DE PRAECIPVIS DOCTRINAE CHRISTIANAE CAPITIBVS recte praecipuntur, insignem posse sanctorum litterarum cultoribus vsum adferre viderentur; ex rebus etiam antiquis temporibus, quin nostro etiam aeuo in sacra ciuitate gestis, doctrinam illam non sine magno veritatis atque pacis detrimento aut perperam traditam, aut plane detortam esse cognoscere-mus; voluimus in ista equidem causa, vt in ceteris, non aliorum, sed nostro iudicio vti. Quamquam enim de ea re scripserunt viri doctissimi; plurimi tamen non tam veritatis, quam partis causam, cui se adiunxerunt, dederuntque nomina sua, egisse videntur, vt adeo haud inutilis sit hominis labor, qui neglecta hominum, partiumque, legumque humanarum auctoritate, rectam rationem, et rite factam sacrarum litterarum interpretationem sequatur. Nunc vero superioribus de humana fide libris, in quibus crebra *fundamentalium articulorum* mentio facta est, vt, quae de his ibidem diximus, sententia nostra paullo magis perspicua sit, disputationem istam non incommode adiungi posse

posse putauimus. Quam rem antequam persequamur, praemittenda nonnulla sunt de religionis vera natura, ex quibus eo facilius intelligatur, quae debeant esse dogmata, quae *fundamentalia* dicere solent.

De vera itaque religione id vel primo loco praecipiendum esse; non temere, sed grauissimis rationibus adducti statuimus, eam late adeo patere, vt latius non possit, vereque esse *catholicam*. Neque hominum genus est, neque communio, ne terra quidem aut tempus, ad quod non sit accommodata. Et iuueni competit et seni, cum Europaeo, tum Americano, homini nato in vmbrosis Heliconis oris, aut super Pindo, et alteri, qui in gelida Lapponia in lucem susceptus est, melancholico; qui tristi natura et recondita est, et ardentioris atque feruentis animi homini, et hilari ac ad omnes laetitias prompto, regibus non minus quam subditis, opulentis ac pauperibus, vnicuique demum homini, cuiuscumque generis; aetatis atque ordinis sit, quocumque se inclinet mens eius atque sententia, siue sub populi, siue optimatum, siue regis singulari imperio viuat. Quum enim DEVS amat omnes homines, eosque eo consilio condidit, et in hoc telluris domicilio collocauit, vt salutari religionis beneficio sempiternam olim felicitatem adipiscantur; partes praecipuae, quae ad ca-

put eius pertinent, ex quibus caeterae tamquam riuuli ex fonte deriuantur, eae sint necesse est, quae possint mortalium cuique tradi. *Veritas tua, DOMINE, nec mea est*, inquit AVGVSTINVS, *sed omnium, quod ad eius communionem publice vocas, terribiliter admonens nos, ut nolimus eam habere priuatam, ne priuemur ea.* Nam quisquis id, quod tu fruendum omnibus proponis, sibi proprie vindicat, et suum esse vult, quod omnium est, a communi propellitur ad sua, id est, a veritate ad mendacium. *) Quod si statuere velis, veram religionem non esse omnium hominum et locorum, sed quorundam, rationibus firmissimis non modo reclamabis, verum sacra etiam non gradu, ut loquuntur, sed re ipsa a se diuersa et abhorrentia simul vera et recta esse posse statues. Religionis antiquae causam interponent quidem, huius vero partes praecipuas eas fuisse meminerint, quas poterant omnes homines doceri. DEVM esse, eumque solum et effectorem rerum omnium, et rectorem, missurum olim redemptorem generis humani, cuius aduentum praedixerunt vates insolitis dotibus ac muneribus ornati, quorum princeps MOSES leges promulgauit, et populo, cui ferebantur, et saeculo, et terris regionibusque, quas occupauerant, et ipsis promissionibus diuinis accommodatas, quis fuit, qui animo haec non comprehenderet?

*) Confess. L. II. c. 25.

disset? neque ritus illi et cerimoniae religionis ita fuerunt propria, vt seiungi ab ea non potuissent. Sacrificia quidem, diesque festos, et cunctas illas cerimonias non esse eam, quae sibi placeat, religionem DEVS saepe testatus est. — — — Audi, mi popule, dum loquor, Israelita, dum te commonefacio, DEVS ego tuus. Non equidem te propter sacrificia tua, propter tuas hostias reprehendam. Non tauros ex tua domo, non hircos ex tuis accipiam caulis. Nam mea sunt omnia siluestria animalia, omnes in mille montibus bestiae. Omnes ego montanas volucres recognosco, terrestresque beluae me penes sunt. Quod si esurirem, non id tibi dicerem, meus quum sit mundus, et quidquid in eo continetur — — — Quorsum mihi multitudo sacrificiorum vestrorum? satur sum holocaustis arietum, et adipe pinguium — — ne pergitote vanum offerre munus, suffitus abominationi mihi est — — nouilunia vestra, et statas ferias vesiras odi — — lauate vos — — Non in externis rebus, multo minus in iis, quae cum humana societate exiguum, aut nullum paene commercium habent, verum in sensibus atque consiliis ad DEI voluntatem compositis, et animi vitaeque integritate sita religio est.

Ex quo intelligitur, non omnino spectatiuam, nec artium similem, quae delectationis, aut captandae gloriae causa addisci

solent, sed moderatricem animorum, cogitationum, ceterarumque rerum omnium, aequae mentis in aduersis rebus, et in secundis a nimia laetitia temperatae custodem esse. Quod si aliter se res haberet, quid esset, quod nos ad colendam religionem impellere posset? ut honestus quisque esse potest, licet matheseos sit ignarissimus: ita etiam esset sine religione. Neque digna esset laude, qua mathesis digna est, quae et litteris, et vitae communi, rebusque ciuilibus atque militaribus praeclaram vtilitatem adfert, si illa e contrario otii consumendi gratia hominibus data esset, ut haberent, quo tempus fallerent.

Neque igitur potest, si hominum est, quibus ea, quae nobis omnibus, data fors est, nostro quidem iudicio *vlli mutationi obnoxia esse*. Per praesens saeculum, siue *aiawa* dicere malueris, quoad quae nunc est, gentis humanae conditio durauerit, natura religionis eadem atque potestas, et dogmata principalia eadem erunt. Quod tam ex eo intelligitur, quod de religionis amplitudine supra dictum est, quam ex hoc etiam, quod DEVS alioquin miracula miraculis augeret, aut homines dubitare pateretur, quando abrogata antiqua, noua religio imperata sit. Potest igitur in rebus, quae ex libris sacris solis hauriuntur, neque crescere, neque mutari, nisi

nisi se DEVS hanc mutationem approbasse publice declararit.

Quae verae religioni vindicauimus, haec cuncta *Christianae* propria sunt. AVCTOR eius discipulos suos *vadere* iussit *doctum* OMNES gentes, atque PAVLLVS, *extitit*, inquit, *diuina beneficentia cunctis hominibus salutaris, quae nos erudiat, ut impietate, mundanisque abiectis cupiditatibus frugaliter et iuste pieque viuamus.* Quis est, qui tueri haec officia non possit? quicumque fidem seruat et amorem, Christianus est. Quisque vero seruare potest, siue in Lybia natus sit, siue in Siberia, mansueta aut barbara gente, dominus aut seruus fuerit, siue cum Archyta mare, et terram, et numero carentem arenam metiatur, atque aerias tentet domos, et animo rotundum polum percurrat, siue litterarum expers atque rerum omnium ignarus sit. Neque genus est hominum, neque aetas, neque sexus, cui recte viuendi rationem non monstret, aut misero solatium non praebeat. Omnis eius uis enim in regendis animis ac moribus sita est. *Vt corpus*, inquit IACOBVS, *absque spiritu mortuum, ita fides sine operibus mortua est.* Cui certe non refragatur PAVLLVS, qui quidem *sine merito sola fide saluari* homines docet, simul vero cum Romanos tum Galatas de seruandis omni pietate officiis quam grauissime admonet.

L 5 Ipse

Ipse adeo sacrorum nostrorum AVCTOR: non quisquis, inquit, mihi dicet, Domine, Domine, intrabit in caeleste regnum, sed qui fecerit, quod vult meus pater, qui est in caelis. Quod si denique sacras litteras sequi lubet, neque negari poterit, ab omni mutatione Christianam doctrinam alienissimam esse. — — verum etiam si vel caelestis angelus vos diuersum doceat ab eo, quod vos docuimus, esto detestabilis. Vt iam diximus, nunc iterum dicam: si quis vos diuersum docet ab eo, quod accepistis, esto detestabilis. Haec quidem PAVLVS ad Galatas. Quod si immutanda religio esset, vel inuentis augenda, aut noua dogmata patefacta essent, aut humana auctoritas diuinam aequaret: vtrumque vero abhorret, alterum enim adfirmare delirantis atque amentis, alterum dementis est. Sub veteri testamento fundamentales, inquiunt, non erant, qui nunc sunt articuli. At tum non erat religio Christiana: de hac loquimur. Haec sunt, quae de religionis natura praemittere voluimus, vt ex illis, tamquam suis causis Fundamentalium Articulorum notae eo melius intelligi possint. Alii enim non erunt, quam quos esse religionis natura patitur, cum qua quotquot pugnant, neque conciliari possunt, sunt ex fundamentalium numero eiiciendi.

Vt fundamentum suum aedes habent, cui moles imposita est, et a quo tanta quanta est

est fertur, ac sustinetur; sic in disciplinis etiam ad formam redactis, et in ordine dogmatum sunt quaedam initia quasi et fundamenta, quibus cetera constituuntur. Thesis illa, quam *principium contradictionis* vocant philosophi, fundamentum est omnis cognitionis humanae, quo concusso nihil est, quod certum sit, ut neque verum et mendacium, lucem et tenebras, alba et atra discernere possis. Theologiae naturalis fundamentum est, *esse DEVM*, quod si infirmum esset, theologia omnis somnium esset atque vanitas. Christianae itaque doctrinae eiusmodi sint quoque necesse est initia, quae ceterorum dogmatum rationem habeant, et ex quibus aestimanda sint cetera, quae doctoribus statuere placuerit. Ex hoc genere ea dogmata esse, nos equidem existimamus, quae a nemine possunt negari, qui Christianus esse vult, Christianae itaque religionis propria adeo sunt, ut ab ea diuelli nulla ratione possint: at ea, ex quorum negatione fundamentalium negatio recte colligitur, in fundamentalium numero collocare propterea nolumus, quod ea perspicacia pauci sunt homines, ut, quid ex quaque re aut opinione effici et cogi possit, videant. Fuerunt, qui ex DEO res omnes emanare docuerunt, licet impium, qui ex opinione illa confici potest, Spinozae errorem auersati sint. Quod si haec ab illis distinguere ac separare lubet, haec quidem
ad

ad alterum, illa ad primum ordinem referenda sunt: nos vero de articulis primi ordinis, qui fundamentales recte vocantur soli, disputabimus. At multae extiterunt controversiae, quod in aliena illa sententia fuerunt, quidquid non sit problema, id esse articulum fundamentalem. Multae sunt sanctioris doctrinae partes, quae neutrum sunt, IESum, dum puer esset, fugisse cum Iosepho in Aegyptum, neque problema est, neque articulus fundamentalis. Male igitur praeciipiunt, qui ita quemque maxime ad scepticismum inclinare docent, ut quisque problematum et fundamentalium dogmatum discretionem maxime negligit. Heu miseros homines! Disceptant de religionis essentia, in quam disceptatio ipsa peccat.

Natura eorum dogmatum, quae fundamentalia vulgo dicuntur, propius ac curatius considerata, ea posse quam *maxime esse composita* intelligimus, ut plura alia adeo in se contineant, et quasi ambitu suo completantur. Exempli in promptu sunt. *Haec est*, inquit IESus, *vita aeterna, si te solum cognoscant verum Deum, et quem misisti Iesum Christum.* De cognitione sola loquitur, de practica vero, quae fides est: iniicit modo mentionem legationis suae, sed mortem certe reditumque ex inferis non excludit, quibus legationis suae auctoritatem quam luculen-

culenter comprobauit. Non potest quisquam fidem habere, nisi cognoscat verum DEVM, et, quem misit, filium: neque IESUM legatum DEI esse affirmabit, qui mortem eius reditumque negauerit. — *Si Christus non resurrexit, vana est vestra fides.* Reitus ex inferis est itaque fundamentum fidei, quem qui vere accidisse existimat, is certe IESUM mortuum, et Filium DEI, et salutis nostrae reparatorem esse credet. — — *Statueram nihil scire apud vos, nisi Iesum Christum, eumque crucifixum.* In sanctam scilicet crucis scientiam cetera conclusa ac comprehensa esse, docet PAVLLVS, vt homo, qui de morte redemptoris recte sentiat, non deliret in eo, quod caput fidei est.

Dari articulos fundamentales et religionis natura comprobat, et sacri scriptores aperte testantur. Quis est, qui neget, non esse ad sciendum aequae necessarium, quot filios habuerit Iacobus Isaci filius, aut quae nomina habuerint Apostoli, aut quo mortis genere perierit perfidus Iudas, quam ea sunt, quae DEVS salutis nostrae gratia fecit? PAVLLVS quidem: *lac vobis bibendum dedi,* inquit, *non cibum.* Non omnia igitur omnes docendi sunt: sunt alia, quae tenere debent omnes, alia vtilia quidem, sed non omnino necessaria sunt. — *Ego pio Dei beneficio in me collato, vt sapiens architectus fundamentum ieci:*

ieci: alius superstruit. Sed videat quisque, quomodo superstruat. Nam fundamentum aliud iacere nemo potest, praeter id, quod iactum est, qui est Iesus Christus. — — — — Alia igitur res est fundamentum, alia vero, quae illi superstruitur. Qui molem superstruunt, siue illa manserit, siue combusta fuerit, manebunt, licet alteri nullum periculum imminuerit, alter ex eo tamquam ex igne euaserit, vterque saluabitur, si modo inhaeserit fundamento.

Quum non facile quisquam negauerit, esse quasdam Christianae doctrinae partes ceteris grauiore: disquirendum nunc erit, ex quo intelligi possit, vtrum dogma aliquod fundamentale sit, an ad religionis fundamentum non pertineat, in qua quaestione resoluenda arx disputationis nostrae sita est. Disputabimus vero de iis solum dogmatibus, quae *positiua* vocari solent. Fundamenta quidem religionis naturalis Christianae simul fundamenta sunt, de illis tamen disputare philosophorum est. At positiua dogmata aut diuinam, aut humanam fidem sequuntur: haec sectarum, illa verae ecclesiae propria sunt. Articuli fundamentales, in quorum naturam inquiremus, partes Christianae doctrinae, non humanae disciplinae, neque placita philosophorum sunt. De notis vero, quas proferemus in medium, id tenen-

nendum est, non dogmata, in quibus vna aut altera nota fuerit, sed illa, in quibus omnes sunt, fundamentalia esse.

Primum igitur, ex quo dogma quoddam fundamentale esse cognosci possit, hoc esse statuimus, *ut sit in sacris litteris aperte et dilucide expositum.* Praeter has enim litteras neque nouimus legem fidei, neque accipimus, ex iisque solis theses principales omnes sumendae sunt. Quando vero Christiana religio omnium hominum temporumque est, cunctis, quantacumque eorum diuersitas sit, conuenire, ab iisque, quascumque etiam aut acceperint a parentibus, aut sibi sumserint vltro de ceteris rebus sententias, intelligi debet; non possunt fundamentales articuli a sacris scriptoribus non aperte adeo tradi, ut eos etiam ignarissimus homo, rudisque litterarum populus assequi possint. Iesum mortuum, excitatumque esse, atque ascendisse in caelos, vel puer omnis doctrinae expers, si legere potest, nec omni sensu caret, ex sacris litteris facile cognoscet. In eorum autem sententiam, qui *consequen-*
tias, quas vocant, veras et legitime coactas fundamentalia dogmata in se continere posse docent, non temere eundem esse arbitror. Non quisque enim acutus adeo est, ut de argumentorum vi ac potestate, aut de argumentationis ratione et legibus iudicare possit,
vel

vel multo etiam minus, si alterutra thesium, ex quarum comparatione conficitur aliquid, philosophica fuerit. Sin illarum vtraque aperte traditur in sacris libris, dogma, quod ex illis cogitur, si ceteras fundamentalium articulorum notas omnes habet, horum ordini alteri adiungendum esse censeo. ROMANVS TELLEKVS: *Nihilo tamen secius, inquit, ita concludere tuto licet: quidquid non manifeste quidquid non pluribus locis — — in scripturis legitur, id non est fidei specialis, seu saluificae articulus fundamentalis. Lubenter quidem et hoc largimur, quae in quavis controuersia legitimam per consequentiam sacro ex codice deriuantur, genuinam de controuersa materia semper ἀποδεικτικῶς probare opinionem — — tamen dissentienti viro nequaquam — — vitio vertendum est — — si quando ipse consequentiam perspicere non valeat, nec obtrudendum ipsi, ut illam consequentiam intelligere necessario discat. *)*

Quae

*) In epistola ad I. G. PFEIFFERVM de eo, quod iustum est circa determinanda problemata theologica - - TVRRETINVS vero et PICTETVS sibi contradicunt ipsi. Conf. Illius dilucidationes. Lugd Bat. MDCCXLVIII. ed. T. III. disp. de articulis fundamentalibus p. 43. et p. 48. Huius vero Theol. Christ. T. I. L. I. c. XXXII.

Quae igitur dogmata non disertis verbis in sacro codice traduntur, licet non solum a viris doctissimis ac honestissimis defendantur, verum verissima etiam sint, fundamentalia non sunt. De reditu ab inferis, et de mentibus humanis post corporum mortem multa in sacris libris commemorata non sunt, quae curiosi homines nostri scire cupiunt; ut neque de rerum omnium, quae restituendae humanae salutis causa gestae et factae sunt, modo, ratione ac causis, sapientissimo certe consilio, aperte, diligenter et enodate scriptum est: quae igitur homines ex suo ingenio addiderunt, aut ut sit, coniectando saepe, et quae dicta erant, ad suam mentem detorquendo, ex libris sacris confecerunt, fundamentalia non sunt. *Falitur*, inquit MELANCHTHONVS, *quisquis aliunde Christianismi formam petit, quam e scriptura canonica.* *) PAVLLVS: *hoc autem vobis declaro, traditum a me euangelium non esse humanum. Nec enim ego ab homine accepi, aut didici, sed patefaciente Iesu Christo. Quin summus ille etiam gentis nostrae doctor: frustra me venerantur humanorum praeceptorum doctrinam docentes.*

Neque in verbis et dictionibus fundamentalis articulus situs est. Quod si ab hominibus inuenta sunt, horumque auctoritate et legibus aduersus aliorum impugnationes munita, probare ea atque tueri non magis

M tene-

*) Loc. Comm. MDXXI, p. 2.

tenemur, quam dogmata humana, quae a diuino magistro eiusque discipulis tradita non sunt. Multo igitur minus ea nomina ac verba necessario assumenda sunt, quae plerique homines sine sensu ac mente pronuntiant, aut de quorum significatione inter doctiores adhuc lis est. Crimen esset nulla re expiandum, si quis timore hominum, aut amore impulsus, tamquam vera tueri vellet, quae dubia, vel a vero aliena esse testaretur conscius sceleris animus. Ne omnes quidem definitiones, quibus sacri scriptores vsi sunt, ad articulorum essentiam pertinent. Grauiissima dogmata verbis minus propriis expressa sunt, quorum proprius sensus eruendus est: loquendi formulae illae vero repetitae ab antiquis ritibus, et ad prisci aevi genium accommodatae vestis instar sunt, quam tenere nil refert hominis, qui corpus tenere vult. Quae autem sit cuiusque vocis prima et propria significatio intellectu erit facile, quod nullum est axioma principale, quod non aliis in locis verbis propriis comprehensum sit. Habemus patronos nostrae sententiae summos viros, non solum IOANNEM et CONRADVM. BERGIOS, lumina quondam ciuitatis nostrae, verum LVTHERVM etiam, et CALVINVM. Horum quidem sententiam supra in altero de fide humana libro exposuimus: IOANNES BERGIVS vero in *regula Apostolica de formandis in religione iudiciis*: quod si, inquit, Soci-
niani

niani et Ariani in verbis scripturae, iisque non mutatis neque mutilatis sine lite et disceptatione acquiescerent, neque quidquam ex interpretationibus, rationisque suae consequentiis praeter et contra fidei articulos adiungerent, eam de his hominibus, quamvis interpretationibus nostris aut humanis formulis uti nollent, sententiam ferre nefas esset. Hem! quem clamorem ederent, si quis nostrum in eam sententiam locutus esset. CONRADVS in *praxi Catholica*, qualis in DEO sit species aut modus unitatis Scholasticis Theologo - Metaphysicis diligentius excutiendum relinquit.

Ob rationes supra allatas ex fundamentalium articulorum numero excludenda sunt, *quae facilia adeo intellectu non sunt, ut a quouis possint intelligi.* Huc pertinent, quae tum demum perspiciuntur. cum multorum rituum narratio, aut antiquarum legum explicatio praemissa est, ea praesertim, quorum veritas non patet, nisi ex longa argumentorum serie, et ut breui omnia praecidam, quotquot eruditionem resipiunt, et ex humanarum disciplinarum riuulis hausta sunt. Ex hoc genere tantum non totus locus de ecclesia est, multa in doctrina de sacramentis, immo non pauca, quae de salute et redemptione peccatorum praecipi solent. Ego equidem de his rebus omnino non esse disputandum, non puto, opto vero, ut horum praeceptorum necessitatem urgere, atque pueris, puellulisque, atque hominibus

ab artium litterarumque studio alienissimis tradere desinant. Fac gregem puerorum, qui praeter aratorum sermones de bobus, equis, vectigalibus, rebusque similibus, aut aniles fabulas, vel ad summum preces memoriter recitatas, nil paene audiuerunt, qui vix legere, et nomina sua scribere possunt, neque vllius rei notionem habent, nisi earum, quae in stabulis suis, aut in vicinia sunt, mitti ad sacrorum ministrum, iisque ab hoc viro, quantumvis erudito, et perspicue omnia docente, et, quae sunt de foedere cum DEO, de sacerdotibus et sacrificiis, de vi et efficacia sacramentorum, de disciplina sacra tradi; stupebunt in omnibus, post crebras repetitiones comprehendent animo verba, rem non comprehendent, sed illis vocibus aut nullam tribuent, aut alienissimam potestatem. Enimuero fieri posse debet, vt neglecto et indoctissimis moribus homini tradatur religio, cui scilicet patet etiam ad coelum aditus.

Nullum igitur dubium est, quin dogmata, quae intelligi nequeunt, nisi ante philosophorum antiquorum aut nostrorum decreta exposita fuerint, temere sint in fundamentalium articulorum numero posita. Haecenim non assequitur, qui philosophicae scientiae expertus est: religio vero non philosophis solum, verum vniuerso generi humano necessaria est. Similes sunt indocti, dum de istis, quarum vim ignorant, elegantissimis loquuntur, machinis,

nis, quae sonos edunt et efficiunt, quos non audiunt ipsae. Vt interdum in coetibus sacris accidit, vt plebecula clara voce canat Kyrieleison, Halleluiah, hisque similia, licet vim vocum ac potestatem ignoret; ita garriunt viri, quae pueri didicerant, et quid dicant, nesciunt ipsi. Quaecumque res vero non intelligi nisi ab eruditis potest, ea nullo modo potest ad caput religionis catholicae pertinere. Quid quaeso cogitarent baiuli et aratores, immo politiores illi homines, qui in aulis sunt, feminaeque vel optime educatae, vbi nos audirent disputantes *de bonitate actionum materiali et formali, de abstracto et concreto, de qualitate peccaminosa, de qualitate reali per actiones reales realiter producta, de toto rei conceptu quidditativo?* Docte dicuntur; non nego; ob eam rem vero ad fundamentum non pertinent. Quicquid ignorauit PAVLLVS, ignorarunt PETRVS, IOANNES et IACOBVS, nos quoque salua fide ignorabimus. Si iudicium summorum virorum audire lubet, audi alterum eruditissimum theologum, alterum philosophorum sua quidem aetate facile principem. MELANCHTHON quidem *): *proinde non est, inquit, cur multum operae ponamus in locis illis supremis de Deo, de unitate, de trinitate Dei, de mysterio creationis, de modo incarnationis.* Quaeso te, quid assequuti sunt iam tot saeculis scholastici theologi, cum in his lo-

cis solis versarentur? nonne in disceptationibus suis, ut ille ait, vani facti sunt, dum tota vita nugantur de vniuersalibus, formalitatibus, connotatis, et nescio quibus aliis inanibus vocabulis, et dissimulari eorum stultitia posset, nisi euangelium interim et beneficia Christi obscurassent nobis illae stultae disputationes. — — —

LEIBNITIVS vero: *) *passim homines metaphysicas voces necessitate quadam adhibent, et sibi blandientes intelligere credunt, quae loqui didicere: nec vero substantiae tantum, sed et causae et actionis, et relationis, similitudinis, et plerorumque aliorum terminorum generalium notiones veras et foecundas vulgo latere manifestum est.*

*Augetur articuli fundamentalis auctoritas, quem necessarium esse adfirmant sacri scriptores, ac quocum coniungitur aeternae salutis promissio. **) Christianus enim certe est, qui in bibliis et caelis is esse declaratur. IESVM esse fundamentum fidei, (1 Cor. III. II.) et legatum DEI, (Io. XVII. 3.) eumque in carne venisse (1 Io. IV. 2. 3) et excitatum esse ab inferis, (Rom. X. 9) IESVM esse*

*) In Act. Lips. MDCLXXXIV. Mens. Martii p. 120.

) **TELLERVS l. c. *Quaecumque thesis, inquit, nec clare in scripturis proposita, nec adiectis voculis credendi necessitatem, vel influxum in saluationem aeternam determinantibus, asserta — — — illa thesis — — non nisi a superstitioso theologo fundamentalibus annumeranda.*

esse CHRISTVM, (1 Io. II. 22. 23) fidem esse practicam (Io. III. 36) credet, quisquis Christianus esse vult, quod vt necessaria commendantur, et aeternae vitae promissionem habent, aut haec negantibus proposita poena est. Dogmata vero, quae non omnes notas ceteras habent, quibusque neque illa necessitatis assertio, neque salutis promissio adiuncta est, fundamentalia non sunt. Haec enim causa ex iudicio DEI solo aestimanda est. Quod si tu salutem Christianorum, de ceteris enim nunc non loquimur, opinionibus ex tuo ingenio ac arbitrio effictis alligas, vestigia premis pontificis Romani, et monstri illius similis es, ex cuius atrocibus cruentisque faucibus vt se posterosque suos eriperent, et in libertatem vindicarent, neque fortunis, neque opibus, neque honoribus, ne vitae quidem pepercerunt religiosissimi maiores. Diuini consilii ratio, quam aperte docere, atque in summa luce collocare noluit DEVS, quidquid laborent vana ingenia et curiosa, salua fide ignoratur. Primi quidem Christiani ab obscuris quaestionibus omnibus abstinuerunt. Si quis enim ad Christianorum sacra transire vellet, publiceque adfirmaret, *se credere in filium DEI*, quod nostra quidem sententia nihil aliud est, quam credere, IESUM esse eum, quem se esse dixerat ipse, in sacram communionem receptus est.

Quum religio Christiana tanta quanta est ad flectendos hominum animos, et ad pietatem in DEVM honestatisque amorem traducendos, ac dulcissimo afficiendos solatio composita est. *principale dogma aliud esse non potest quam quod ad virtutis studium homines excitet.* In lubrico enim et instabili fundamento molem locare, imprudentis esset. Aut tu vnquam accidere posse putas, vt ex inualido et demortuo semine laeta proueniat seges? eiicientur ergo ex fundamentalium articulorum communitate, qui aut nullam, aut minimam certe in coercendos animi motus vitamque regendam vim habent. Num mercenarius quilibet philosophus fiet aut criticus, linguas addiscet, in historiam et chronologiam incumbet, et eam sibi parabit eruditionem, qua famosissimi illi admirabilium opinionum inuentores ornati sunt? quam in admirationem traducerentur, si forte in subtiles et spinosas nostrorum hominum de decretis DEI disputationes inciderent Sineses? Vtrum scientia media in DEO sit, quis sit omnipraesentiae modus, quomodo e sepulchro exierit IESVS, millia hominum multa aut noluerunt disquirere, aut non potuerunt, licet forsitan fidem sanctius seruauerint, quam superbi inanum argutiarum architecti. Possunt etiam nonnunquam magna esse ad honestatem incitamenta, quae impune ignorantur. Astronomia equidem singularem concitat summi rerum conditoris reueren-

uerentiam, verum sexcenti sunt homines, qui DEVM ex animo venerantur, licet nesciant motum siderum, neque caelestibus illis orbibus moueantur.

Ex iis, quae adhuc disputauimus, facile quidem intelligetur, *dogmata fundamentalia non esse, quae in uno modo aut altero sacrarum litterarum loco traduntur.* Illud enim, ex quo tot tantorumque dogmatum aliorum veritas pendet, quod ad emendandos mores inprimis valet, quod necessarium esse vel viri diuini docuerunt ipsi, non potest non crebro commendari. Neque credibile est, licet de ea re probabiliter disputari posse non pauci existimaturi sint, PAVLLVM Romanis aut Galatis tradidisse fundamentale dogma, ceteris Christianorum coetibus non tradidisse. Quod si res se aliter haberet, efficeretur ex eo, Christianae religionis fundamentum non semper idem fuisse, aut eam posse teneri, licet ignoretur id, quod caput eius est: at vtrumque abhorret, et a ratione ac veritate alienissimum est. Quare ego equidem non diffiteor, me et ob hanc et ob alias rationes *Spiritus Sancti processionem* in fundamentalium articulorum numero non ponere. Num perspicua, immo num *orthodoxa*, id est, receptis ac publica auctoritate munitis opinionibus consentanea *processionis* definitio est, quando eam dicunt esse *Spiritus Sancti essentiae aeternam emanationem, qua Pater et Filius suam essentiam communicando*

M 5 Spi-

Spiritum Sanctum ex se spirant, seu qua Spiritus Sanctus totam essentiam Patris et Filii eandem numero veluti per spirationem accipiendo existit. Ego vero acutus adeo non sum, ut emanationem, et quid sibi velit spirare, aut per spirationem accipere, animo possim comprehendere. Lugeo vices meas: quocumque vero animo me et cogitatione conuerto, non intelligo elegantias istas, atque admirabiles subtilitates. At scripserat vir ceteroquin meritissimus, Godofredus Wegnerus. Erunt credo, qui nobis historiam sacram opponant. At pauci sunt euentus, qui ad fundamentum pertinent, atque hi ab auctoribus sacris saepius commemorantur. Esse mundum hominumque genus a DEO conditum, recessisse Adamum ab integritate sua, IESVM natum, mortuum, excitatum esse, centies tradiderunt: ceterae narrationes, quae rarius leguntur, essentiam religionis non attingunt. Alii forte dicent, ex sententia nostra confici, Christianum hominem non omnibus officiis adstrictum esse, quum virtutes quaedam vix semel atque iterum ab Apostolis commendentur. Verum enimvero de credendis praecipue, non de agendis, neque de moralibus praeceptis disputamus, quae omnia ad religionis essentiam pertinent, quibusque vacare nemo debet. Fieri autem omnino non potuit, ut in vno, eoque exiguae molis libello omnia enumerentur officia, quum innumerabiles paene hominum con-

iun-

iunctiones sint. Sufficit, DEVM pro sapientia sua vniuersum hominum officium in amore complexum esse, legesque tulisse late adeo patentem, vt officia omnia comprehendant. Si quis est *Φιλανθρωπος*, nunquam violabit amicitiae iura: est vero *Φιλανθρωπία* maior atque nobilior, liberoque homine dignior, quam amicitia, quae deferendi ius humanae communitatis dare nemini debet. Quicumque DEVM ex animo amat, is etiam ad seruanda cetera officia paratus erit: longe alia ratio est dogmatum. Tenent multi fundamentalia, qui aut negant cetera dogmata, aut nesciunt. Effetne vero audacissimae impietatis, homines, qui nesciunt, quo die IESUS sacram coenam celebrauerit, quo corpore vsus sit post restitutionem in vitam, aut quid sibi hoc velit, quod affideat ad dextram patris, ex Christiana ciuitate eiicere, et rei capitalis reos facere? addo officia primaria fidei et amoris, quae cetera in se continent, in sacris litteris quam frequentissime commendari, et hac in parte cum praecipuis dogmatibus conuenire.

Negamus porro *articulum fundamentalem esse, quem antiqui Christiani non crediderunt*. Quod quidem non ita intelligendum est, vt id sumserunt Genevensium theologorum nonnulli, articulum non esse fundamentalem, quem vnquam homo aliquis negauerit. Longe enim absumus a Vincentii Lirinensis sententia, qui in suo aduersus se-

ctas

Hic libro, quem *Commonitorium* inscripsit,
 ex hoc docuit elucere, vtrum articulus ali-
 quis sit fundamentalis, si *semper, ubique et ab*
omnibus sit creditus; verum hoc volumus,
 dogma fundamentale, neque humani ingenii
 foetum, neque primis Christianis ignotum
 fuisse. Quod si fieri potuisset, vt esset Chri-
 stianorum religio longo tempore post con-
 stitutionem suam articulis fundamentalibus
 aucta, neque catholica, neque semper eadem
 fuisset. Nobis equidem, quod imbecilles
 homines, qui labi facile ex errore possunt,
 quam Filius DEI virique diuini tradiderunt,
 religionem emendare velint, perficere, at-
 que nouis adeo inuentionibus augere, alie-
 nissimum semper visum est. Num igitur
 IESV, eiusque Apostolis sagaciores fuerunt
 Platonici et Scholastici? quis potest aliud
 fundamentum iacere, praeter id, quod ia-
 ctum est? vel eae etiam opiniones ab homi-
 nibus euangelio additae, quae maiorem pie-
 tatem commendare videntur, suspectae no-
 bis sunt. Religio enim a prima inde origine
 sua, veritatis sanctitatisque magistra fuit.
 ἐπιγνωσις ἀληθείας τῆς κατ' εὐσεβείαν ἐπ' ἐλ-
 πιδι ζωῆς αἰωνίου; qui vero deserunt fontem,
 ex quo primi Christiani omnia hauserunt
 pietatis ac solatii praesidia, et se recipiunt
 ad eum, qui sitit ipse, mittunt sese in peri-
 culum tristissimorum errorum, qui ad ἀπιστίαν,
 et turpissimum quodque stultitiae genus viam
 solent munire. IESUM rediisse ab inferis,
 lon-

longe grauissimum doctrinae caput est: ex quo vero si rite effici posset, Iesum exiisse, antequam lapis deuolutus esset, nos equidem adhuc errore capti fuissetus. In sacro codice nulla fit miraculi huius mentio, neque quisquam antiquorum, quod nos sciamus in illa sententia fuit.

Optandum igitur est, vt nunquam obliuiscerentur, quantum distent antiqua dogmata, quae omnibus hominibus tradenda, et ab omnibus, qui audiunt, assumenda sunt, a ceteris, quae ad eruditos modo homines pertinent. Illa negare non potest, qui Christianus esse vult: haec forsan ignorare non poterit, qui velit nomen theologi, aut viri docti tueri, ignorabit autem, immo negabit Christianus. *Nulla caussa est, inquit IOANNES MEISNERVS, *) cur hodie alios novos, ac prioribus saeculis incognitos, et inauditos articulos addere velimus: si enim ea dogmata, quae olim et ab ipsis ecclesiae incunabulis tradita sunt, illis qui prioribus saeculis vixerunt, ad salutem sufficere potuerunt, etiam nobis satis erunt, vt per ea salutem habeamus.* Neque dubium est, quin doctores, quorum ὁρθοδοξία explorata est, a se adeo abhorreant inuicem, vt homo, qui eorum placita et συνηματα paulo diligentius recognouerit, discrimen dictionum et formularum, quibus vtuntur, nisi forte eadem sint disciplina egressi, et in vnus iurarint verba magistri, vehementer miretur.

Litte-

*) In Irenico Duraeano Sect. II. §. 46.

Litterarum ac disciplinarum vis semper magna in illa συνηματα fuit, quae sibi de sacris rebus effinxerunt ipsi. Philosophiae Platonicae et Peripateticae ea fuit auctoritas, quae Cartesianae et Wolfianae est ac esse incipit Crusianae. Controuersiae illae igitur de *modo omnipraesentiae* ad fundamentum non *per-tinent*. Apostoli eum non explicarunt, horum vero discipuli ignorasse, neque de eo vnquam disputasse videntur. Vtinam his non sapientiores, pietate pares essent! alter rauca et imperiosa voce dictatoris instar, cuius edictum pro numine obseruandum sit, turpis eos erroris accusat, qui praesentiam in operationibus ponunt; alter his sublati illam simul tolli autumat; vtcumque vero se res habeat, et vtercumque erret, non in religione, sed in philosophia alucinatur. Quod vtrum de iis etiam iudicandum sit, quae tot lites atque controuersias de sacra coena excitarunt, penes prudentiores atque ab omni partium studio alienos homines arbitrium esto. Historia equidem *) „omnes Christianos de „modo et ratione praesentiae corporis et „sanguinis Christi ad nonum vsque saeculum „varie ac inconstanter sensisse docet, neque „vllius concilii lege sancitum fuisse, quid de „hac re credendum esset. Paschasium Rad- „bertum primum docuisse, post consecratio- „nem

*) Conf. MOSHEMIVS in Inst. Hist. Eccl. L. IV. Helmst. MDCCLXIV. Sacc. IX. P. II. C. III. §. 19.

„nem in sacra coena figuram tantum panis et
 „vini relinqui, verum autem corpus seu car-
 „nem Christi adesse, et illam quidem carnem,
 „quae nata est de virgine, passa in cruce, re-
 „surrexit de sepulcro. *) Saeculo etiam vn-
 „decimo varias de hac praesentia sententias
 „impune propositas adhuc esse: nec enim
 „quemadmodum sentiendum esset, concilio-
 „rum legibus fuisse definitum. Quid? quod
 sunt viri doctissimi, et de republica sacra
 bene meriti, qui non ita pridem non infi-
 ciandum esse putarunt, theoria, quam de sa-
 cra coena verissimam esse docent ipsi, non
 vti potuisse Apostolos, primos ad coenam
 istam adductos conuiuas. „Neque ante ex-
 „ordium belli Donatiani de discrimine, quod
 „disiungit personas diuinas, disputatum, ne-
 „que idcirco ab ecclesia praeceptum erat ali-
 „quid. Multo minus formulae praescriptae
 „erant, quibus de hoc mysterio loquendum
 „esset. Itaque diuerso modo doctores sine
 „offensione hanc rem explicabant — —
 „in Aegypto vicinisque regionibus plerique
 — — — hoc in dogmate ORIGENIS
 sequebantur sententiam. **) Descensum ad
 inferos nouum articulum esse, non negant,
 qui saniori iudicio in rebus sacris vti amant.
 Desideratur ille in plurimis symbolis anti-
 quis

*) Ibidem Saec. XI. P. II. C. III. §. 13.

**) Ibidem Saec. IV. P. II. C. V. §. 9.

quis *); coetus Aquileiensis primus eum saeculo quarto adhibuit **); neque fuit inter antiquos hac de re maior, quam nunc est inter doctores concordia. Non esse vero articulum illum fundamentalem, *formula* adeo *concordiae* declarat. De his igitur, ceterisque ex hoc genere in vtramque potest partem disputari, nec qui negat hostis religionis censendus est.

Quibus omnibus augetur, quae nobis nunquam non probata est *de fundamentalium articulorum paucitate* sententiae auctoritas. Non multis enim neque alte repetitis dogmatibus, multo vero minus philosophorum decretis spem vitae aeternae adiunxit, aut ea negaturis grauissima supplicia comminatus DEVS est. Neque id aliter in religione catholica fieri potuit, quoniam hominum litterarum omnino expertium ingens est multitudo. Nullum est officium, quo vacare, aut quod, vbi eius opportunitatem habuerint, negligere salua religione possint; praecleara vero ac singulari scientia opus non est, quam quidem sententiam Apostoli etiam secuti videntur. Quem enim in sacram communionem recipiebant, eum neque multis
for-

*) Vid. HOLTZEVSII diff. de descensu Christi ad inferos. Frf. ad Viadr. 1699. et I. H. HEIDEGGERI diff. de symbolo Apostolico. Tig. 1679. §. 26.

**) IO. PEARSONII expos. Symb. Apost. Art. V. p. 400.

formulis exercuerunt, neque docuerunt sua placita, sed ex eo, an crederet in IESVM CHRISTVM, quaesiverunt. At qui factum sit nescio, vt quisque fundamentalium articulorum paucitatem tuitus infamia plerumque simul adpersus sit, quod quidem ACONTIO quoque accidisse videmus a CONRADO BERGIO, AMESIO, et GEORGIO PAVLLO aliisque honorificentissime laudato.

*) Neque HOBBSIVS **), quantumvis admirabiles ceterae eius sint opiniones, a vero omnino aberrasse credendas est, qui thesin, qua *Iesus esse Christus* dicitur, *unicum* articulum fundamentalem theoreticum esse, adfirmat, si modo addideris, *primarium*. Supra enim iam docuimus, posse articulum esse compositum, pluresque alios comprehendere. Thesis illa vero omnes continet articulos fundamentales, adeo vt dogma, quod salua illa thesi verum potest esse et falsum, fundamentale non sit. Ad difficilem itaque quaestionem, quae multum diuque exercuit theologorum ingenia, *cur in sacris libris fundamentales articuli non sint pressius definiti*, respondemus, definitum esse *primarium*, qui ceteros primi ordinis in se continet. De ceterorum numero quaeris? recte respondit TVRRETIVS, quem, si placet, consule. ***) Quamquam eos non sē-

N

quor,

*) Conf. BAEIVS in Dist. Art. Acontius.

** De ciue c. XVIII. §. 5. 6.

*** l. c. p. 49.

quor, qui Apostolici symboli partes omnes fundamentales esse volunt; id tamen tueor, non esse articulum primi ordinis, qui in isto symbolo non legatur, nisi illum exceperis, sine quo ne symbolum quidem accipi posset, quo sacri codicis auctoritas stabilitur. Idem sentit HEIDEGGERVS, et symbolum Apostolicum *articulorum fundamentalium receptaculum* vocandum esse existimat. *) MOSHEMIVS de ecclesia Saec. II. hanc fert sententiam: *paucis adhuc continebatur praeceptis et sententiis uniuersa religio Christiana, nec publice proponebant doctores alia dogmata, quam ea, quae symbolo, quod Apostolorum dicitur, comprehensa leguntur. In tractandi ratione nihil erat subtile, reconditum, et a populari cognitione alienum.* **) Hem! quantum distamus a prisca ciuitate! Quam optabile est, ut nostri homines similes essent antistibus eius aevi, quos pietate magis, quam ingenio et eloquentia inclytos fuisse, refert vir ille plenus fidei. Vtinam vero Pinczouiensis synodi decretum sequerentur verbi praecones, atque in orationibus sacris coram indocta multitudine recitandis a formulis abstinerent, quae neque in sacro codice, neque Apostolico symbolo leguntur. In ceteris vero symbolis multa esse, quae non modo non fundamentalia, sed ne vera quidem sunt, vel acerrimi humanae auctoritatis assertores negare ausi non sunt. Quod

*) l. c. §. 6.

**) l. c. Saec. II, P. II, C. III. §. 1.

Quod si ex horum librorum nonnullis articuli fundamentales constituendi essent, magnus adeo eorum existeret numerus, ut PAVLLVS, aut PETRVS, aut IACOBVS, si ad nos redirent, mirarentur doctrinam antiqua simplicitate sua, quae confirmandae pietati felicissime respondebat, aut omnino, aut magnam partem exutam. *Ideoque circulus esset vitiosus*, inquit TELLERVS, *ex libris symbolicis determinare, hoc vel illud non esse problema, sed fundamentale dogma. Denique in nostris symbolicis coniunctim consideratis omnia quidem extant fundamentalia dogmata: tamen id extra controuersiam est, non omnia satis perspicue ibi declarata esse.* *) Doctrinae ad arbitrium hominum, huiusque aut illius sectae placita accommodatae innumeri possunt esse articuli fundamentales, Christianae esse non possunt; sectarum varii atque a se inuicem abhorrentes, Christianae immutabiles sunt.

Quod si exiguus adeo est fundamentalium articulorum numerus, neque acri odio vexandi sunt homines, qui quidem a sectarum fundamentis recedant, seruant vero fundamentum Christianismi, neque digni sunt, in quorum capita deorum, licet certe in re profana, et a fide alienissima profanorum more loqui, detestentur iram. Non enim LVTHERI, CALVINI, ZVINGLI, nec AVGVSTINI, ARMINII, aut aliorum ho-

minum a seclis, sed Christianis sempiternae felicitatis spes facta est. Neque olim quaeretur ex nobis, quodnam symbolum subscripserimus, cui sectae dederimus nomen, sed de re prorsus alia quaeretur. Quum praeterea prisci Christiani nobis exemplo sunt, qui non eiecerunt e communione sua homines contrarias sententias secutos: nos quoque moderatio illa decebit, vt feramus homines per errorem lapsos, amice interdum moneamus, neque vi et armis, sed argumentis et beneficiis, vel pietate ipsa vincamus. Si in controuersiam adducuntur decreta antiquis incognita, disceptent doctores, non DEI causam, sed litterarum apud doctos acturi; quae si vero in concionem indoctae multitudinis proferuntur, communicantur cum plebe, ab vtroque peccatur, a cuiuscumque demum parte steterit veritas. Vtinam memores essent Apostolicae probitatis! Ille vero: *Tu cur damnas, inquit, fratrem tuum? aut cur tuum fratrem despicias? cum simus omnes ad Christi tribunal adfuturi* — — *Debemus autem nos, qui fortes sumus imbecillorum infirmitates tolerare, neque nobis ipsis indulgere* — — *Si quis aliquo delicto anticipatus fuerit, vos eum, qui spirituales estis, reficite cum animi comitate, aspicientes vos ipsos, ne vos quoque tentemini.* Sic tandem ingredi liceret spem, fore vt modestiores, atque humaniores sint in iudiciis de opinionibus aliorum ferendis, neque surgant vitiiati censors, qui meritissimorum virorum famam iniuriis et conuiciis lacerent, intempestiuo et alienissimo puritatis,

quam

quam dicunt, amore studioque adducti. Nonne enim ab omni humanitate abhorret, pios viros opinionum diffidia omnino non fundamentalia, atque quaestiones historicas et criticas infami et inuiso nomine dedecorare? salutaris fuisset rebus Christianis, si de istis controuersis amice constitutum esset. An magi, qui IESum Bethlehemem natum adoratum venerunt, commenticiorum deorum cultores fuerint, an Iairi filiola vere mortua sit, quae et quanta sit sacrorum rituum vis, qua fide, quorum scripta supersunt, antiqui doctores, iique non Θεοπνευστοι vti, et quae cetera ex hoc genere sunt, de his in vtramque disputari partem, adfirmari ista, negari poterunt salua fide, nec fuit, cur tantos clamores ederent sacrorum nimis anxii custodes.

Quando vero proxima tractationi nostrae quaestio *de erroribus fundamentalibus* est, de his quoque mentem breuiter explicare lubet. Is vero ex nostra sententia errat fundamentaliter, non qui ignorat, sed qui negat et impugnat veritatem fundamentalem primi ordinis. Ille igitur erudiendus, hic, si nobiscum sacris communibus vtitur, erroris conuincendus, nec, si vir pius fuerit, virtutis fideique tenax, e societate eiiciendus est, frustra quaesiturus disciplinam, quacum omnino conueniat, aut quae sit omnis erroris expers. Alia prorsus res est cum ingenti populo, qui rebus externis, iuribus, priuilegiis, beneficiis adductus non tolerantiam modo postulat, hoc enim humanitatis ius est, sed etiam communitatem sacrorum.

Quod si enim negat articulos fundamentales doctrinae Christianae, vel ipsa naturalis fundamenta deturbat et subuertit, praeter diuinam auctoritatem aliam ponit Christianae fidei normam, turpibusque disciplinae vitiis laborat, nulla cum Christianis potest ipsi esse sacrorum communio. In quam calamitatem inciderent res Christianorum, si decretis Romanorum Pontificum alligatis credendum esset, quidquid ex eorum sede tamquam e caelo dictaretur? Obesse vero errores fundamentales nullius saluti recte creduntur, nisi hominis Christiana doctrina probe imbuti, qui vitio animi errat. Quantis erroribus premebantur Apostoli? Diserte negabant, fore ut Iesus interficiatur; Thomas noluit credere, eum rediisse ex inferis, nisi lateri eius manum admouisset, quam infirmitatem quam clementissime tulit, neque eos grauissimis suppliciis minaciter terruit Iesus. Neque ista in vllum errorem, nisi cum insigni coniunctus peccato fuerit, in sacris litteris constituta sunt: his vero nos equidem inhaeremus. Clausulae igitur loco ponimus aurea illa TVRRETINI, qui: *optandum, inquit, ut primum illud, vereque fundamentale Reformationis nostrae principium de* **SCRIPTURA SACRA VNICA FIDEI NORMA** *animo excidere nunquam patiamur, adeoque nullis hominum coetibus, nullis humanis scriptis, quantacumque auctoritate vel doctrina praepolleant, fidem nostram mancipemus, sed omnia, quantà quanta sunt, ad Verbi*
Diuini normam expendamus.









